

BIGYIGHILI bi BANTUMU OSOMO

Wu me mukaana wu a myele wu ósono Luke. Wu a nsomo, « Nsia Yimbwe yi ósono Luke». Mukaana wu li mu osuo esala ki ósi bantumú. Mu wu a nsomo, nde ásuó bu báburu Yiisu, bu óli bumweẽ bu nde ña nsie yi, lipfu li nde, ya bu ásigihili nde ña kara li ba bápki mu ogye ku yulu.

Mukaana wu li mu osuo bu ógweghe Yiisu, wu áagyene ku yulu, Mufulu kundaa binduono bi nde mpaala bye binama litumu li nde lili masini (1.8). Mu obo, bantumú básuo bumpughulu mu osighili o Yiisu mu lipfu ku Yerusaleme. Kimini li ómwehẽ mfwunu a bakwuru ba ba-Dzwife nde lisi kuulu Nsia yi Mbwe yitsanama mu Yude lwohono, mu Samari, ya bvulu-bvulu ku Noore tee ku Antyose. Mu mandagha mamó, Piere, Dzake, Dzã, Dzake mbwee a Yiisu ya Poole báasi esala kii elagha. Lo mu bo bwohono, Poole ábvulusala. Esala e nde émonono mu libwunu li ábala nde ku etsulu e nsie kii Adzi li lisala, ku nsie a ba-Ngereke ya emvulu-ngughu ku nto yi a Wesete, mu matala ma ákabuludzye nde mu okabulutsala Nsia yi Mbwe. Mukaana wu ásiní mu saba li Poole wu áali mu boloko ku Rome ya li mu osuo ti mandagha ma Nzaami ya Mufulu ka bakughu odzahaba bye o.

Mukaana wu bakughu okaba nde bu:

- Obaana mu etsughu ki ógyene Yiisu ku yulu tee mu etsughu kii Pantekote (1–2).

- Bumpughulu bu bantumu ya kimini li bámono bo ku Yerusaleme (3–7).
- Nsia yi Mbwe yitsanama mu Samari (8).
- Poole gyinji mayele (9).
- Baara baala ka bali ba-Dzwife o, basomo mu libwunu (10–11).
- Badzwi Dzake ya bapaha Piere mu boloko (12).
- Midzye mi Poole mimi nsomo mu oyitsala Nsia yi Mbwe (13–14).
- Emvununu ki bantumu ku Yerusaleme (15).
- Midzye mi Poole mimi myele mu oyitsala Nsia yi Mbwe (16–18).
- Midzye mi Poole mimi mitere mu oyitsala Nsia yi Mbwe (19–21).
- Poole mu boloko (22–26).
- Poole ku Rome (27–28).

Mufulu a Ngili wu básiini a bantumu

¹ Ndughu a me Tofile, mu mukaana a me wu a nsomo, me aandyele mandagha mwohonono ma óbaana Yiisu osa ya oluo,

² tee mu etsughu ki ásenene nde mu okumu ku yulu, ña mbihi a ña ámana otswa nde mikele mu Mufulu a Ngili, kundaa bantumu ba ásuolo nde.

³ Ña mbihi a mpara yi ámono nde, nde ákamonono kundaa bo ya mu bilyimi bilagha, nde ákasuo kundaa bo ti nde li mweẽ. Mu bit-sughu makwumu-mana (40), nde ákabulumonono kundaa bo ya ákabulubili mu mi mitala Empu e Nzaami.

⁴ Etsughu nga-emõ, nde bu ákadza emõ ya bo, nde átswi bo mukele wu: «Ka limara mu Yerusaleme o, lo likebe mi oosiini a be Taara, mimye mi liigyughu be kundaa me

⁵ ti: Dzã aabogghoro mu madza, lo be, mu mana bitsughu sa babogghoro be mu Mufulu a Ngili.»

Bágyene a Yiisu ku yulu

⁶ Obo me buulu, babo ba bábvununu, báfwulu kundaa nde ti: «Mfumu, ngu mu matala ma we aabvurulu Emfumu e Isaraye?»

⁷ Nde ábvuhulu kundaa bo ti: «Ka yili ndagha a be o mu osoolo matala ya ena bi ókuru Taara mu litumu li ndeme,

⁸ lo be sa ligyagha lileene ña akala oogya Mufulu a Ngili mu be, ya be sa likala bampughulu ba me mu Yerusaleme, [mu] Yude lwohono, mu Samari, tee ku osughu nsie.»

⁹ Bu amana obili obo, nde ásejene mu okumu ku yulu ñaala bo bwohono mu okamono nde, ya edzi éfughu nde ña mihi mi bo.

¹⁰ Ñaala bo áli nkini mu okatala ku yulu, ku ákagye nde, babaghala buolo ba bálaha binkuru bi bipenjeme bágyi ña bele a bo,

¹¹ ya bályele kundaa bo ti: «Basi Ngalile, mu emakye be liitemene oño mu okatala ku yulu? Yiisu wu, wu oogylene a Nzaami ku yulu ña mihi mi be, sa ayabvughuru si ti bwunu a bu liimono be nde mu ogye ku yulu.»

Bakyyihi Matiase ña ebini kii Yuda

¹² Mu obo, bantumu bábvughuru ku Yerusaleme, obaana ku Munguo wu a mi-Olibve, wu li ña bele a Yerusaleme, mu etiiri ki bágwi muswa mu odzyara etsughu kii Sabate*.

* **1:12 1.12** etiiri ki bágwi muswa mu odzyara etsughu kii Sabate áli ku bele a kilometere mumõ.

¹³ Bo bu bayabvughuru, básomo mu ngwumu yi a ku yulu, omo mu báli a bo epfu ki okabvuñunu. Mu bo óli a Piere, Dzã, Dzake ya Andere, Filipe, Toma, Baretelemi, Matye, Dzake mwana a Alafe, Simõ mu-Nzelote ya Yuda mwana a Dzake.

¹⁴ Bo bwohono babo, básì mukama mu mukolo mumõ mu okasamana, emõ ya bakaha, ya Mari ngughu a Yiisu, ya bambwee ba Yiisu ba babaghala.

¹⁵ Mu bitsughu bibye, mpwumu a banga-a-kana yi áali ña ebini ekye yíli ku bele a nkama ya makwumu-muolo (120) ma baara. Piere átemene ña kara li bo ya ályele ti:

¹⁶ «Baana ba taara a me, áli bubwe ti, mandagha ma áli olyele Mufulu a Ngili mu Mukaana a Nzaami mu muñma a Dabvide mu nkooro a Yuda makeele, nde wu ákighiri mumbiri a babo ba básyimi Yiisu.

¹⁷ Nde aali mumõ ña kara li bihi, ya nde aabagha kaba lili esala ki.

¹⁸ Nde bu abagha mufuru wuulu ka li wu a nsumu o, nde swumu nseghe. Nde aabwi kii mapfumunu, bala li nde liibughulu ya biini bi nde biitsañama.

¹⁹ Ya baara bwohono baba Yerusaleme basoolo ndagha oyo. Mu obo, bo baakata nseghe oyo mu ndiñi yi bula bu bo ti: “Akeledama”, mbaala ti, “nseghe yi makili”.

²⁰ Ankoho, básono mu mukaana wu Bikwumu ti:

“Nyaã nzo a nde yikala mukanjana, ya mbwuru anyaã okala munsa yo!”

«Ya báfiri sono ti:

“Nyaã mbwuru mukimi asala esala e nde”.»

²¹ «Mu obo, bafaana osuolo mbwuru mukimi ña kara li baara ba bákabulugye ya bihi, mu matala mwohonon maala Mfumu Yiisu ákabulugye ña kara li bihi,

²² obaana ña óboghoro nde Dzã, tee mu etsughu ekye ki bámaha nde ña kara li bihi. Mbwuru munde, emõ ya bihi, faana okala mpughulu mu osighili o Yiisu ña kara li ba bákpi.»

²³ Básuo baara buolo: Dzodzefe wu bákata Barasabase, wu bálughu Yusutuse, ya Matiase.

²⁴ Ya bo bwohonon básamana ya bályele ti: «Mfumu, we wu soolo mikolo mi baara bwohonon, suo bihi mu bo bansa buolo ba, nande we áasuolo,

²⁵ mpaala agwolo ebini mu esala ki buntumu ki, ki oosihi Yuda mu ogye ku ebini kii ndaa nde.»

²⁶ Ña nseele, bo báti empa kiili† nga-a-bwehe me wu aagwolo, ya eti ébwi ña ndaa Matiase, ya básohobo nde mu kaba li bantumu kwumu ya mumõ (11).

2

Ogya ku Mufulu a Ngili

¹ Etsughu kii Pantekote bu eto, bo bwohonon bábvuñunu ña ebini emõ.

² Ya ensihibi, nkele yífi ku yulu ti anga nkele a efulu kii mpini, yíluhu nzo yohonon mu bábwi bo nsini.

³ Bo bámonon manzalisogho mu efaana ki mile mi mbaa, mi míkakaghaba ya míkabwa ña yulu a nswe mbwuru mu bo.

† **1:26 1.26** Mat 27.35; Mar 15.24; Luk 23.34; Dzã 19.24.

⁴ Bo bwohono bálwulu mu Mufulu a Ngili ya bábwi obili mu mandinji makimi, bwunu a bu ókatumu bo Mufulu obili.

⁵ Ankoho ku Yerusaleme óli a ba-Dzwife ba bali a enzaama kii nganma, baara ba báfi mu bitsulu bi mansie byehene.

⁶ Bu bagyughu nkele oyo, bo bábvuñunu mu mpwumu, ya bo bwohono bákinjimi ku olagha, mu kuulu nswe mbwuru ákagyughu bo mu okabili mu ndinji a ndeme.

⁷ Bo bákinjimi ku olagha, bágwuu ya bákalyele ti: «Bunu, baara bwohono ba bali mu okabili ba, bo ka bali baara ba etsulu e nsie kii Ngalile o?

⁸ Lo bunu-a-bo mbwuru-mbwuru mu bihi ali mu okagyughu bo mu okabili mu ndinji yi bula bu nde?

⁹ Na kara li bihi oli a baara ba nsie yi a ba-Parete, nsie yi a Mede, nsie yi a Elame ya ba baakakala ku Medzopotami, ku Yude, ku Kapadose, ku Põ ya ku Adzi,

¹⁰ ku Firingi, ku Pamfili, ku Edzipite ya ba bali mu bitsulu bi nsie bibi ku Libi lili Sirene ya ba bali ku bvulu lili Rome,

¹¹ ba-Dzwife ya baara ba básomo Nzaami a bo, basi Kerete ya basi Arabi, bihi lili mu okagyughu bo mu okabili mu mandinji ma bihi, bigyighili bi Nzaami bi binene!»

¹² Bo bwohono bágwuu ya mayele máfi bo, bákalyele bo-a-bo ti: «Bu yi ma?»

¹³ Lo babake bákasa bo munsensehẽ ya bákalyele ti: «Buta mala baakolo!»

Mandagha ma ólyele Piere

¹⁴ Mu obo, Piere átemene ya bantum kwumu ya mumõ (11), ábili mu likyi lili mpini kundaa mpwumu ya ályele kundaa bo ti: «Basi Yude, ya be bwohono ba lili ña Yerusaleme, ligyughu mandagha ma aandyele me, libaghala ti,

¹⁵ baara ba ka mala baakolo o ti bu lili mu okatsimi be, mu kuulu, li nkini tala lili wa mu epala.

¹⁶ Lo bu me bu oli mu okeelee ndagha yi ólyele mubighili Dzowelee.» Nde ályele ti:

¹⁷ «Mu bitsughu bibi masini, bu ólyele Nzaami, me sa nsurulu Mufulu a me ña yulu a mbwuru-mbwuru,

ya baana ba be ba babaghala

ya baba batughu sa babighili,

Nzaami sa asa kuulu ti bampala ba be bamono mandagha ma manyaghara

ya binjini bi be sa biluoro manzolo.

¹⁸ Eẽ, mu bitsighu bibye,

me sa nsurulu Mufulu a me ña yulu a basala ba me baba babaghala,

ya baba bakaha.

Ya bo sa bakala mibighili,

¹⁹ ku yulu me sa ngyighili mandagha mama okinjimi mu yulu,

ya ku nsie bilyimi bibi mpaana ña yulu nsie: Makili, mbaa ya bidzi bibi lwuu.

²⁰ Tala sa likighiri mpyibi,

ya ngoono sa abie ti makili.

Myehene mimye sa mimonono

nsomo ya ogya ku etsughu e Mfumu,

etsughu ki enene ya kii nsia.

²¹ Ono nswe munde wu akala aatanana nkwumu a Mfumu sa abvwughu.»

²² «Basi Isarayelee, ligyughu mandagha ma: Yi-isu wu a ku Nadzarete, mbwuru munde wu oosuo Nzaami kundaa be mu bimaã, mandagha mama okinimi ya mu bilyimi bi ási nde ña kara li be, ti bwunu a bu lisoolo be beme yo,

²³ mbwuru munde, wu bátyeghe ti bwunu a bu oli bitsimi bi otswama ogyahaba Nzaami, be liigwi nde ña myaã mi baara ba bagwene osoolo Nzaami, ba baadzwi nde bu baakomo nde ña kuruwa.

²⁴ Lo Nzaami aasiili nde, bu aakwulu nde mu mpara a lipfu, buulu ka okughu okala o ti lipfu lidzarala nde.

²⁵ Mu kuulu, mu nde Dabvide ályele ti:
Mu nswe matala, me áakamono Mfumu ña nkulu a me,
nde li ña kwogho e me kii babaghala,
mpaala me nyaã otighiri mu nzalamweẽ.»

²⁶ «Me mu obo mukolo a me ali kunsá esee,
munjma a me aalwulu mu munyunju ya nyuru a me yili kunsá emiini,

²⁷ mu kuulu we ka nyaghala muwumunu a me ku nsie a ba bákpí o,
we ka nyaã wu a we Wu a Ngili abolo o.

²⁸ We aasuo me mankwulu mama laama,
we buli ña nkulu a me, we sa luhu me mu esee.»

²⁹ «Baana ba taara a me, linyaã me bu ndi a muswa, me ndyele be mu kana lwohono mi mitala nkagha-kwuru Dabvide ti: nde ákpí, bádzýighi nde, ya mpyeme a nde yili tee lolo ña kara li bihi-a-be .

³⁰ Lo nde áli mubighili ya nde ásoolo ti mu mukihi, Nzaami ágwi misiini kundaa nde ti mumõ mu bategehele ba nde sa akiri ña likubu li nde.

³¹ Mu limono, Dabvide bu átswama otaala mi mitala osighili o Kriste ña kara li ba bákpi, nde ályele ti: “Ka baanyaghala nde ku nsie a ba bákpi o, ya ka baanyaã nyuru a nde yibolo o.”

³² Me Yiisu munde Nzaami aasiili ña kara li ba bákpi, ya bihi bwohono lili bampughulu mu ndagha oyo.

³³ Nzaami bu aakuhubu Yiisu ku kwogho e nde kii babaghala, Yiisu aagyagha kundaa Taara Mufulu a Ngili wu áli bagwi misiini, ya nde aasurulu nde ña yulu a bihi. Mimye me mi lili mu okamono ya lili mu okagyughu be lolo li.

³⁴ Mu kuulu, Dabvide ndeme ka ákumu ku mayulu o, lo nde ályele ti: “Mfumu aalyele kundaa Mfumu a me ti: Yabwa-nsini ku kwogho e me kii babaghala,

³⁵ tee mu matala ma akala aansa me mitaara mi we mikala edzyara e myili mi we.”

³⁶ “Nyaã ti basi Isarayeke bwohono bagyighili osoolo mu nganma ti: Nzaami aasi ti Yiisu wu liikomo be ña kuruwa akala Mfumu ya akala Kriste!”»

³⁷ «Bu bamana ogyughu mandagha mamu, mikolo mi bo mǐdzwala, ya bályele kundaa Piere ya kundaa bantum ti: “Baana ba taara, emakye bihi lifaana osa?”»

³⁸ Piere ábvuhulu kundaa bo ti: «Ligyiñi mayele ya babogho nswe mbwuru mu be mu nkwumu a Yiisu-Kriste. Mpaala Nzaami asa masumu ma nde kolokolo ya be sa ligyagha kaba li Mufulu a

Ngili.

³⁹ Mu kuulu misiini mi, Nzaami ási mye kundaa be, kundaa baana ba be ya kundaa babo ba bali ku la, bo bwohono ba akala oota Mfumu Nzaami a bihi mbili.»

⁴⁰ Mu mandagha makimi ma malagha, Piere ákapeene a bo ya ákagwa bo mpama, ña ákalyele nde kundaa bo ti: «Ligyagha obvwughu ya be sa lipala mu eseene ki ebi ki!»

⁴¹ Ya babo ba bákíhi mandagha ma nde, bábogho bo, ya mu etsughu ekye, ba báyasomo mu kaba li ba bákasa kana, báli ku bele a mapfwunu-matere (3 000) ma baara.

Bumweẽ bu libwunu lili nsomo ku Yerusaleme

⁴² Bo bwohono bási mukama mu maluo ma ókaluo bantumu, mu okala ti baana baba taara mumõ, mu okakaba limpa* ya mu okasamana Nzaami.

⁴³ Nswe mbwuru áli a nzalamweẽ, mu nkooro a mandagha mama okinimi ya bilyimi bi bilagha bi ókasa bantumu.

⁴⁴ Babo bwohono ba bási kana báli bumõ, ya byehene bi báli a bye, bíli bibi ebvughu.

⁴⁵ Bo bákatyeghe mansie ma bo ya byehene bi báli a bye, ya bákakaba nzi kundaa baara bwohono, bwunu a bu óli nzala a nswe mbwuru.

⁴⁶ Nswe etsughu mu mukama, bo bákagwihini mu okagye ku nzo a nzaami, mu okakaba limpa munsá manzo, ya bákadza bilogho bi bo mu esee ya mu mukolo wu okughulu.

* **2:42 2.42** *mu okakaba limpa* ndibili a mweẽ yi a odza o Mfumu Yiisu ya bantumu ba nde kuu masini, nsomo nde akpa. Me mu matala mamõ nde áseme limpa ya bviini.

⁴⁷ Bo bákasyighi Nzaami ya baara bwohono bákasuo bubwe kundaa bo. Ya nswe etsughu, Mfumu ákabwehe mu kaba li bo, ba bákabvwughu.

3

Piere ya Dzã badzuhu ekara

¹ Etsughu nga-emõ, Piere ya Dzã bákakumu ku nzo a nzaami mu oyisamana, mu tala lili matere ña mbihi a embehe.

² Oko, nswe etsughu, baara bákagya a baghala mumõ wu báburu ekara, ya bákatwulu nde ña muñma a nzo a nzaami, wu bákata ti Muñma a Nzo Wu Mubwe, mu kuulu nde akaluomo nzi kundaa babo ba bákasomo mu nzo a nzaami.

³ Nde bu amono Piere ya Dzã ba bákagye mu osomo munsá nzo a nzaami, nde áluomo bo nzi.

⁴ Piere ya Dzã batuunu nde mihi, ya Piere ályele kundaa nde ti: «Tala bihi!»

⁵ Mbwuru munde ágyighili otala bo, ya ákakebe mu ogyagha elogho ki eefa kundaa bo.

⁶ Piere ályele kundaa nde ti: «Me ka ndi a nzi ya oore o, lo ki ndi a me, me ngwi we kye: Mu nkwumu a Yiisu-Kriste musi Nadzarete, temene ya dzyara!»

⁷ Bu akwara nde mu kwogho kii babaghala, átehebe nde. Ñaana oño bitaama bi nde ya maseẽ ma myili ma nde bíbagha mpini.

⁸ Bu adzunumu mankagha, nde átemene ya ábwi odzyara. Nde ásono ya bo munsá nzo a nzaami, ákadzyara, ákadzunumu ya ákasyighi Nzaami.

⁹ Baara bwohono bámono nde mu okadzyara ya mu okasyighi Nzaami.

¹⁰ Ya baara básoolo ti me nde wu áakabwansini ŋa Muŋma a nzo a nzaami wu baakata ti Muŋma wu Mubwe mu okaluomo nzi. Bo bámono nzalamweẽ yi alagha, ya bákiŋimi mu mi míbwi mu nde.

Obili o Piere munsu nzo a nzaami

¹¹ Buulu mbwuru munde ka ákanyaã Piere ya Dzã o, baara bwohonu bákiŋimi ya bágyi mu ntyini kundaa bo, ŋa eluru kii nzo a nzaami ki baakata ti Eluru kii Salomõ.

¹² Piere bu ámono obo, nde áfwulu kundaa baara ti: «Basi Isarayelee, mu emakye be lili mu okakiŋimi mu ndagha yi? Mu emakye be lili mu okatala bihi ti anga áli mu lileene li bihi bameme, bwunu-we mu enzaami e bihi, bihi liisi kuulu ti baghala wu adzyara?

¹³ Nzaami a Abarahame, a Idzake, a Dzakobe, Nzaami a bankagha ba bihi, aagwi musala a nde Yiisu nsia, nde wu liityeghe be ya wu liibihi be ŋa nkulu a Pilate, wu áamono ti áli bubwe mu onyã nde.

¹⁴ Be liibihi Wu a Ngili ya Wu bunsumu, ya be liiswolo banyaã be wu aakadzwa baara.

¹⁵ Be liidzwi Mfumu a bumweẽ. Lo Nzaami aasiili nde ŋa kara li ba bákpí. Bihi, bihi lili bampughulu mu ndagha oyo.

¹⁶ Me mu lileene li nkwumu a Yiisu, mu nkooro a kana mu nde, baghala wu lisoolo ya wu lili mu okamono be wu, aabagha mpini. Me kana mu Yiisu liisi ti nde asaadzughu, bwunu a bu likughu omono be bwohonu nde.»

¹⁷ «Mu obo, baana ba taara a me, me nsoolo ti kunsu odzimini be ya bamfumu ba be liigyighili mandagha mamu.

18 Mandagha ma ótswama olyele Nzaami mu minjma mi mibighili myehene maatswighi. Mandagha mamó me ma: “Kriste a nde sa akala amono mpara”.

19 Mu obo, ligyinj mayele, libvughuru kundaa Nzaami, mu kuulu nde amaha masumu ma be,

20 ya mu kuulu matala ma ogwumu ma oogwi Mfumu magya, na akala aagweghe nde Yiisu, Kriste munde wu átswama osuolo nde mu be.

21 Lo mu matala ma, nde faana okala ku yulu, tee mu matala ma akala oobvurulu Nzaami bilogho byehene, ti bu ályele nde mu minjma mi mibighili mimi ngili mimi nsi-nkulu.

22 Mu kuulu Moyidze ályele ti: “Mfumu Nzaami a be sa apaha mu nkooro a be, ya na kara li ekaana e be mubighili ti anga me. Be lifaana ogyughu mandagha mwohonó ma akala aalyele nde be.

23 Nswe mbwuru wu akala aagwene ogyughu mubighili munde, sa akala bamaha nde mu ekaana, nde sa akpa.”

24 Ya Mibighili myehene, obaana Samwele ya myehene mi mígyi na mbihi a nde, míbili mu mi mitala bitsughu bi.

25 Be, be lili baana ba mibighili ya baana ba ogwihini ku ósi Nzaami ya bataara ba be na ályele nde kundaa Abarahame ti: “Me sa nseme bikaana byehene bibi na yulu a nsie mu nzili a musyi a dzumu li we”.

26 Nsomo, mu be Nzaami átehebe musala a nde, wu átswama ogweghe nde mu oseme be, mu kuulu mbwuru-mbwuru mu be asihi bigyighili bi nde bi bibi.»

4

Piere ya Dzã ña nkulu a mfwunu a ekwuru

¹ Piere ya Dzã báli nkini mu okabili kundaa baara, ña ógyi bangaa ba nzaami, mfumu a bankyele ba nzo a nzaami ya ba-Saduseyẽ.

² Bo báli a nkehe mu kuulu Piere ya Dzã bákalu baara ya bákalyele ti bwunu a bu ósighili Yiisu ña kara li ba bákpi, obo si baara ba bákpi akala baasighili mu lipfu.

³ Bo básyimi Piere ya Dzã ya bálo bo mu boloko tee mbala, buulu áli ayi nkonkolo.

⁴ Lo mu ba bákagyughu ndagha, balagha áli baasi kana. Ya mutala a bo áli ku bele a mapfwunu-mataana (5 000).

⁵ Mbala, bamfumu ba ba-Dzwife, bakwuru ya baluo-mikyene bábvuñunu ku Yerusaleme.

⁶ Mu bo óli a Ane mukwuru a bangaa ba nzaami, Kayife, Dzã, Alekandere ya baara bwohono baba musyi a dzumu li bamfumu ba bangaa ba nzaami.

⁷ Bo bágyi a Piere ya Dzã ña nkulu a bo ya báf wulu bo ti: «Mu lileene li nande bwunu we mu nk wumu a nande be liigyighili ndagha yi?»

⁸ Me mu obo, Piere wu áalwulu mu Mufulu a Ngili, ályele kundaa bo ti:

⁹ «Bamfumu ba ekaana ya bakwuru, lolo li bali mu ofwulu bihi mu nkooro a bubwe bu liisi bihi kundaa mbwuru nga a epfwumu, ya bunu-a-bo nde aabvwughu.

¹⁰ Be bwohono ya ekaana kyehene kii Isaraye, liigyighili osoolo yo ti, me mu nk wumu a Yiisu-Kriste wu a ku Nadzarete, wu liikomo be ña kuruwa ya wu oosiili Nzaami ña kara li ba bákpi,

me mu nde wu aatemene ɲa nkulu a be wu ali nsiili.»

¹¹ Me Yiisu li:

«Limeẽ liili be bantwu manzo, liitsaala,
Lo, lo ayi limeẽ lili ngughu ɲa mutswunu.»

¹² «Obvwughu ka oli mu mbwuru mukimi o, mu kuulu ka oli a nkwumu nkimi o ɲa yulu a nsie yi bágwi kundaa baara, yiili mu yo bihi libvwughu.»

¹³ Bo bu bamono kana li Piere ya Dzã, bákiɲimi, mu kuulu bo bábaghala ti baara ba ka báli a mupfunu o, bo ka bágyighi o. Bo básoolo ti bo ba bákakala emõ ya Yiisu.

¹⁴ Lo bo bu bamono baghala wu adzughu átemene ɲa bele a bo, bákuono a yi baalyele kundaa Piere ya Dzã.

¹⁵ Oɲo bo bágwi litumu bapaha bo ɲa kara li ekwuru ki ba-Dzwife, ya bo-a-bo básyili mu okuru mfwunu,

¹⁶ bákalyele ti: «Emakye liisa mu baara ba? Buulu baara bwohono baba mu Yerusaleme basoolo mu nganɲa elyimi ki baagyighili bo, ya bihi ka likughu obihi kye o.

¹⁷ Lo mu osa kuulu ndagha yi yinyaã ot-saɲama ku olagha ɲa kara li baara, litswe litswa bo mukele mu ebaghala, banyaã ofiribili mu nkwumu oyo kundaa mbwuru si mumõ.»

¹⁸ Bu bati bo mbili, bátswi bo mukele mu ebaghala mu onyaã ofiribili ya ofiriluo mu nkwumu a Yiisu.

¹⁹ Piere ya Dzã bábvuhulu kundaa bo ti: «Lilamana beme: Nsa ndagha yili bunsumu ɲa mihi mi Nzaami, osa litumu li be, bwunu we osa litumu li Nzaami?

²⁰ Bihi, ka lileene okuru miŋma mu mandagha ma liimono ya ma liigyughu o.»

²¹ Bo báfirinaana bo ya bányaã bo. Bo ka bábagha nzili yi baasyeme bo o, mu nkooro a baara. Mu kuulu baara bwohono bákasyighi Nzaami mu ndagha yi áabwi.

²² Baghala munde wu áadzughu mu elyimi kii okiŋimi ekye, áli aluru bamvulu makwumu-mana (40).

Osamana ku banga-a-kana

²³ Bu banyaã bo, Piere ya Dzã bágyene kun-daa baba ndaa bo ya bátwoho bo mandagha mwohono ma ólyele bo bamfumu ba bangaa ba nzaami ya ekwuru ki ba-Dzwife.

²⁴ Boho si, bu bamana ogyughu, bágwihini mu bitsimi bimõ, bábuono Nzaami mu likyi lili mpini ya bályele ti: «Mfumu, we wu áagyighili yulu, nsie ya mubu, ya bilogho byehene bi bili omo,

²⁵ me we áalyele mu Mufulu a Ngili mu muŋma a taara a bihi Dabvide, musala a we.» Nde ályele ti:

«Mu emakye mansie mali kunsa yaŋã-yaŋã, ya bikaana bili mu osa mamfwunu ma magwene a mupfunu?

²⁶ Mikogho mi nsie mili yeelee mu odzwana mvulu, ya bamfumu baatemene mu emõ mu odzwana a Mfumu ya mu odzwana a Kriste a nde.»

²⁷ «Mu enganma, Erode ya Ponse Pilate baabvununu mu bvulu li. Ya emõ ya baala ka bali ba-Dzwife o, ya ekaana kii Isarayelee, bo baabvununu

mu odzwana a musala a we wu a ngili Yiisu, wu ámaana we.

²⁸ Bo baasi ti myehene mi ótswama otsyiri kwogho ya bitsimi bi we mikeele.

²⁹ Ya mu matala ma Mfumu, mono minjaana mu bihi, ya gwa basala ba we kana lwohono mu otsala nsia a ndagha a we.

³⁰ Labala kwogho e we mpaala baara badzughu ya bilyimi ya mandagha maa okinjimi bimonjono mu nkwumu a Yiisu, musala a we wu a ngili.»

³¹ Bu bamana osamana Nzaami, ebini ki bábvununu bo ényinjĩ. Nzaami áluhu bo bwohono mu Mufulu a Ngili ya bo bábwí otsala nsia a ndagha a Nzaami ya kana.

Banga-a-kana babvughu emõ bi bali a bye

³² Mpwumu a ba bási kana yíli mukolo mumõ ya muwumunu mumõ. Ka óli a mbwuru wu áakalyele ti bilogho bi nde bibi ndaa ndeme o, byehene bi báli a bo bíli bibi ebvughu.

³³ Mu lileene li linene, bantumu bákasa esala kii bumpughulu mu osighili o Mfumu Yiisu mu lipfu, ya bwehe bu bunene búli ña yulu a bo bwohono.

³⁴ Ña kara li bo, ka óli a mbwuru wu áakagwene a elogho o. Mu kuulu, bo bwohono ba báli a manseghe bwunu-we manzo, bákatyeghe mo, bákagya a nzi yi a bi bákatyeghe,

³⁵ ya bákawulu yo ña nkulu a bantumu. Ya bákakaba kunda nswe mbwuru-mbwuru bwunu a bu oli nzala a nde.

³⁶ Dzidzefe mu-Lebvite wu a bvulu lili Syipere, wu ókata bantumu «Baranabase», mbaala ti, «wu aakagwa bukyini»,

³⁷ átyeghe nseghe yi áli a yo ya áyagwa nzi yi ábagha kundaa bantumu.

5

Ananyase ya Safira

¹ Lo baghala mumõ, wu a nkwumu Ananyase, emõ ya Safira mukala a nde, bátyeghe ndaama a nsie a bo.

² Nde ágwihini ya mukala a nde mu osweghe ndaama a nzi mu yi bábagha bo, ábiri ndaama yi ásyili ya ágwi yo kundaa bantumu.

³ Piere ályele kundaa nde ti: «Ananyase, mu emakye we aanyaã Satana asomo mu mukolo a we, mpaala we pfiri Mufulu a Ngili ya we sweghe ndaama a nzi yi a aatyeghe we ndaama a nsie?»

⁴ Nsomo we tyeghe ndaama a nsie yo yiili yi a ndaa we. Nā aatyeghe we yo, we aali a bumpoholo mu osalala nzi a we bu dzyi. Bu bunu-a-bo we aabagha bitsimi bi bibi bi? We ka aapfiri baara o, lo Nzaami we aapfiri.»

⁵ Ananyase bu agyughu ndagha oyo, ábwi ya ákpi. Bo bwohono ba bágyughu ndagha oyo bábagha nzalamweẽ yi alagha .

⁶ Bampala bu batemene, bádzyi ebyimi, bábiri kye mu oyidzyighi.

⁷ Nā mbihi-a-bele a matala matere, mukala a Ananyase áyasomo omo, gwene osoolo ndagha yi áabwi.

⁸ Piere áfwulu nde ti: «Lyele me, yi me nzi yi liityeghe be ndaama a nsie?» Nde ábvuhulu ti: «Eẽ, me yo!»

⁹ Piere ályele kundaa nde ti: «Bunu-abo be likughu ogwihini mu otsihi Mufulu a Mfumu?»

Gyughu, ba baafi ku odzyighi mulumu a we ayi
ɲa munma a nzo, ya bo bali mu obiri wehe si!»

¹⁰ Naana oɲo, nde ábwi ɲa myili mi Piere ya ákpi.
Bampala bu basomo, bámono nde ákpi, bábiri nde
mu oyidzyighi nde ɲa bele a mulumu a nde.

¹¹ Libwunu li Nzaami lwohono ya bo bwohono
ba bágyughu mandagha mamo bábagha nza-
lamweē yi alagha.

Bantum bas mandagha malagha maa okinimi

¹² Bantum bákasa bilyimi ya mandagha maa
okinimi malagha ɲa kara li baara. Banga-a-kana
bwohono bu bagwihini, bo bákabvununu ɲa eluru
e nzo a nzaami ki baakata ti kii Salomō.

¹³ Mu baara baala nkini ali ka bási kana o, ka
óli a mbwuru si mumō wu áabagha bukyini mu
osomo mu kaba li banga-a-kana o, ngu okala ti
baara bákabili bubwe mu bo.

¹⁴ Lo ɲa yulu oɲo, mampwumu ma babaghala
ya mama bakaha ba bákasa kana mu Mfumu
mákapfina.

¹⁵ Baara bákapaha babyele mu minsagha, ya
bákalaha bo ɲa yulu a bikala ya ɲa yulu a malaba,
mpaala ɲa ooluru Piere, edzyimi-a-dzyimi e nde
ebuluberene a si mumō mu bo.

¹⁶ Mampwumu ma baara mákafa mu mabvulu
ma mábehene ya Yerusaleme, mákayabiri babyele
ya ba báli a mifulu mi mibi. Ya bo bwohono
bákadzughu.

Bamwehē bantum kimini

¹⁷ Mfumu a bangaa ba nzaami ya ba báli emō ya
nde, kaba li ba-Saduseyē bátemene mu ogyighili
ndagha. Bo áli balwulu mu musogho.

¹⁸ Bo básyimi bantumu ya bálo bo mu boloko lili baara bwohono.

¹⁹ Lo mu mpyibi, ngye-yulu a Mfumu ádzubulu bidzughubu bi boloko, ápaha bo ku mbala ya ályele kundaa bo ti:

²⁰ «Ligye, ya bu litemene munsa nzo a nzaami, liluo baara mandagha mwohono mama bumweẽ bu bunyaghara ba.»

²¹ Bo bu bagyughu obo, epala-epala básomo mu nzo a nzaami ya bábwi oluo.

Mu obo, mfumu a bangaa ba nzaami ya babo ba báli ya nde, báti ekwuru ki ba-Dzwife mbili ya mfwunu a baana ba Isaraye, ya bágweghe baara ku boloko mu oyigwolo bantumu.

²² Lo basala bu bayito ku boloko, bo ka bámono bo omo o, ya bu bayabvughuru, bátwoho nsia,

²³ ya bályele ti: «Bihi liiyibagha boloko li bággyighili okuru, ya bankyele ba baatemene ña bidzughubu bi lo. Lo bu lidzubulu lo, bihi ka liimono si mbwuru mu kara o.»

²⁴ Mfumu a bankyele ba nzo a nzaami ya bamfumu ba bangaa ba nzaami, bu bagyughu ndagha oyo, bákínjimi ku olagha ya bábwi obili ti yi nsa ndagha?

²⁵ Mbwuru mumõ áyalyele kundaa bo ti: «Ligyughu! Baara ba liilo be mu boloko bali munsa nzo a nzaami ya bali mu okaluo baara.»

²⁶ Mu obo, mfumu a bankyele ba nzo a nzaami ágyene, emõ ya bambumbulu ba nde, mu oyigwolo bantumu. Báybiri bo, lo ka mu mpini o, buulu bo báli a nzalamweẽ a baara, mfangolo bakaha bo mameẽ.

²⁷ Bu bayabiri bo, bálamana bo ña nkulu a ekwuru ki ba-Dzwife. Mfumu a bangaa ba nzaami ábwi ogwa bo bifwulu,

²⁸ nde ályele kundaa bo ti: «Bihi ka liitswi be mikele mu onyaã ofiriluo mu nkwumu yi o? Ya limono, be liiluhu Yerusaleme mu maluo ma be ya be lidzyi otwulu lipfu li mbwuru munde ña yulu a mitswi mi bihi!»

²⁹ Piere ya bantum babake bábvuhulu ti: «Bihi lifaana osa litumu li Nzaami, lo ka lili baara o.

³⁰ Nzaami a bataara ba bihi aasiili Yiisu wu liidzwi be, bu liikomo nde ña yulu a muti.

³¹ Nzaami aaseene nde mu lileene li nde, mpaala akala Mfumu ya Mubvwuhu, mu kuulu baara ba Isarayelee bagyiñi mayele, ya babagha kolokolo a masumu ma bo.

³² Ya bihi lili bampughulu mu mandagha mamo, bihi ya Mufulu a Ngili wu oogwi Nzaami kundaa babo ba baakasa litumu li nde.»

³³ Ekwuru ki ba-Dzwife bu egyughu mandagha mamo, kye élwulu mu nkehe ya ésagha odzwa bantum.

³⁴ Lo mumõ mu ba-Faridzyë, nkwumu a nde Ngamalyele, muluo mikyene wu ookagwa baara bwohono budziri, bu atemene ña kara li ekwuru, áluomo ti bapaha bantum ku mbala mu mana matala,

³⁵ ya nde ályele kundaa bo ti: «Baara ba Isarayelee, lisa mayele mu ma lidzyi be ogyighili kundaa baara ba!

³⁶ Buulu, ka oli edzighi o, mbwuru wu a nkwumu Tewudase aayapala. Nde aakamonono ti nde mbwuru wu bvulu mupfunu, ya mutala a

baara ba baakanama nde ali ku bele a nkama-na (400). Lo mu matala ma baadzwi nde, baara bwohono ba baakanama nde baatsanama ya emvununu ekye eekpi.

³⁷ Na mbihi a nde, Yuda musi Ngalile, aayamonono mu bitsughu bibi osono mankwumu mu osoolo mutala a baara. Baara balagha baakanama nde. Lo ndehe si aakpi, ya baara bwohono ba baakanama nde baatsanama.

³⁸ Mu matala ma, me ndyele kundaa be ti: Ka linama mandagha ma baara ba o, ya linyaã bo bagye. Mu kuulu, kala ti ndagha yi ya esala ki kundaa baara biifi, lo sa bidzimini.

³⁹ Lo kala ti bye kundaa Nzaami biifi, be ka likughu odzihibi bye o. Ka lisagha odzwana ya Nzaami o!» Emvununu ki ekwuru ki ba-Dzwife égyughu Ngamalyele.

⁴⁰ Bu bati bantum mbili, bákubu bo nswanswa ya báligi bo mu ofiribili mu nkwumu a Yiisu, ya bányaã bo.

⁴¹ Bantum bámara ña nkulu a ekwuru ki ba-Dzwife, bágyene mu esee, buulu Nzaami ámono ti bo áli bakughu mu omono mpara mu nkooro nkwumu a Yiisu,

⁴² ya nswe etsughu mu nzo a nzaami ya munsa manzo, bo bákalu Nsia yi Mbwe yi a Yiisu-Kriste, ku ogwene okolo.

6

Baswolo babaghala nsaama mu obaha bantum

¹ Mu bitsughu bibye, mutala a binduono ápfini ku olagha. Ba-Dzwife ba bákabili ndinji yi a ba-Ngereke bábwi onjũunu mu ba-Dzwife baba mu Isarayeke ba bákamenene bapfiili ba bo ba bakaha mu matala ma bákakaba bi-odza bibi nswe et-sughu.

² Bantumu kwumu ya buolo (12) bábvughu mpwumu a binduono yohono, ya bályele kundaa bo ndiri: «Ka oli bubwe o ti bihi linyaã okaluo ndagha a Nzaami mu osala esala kii okakaba bi-odza.

³ Mu obo baana ba taara, liswolo ŋa kara li be babaghala nsaama ba bali a bumpughulu bu bubwe, ba bálwulu mu Mufulu ya bunsughu, bihi sa ligwa bo esala ekye.

⁴ Lo bihi sa lisa mukama mu okabuono ya mu okasala esala kii oluo mandagha ma Nzaami.»

⁵ Mpwumu a baara yohono yíkihi etsimi ekye. Básuolo Etiene, baghala wu áli a kana ya álwulu mu Mufulu a Ngili, Filipe, Porokore, Nikanore, Timõ, Paremenase ya Nikola munde wu a ku Antyose, wu áasomo Nzaami a ba-Dzwife.

⁶ Bágyi a bo ŋa nkulu a bantumu. Bantumu básamana mu bo ya bánaŋa bo myaã.

⁷ Ndagha a Nzaami yíkavulu otsanama, ya mutala a binduono ákapfini ku olagha ku Yerusaleme, ya mpwumu a bangaa ba nzaami yi nene yíkasa kana mu Yíisu.

Basyimi Etiene

⁸ Etiene áli alwulu mu bwehe ya mu lileene. Nde ákasa mandagha maa okinimi ya bilyimi bii okinimi ŋa kara li baara.

⁹ Ndaama a baara baba nzo a lisamana a ba-Dzwife yi baakata ti Nzo a bankana ba bali bunya-nyaã, baba ku Sirene, baba ku Aledzandiri ya baba ku Silisi lili Adzi, bábwí osa munsoho ya Etiene.

¹⁰ Lo bo ka bákakughu otemene o ña nkulu a mandagha mama bunsughu ma ókagwa nde Mufulu mu obili.

¹¹ Mu obo, bo bágwi baara nzi mpaala balyele ti: «Bihi liigyughu nde mu okatswagha Moyidze ya Nzaami.»

¹² Bo bátyihi baara, bakwuru ba babaghala ya baluo-mikyene. Bo bu bayato, básyimi Etiene ya babiri nde ña nkulu a Mfwunu a ekwuru ki ba-Dzwife.

¹³ Bo bátehebe bampughulu baba mpya ba bályele ti: «Baghala wu ka li mu okakolo o mu okalyele bubi mu ebini kii ngili [ki] ya mu mikyene mi Moyidze.

¹⁴ Bihi liigyughu nde mu okalyele ti Yiisu wu, wu a ku Nadzarete sa atsala ebini ki ya sa osobo ekulu ki ósihi bihi Moyidze.»

¹⁵ Bo bwohono ba bábwí-nsini mu Mfwunu a ekwuru, bu batuunu nde mihi, bámono edzili ki Etiene éli ti anga kii ngye-yulu.

7

Etiene bili

¹ Mfumu a bangaa ba nzaami áfwulu Etiene ti: «Mandagha mamó mali mama nganma?»

² Etiene ábvuhulu ti: «Baana ba taara a me ya bataara ba me, ligyughu! Nzaami wu a nsia

ámoŋono kundaa Abarahame taara a bihi, ŋa áli ku Medzopotami, nsomo nde ayikala ku Arane.

³ Ya nde ályele kundaa Abarahame ti: “Pala mu nsie a we, sihi dzumu li we, ya gye ku nsie oyo yi akala aansuo me we”.

⁴ Mu obo, nde ápala mu nsie yi a Bakaledē*, átwu ku Arane. Ŋa mbihi a lipfu li taara a nde, Nzaami ábiri nde ku nsie oyo, mu lili mu okakala be mu matala ma.

⁵ Nzaami ka ágwi nde pfa si limō mu nsie yi o, si ebini kii otwulu bitaama o, lo ásiini a nde mu ogwa nde nsie yi, ya musyi a dzumu li nde mpaala yikala pfa li bo. Mu matala mamo, Abarahame nkini ka áli a mwana o.

⁶ Nzaami ályele kundaa nde ndiri: “Musyi a dzumu li we sa ayikala mu nsie yi bunzyi, oko sa bakirili bo bankana ya sa bamwehē bo kimini mu nkama-na (400) yi mibvu”.

⁷ Nzaami áfirilyele ti: “Me, me sa ndamana ekaana ekye ki eekirili bo bankana. Ŋa mbihi oŋo, bo sa bapala, ya sa bakabuono me ŋa ebini ki”.

⁸ Nzaami áti endughu ya nde mu elyimi ki ásohobo nde nzo a mbaa†, ya mu matala ma áburu nde Idzake, nde ásohobo nde nzo a mbaa mu etsughu kii mpuomo, ya Idzake ási bumō kundaa Dzakobe, ya Dzakobe kundaa bankagha-kwuru kwumu ya buolo (12).»

⁹ «Bankagha-kwuru bámono Dzidzefe mukolo mubi, ya bátyeghe nde kundaa baara, ya baara babo bábiri nde ku Edzipite. Lo Nzaami áli ya nde.

* **7:4 7.4** Ekaana ki ebvulu a baara mu nsie yi a Babilone. † **7:8 7.8** ásohobo nde nzo a mbaa baatsyiri nde musuru.

¹⁰ Nzaami ákwulu Dzidzefe mu mpara a nde yohono, ya ágwi nde bwehe ya bunsughu ɲa nkulu a Faraõ, mukogho a Edzipite, wu áatwulu nde mfumu wu munene mu Edzipite, ya mu nzo a nde yohono.

¹¹ Munzyala ásomo mu Edzipite yohono ya mu Kaana. Mpara yíli yilagha, ya bataara ba bihi ka báfirikabagha bi-odza o.

¹² Dzakobe bu agyughu ti ku Edzipite óli a bele, nde ágweghe bataara ba bihi mu mukubu wu a nsomo.

¹³ Mu mukubu wu a myele, Dzidzefe ásuo nyuru kundaa banaana ba nde, ya Faraõ ásoolo dzumu li nde.

¹⁴ Dzidzefe ágweghe bayigwolo taara a nde Dzakobe ya dzumu li nde lwohono. Bo báli baara makwumu-nsaama ya bataana (75).

¹⁵ Dzakobe ákumunu ku Edzipite, ákpi oko, bumõ si ya bataara ba bihi.

¹⁶ Bábiri miwehe mi bo ku bula bubu Sisyeme ya bádzighi mye mu mpyeme yi óswumu Abarahame mu nzi kundaa baana ba Emore ku Sisyeme.»

¹⁷ «Buulu matala ma ookeele misiini mi ósi Nzaami kundaa Abarahame máyabehene, ekaana e bihi épfini ya éburunu mu Edzipite,

¹⁸ tee mu matala ma óbyala mukogho mukimi [mu Edzipite] wuulu ka ásoolo Dzidzefe o.

¹⁹ Mukogho munde ápfiri ekaana e bihi, ámwehẽ bataara ba bihi kimini. Nde átu mu mpini bakatsili baana babo ba babwihi, mu kuulu banyaã obaɲa.

²⁰ Me mu ena ekye báburu Moyidze, nde áli

mubwe ṇa mihi mi Nzaami. Bátsyaha nde mu bangoono batere mu nzo a taara a nde.

²¹ Ya bu batsili nde, mwana a Faraõ wu mukaha átolo nde, ya ákwuhu nde ti anga mwana wu áburu ndeme.

²² Moyidze ágyighi maluo mama bunsughu bwohonon mama basi Edzipite. Ya áli a lileene mu mbiili ya mu bigyighili bi nde.

²³ Ṇa ákuhu nde bamvulu makwumu-mana (40), nde ábagha bitsimi mu oyimono baana ba taara a nde, baana ba Isaraye.

²⁴ Nde ámonon musi Edzipite wu áakamwehẽ mumõ mu basi Isaraye mpapa. Nde ábaha ya ákala musi Isaraye ya ádzwi musi Edzipite.

²⁵ Nde ákatsimi ti baana ba taara a nde sa babaghala ti mu nde Nzaami aabvwuhu bo. Lo bo ka bábaghala o.

²⁶ Ṇa mbihi a etsughu ekye, Moyidze áyimono baara buolo ba bákadzwana. Nde ásagha obvurulu egyeẽ ya edzuunu ṇa kara li bo ya ályele kundaa bo ti: “Mu emakye be lili mu okasa bubi be a be? Buta be lili baana ba taara mumõ!”

²⁷ Munde wu ákamwehẽ nganda mpapa ábihi ogyughu Moyidze ya ályele kundaa nde ti: “Nande aatwulu we mfumu ya nsughu-a-lamana mu bihi?”

²⁸ We me dzyi odzwa ti bu aadzwi we musi Edzipite matsighi?”

²⁹ Moyidze bu agyughu ndagha oyo, ábara ya áyikala ku nsie yi a Madyane, oko nde áburu baana buolo ba babaghala.»

³⁰ «Mibvu makwumu-mana (40) bu mikughu, ngye-yulu ámononon kundaa nde munsa mule a

mbaa wu eti-ti, ku syehe lili munguo wu a Sinayi.

³¹ Moyidze ákinjimi mu mandagha ma ámono nde, ya bu ayabehene mpaala agyighili otala, nde ágyughu likyi li Mfumu li lílyele kundaa nde ti:

³² “Me ndi Nzaami a bataara ba we, Nzaami a Abarahame, Idzake ya Dzakobe”. Kunsá enkwughu, Moyidze ka áleene otala o.

³³ Ya Mfumu ályele kundaa nde ti: “Maha mapaapa mu myili mi we, mu kuulu ebini ki aatemene we, eli ebini kii ngili.

³⁴ Me aamono kimini li ekaana e me ku Edzipite, me aangyughu misyama mi bo. Ya me aankumunu mu okwulu bo. Mu matala ma, gye, me ngweghe we ku Edzipite”».

³⁵ «Wu me Moyidze wu bábihi bo ña áli bályele ti: “Nande aatwulu we mfumu ya nsughu-alamana?” Lo me nde Nzaami ágweghe ti mfumu ya mukwulu. Nzaami átumu nde mu nzili a ngye-yulu wu ámonono kundaa nde mu eti-ti.

³⁶ Me nde áapaha bo mu nsie yi a Edzipite mu mandagha mama okinjimi ya bilyimi, ña Mubu wu a Bie ya ku syehe, mu mibvu makwumu-mana (40).

³⁷ Me nde, Moyidze áalyele kundaa baana ba Isaraye ti: “Nzaami sa apaha mu nkooro a be, ña kara li baana ba taara a be, mubighili mumõ ti anga me”.

³⁸ Mu matala ma óli emvununu ku syehe, me nde áli aatemene mu okagyughu ya bataara ba bihi mi ókalyele ngye-yulu ku yulu a munguo wu a Sinayi. Nde ágyagha mandagha mama bumweẽ mu ogwa mo kundaa bihi.

³⁹ Lo bataara ba bihi ka bákihi osa litumu li nde o, bo bábihi nde ya mikolo mi bo míbvughuru ku Edzipite.

⁴⁰ Bo bályele kundaa Aarō ti: “Gyighili bihi banzaami ba baadzyara ŋa nkulu a bihi mu kuulu bihi ka lisoolo o bu oobwana Moyidze wu, nde wu aapaha bihi mu nsie yi a Edzipite”.

⁴¹ Mu bitsughu bibye bo bátsulu etyeghe mu efaana kii pulu li ngoomo. Ya bádzwi nyama mu ogwa mukaba kundaa kye ya bási kyiri mu nkooro a etyeghe ekye ki ótsulu myaã mi bo.

⁴² Nzaami átyeghe bo mbihi ya ányaã bo bakasamana mikaã mimi mayulu[‡], bwunu a bu básono mu mukaana a mibighili ti:

“Nzo a Isarayeleye, mu mibvu makwumu-mana (40), kundaa me be líigwi banyama ya mikaba ku syehe?

⁴³ Be líibiri ebvulu e Molokeye,
ya ŋomaŋomo a Rayifã, nzaami a be,
bityeghe bibye bi lígyighili be mu okasamana bye.
Mu obo, me sa mbiri be ku bunkana ku mbihi a Babilone”.

⁴⁴ «Ku syehe, bataara ba bihi báli a ebvulu kii bumpughulu baa ogwihini, bwunu a bu ótumu munde wu áabili kundaa Moyidze, ti agyighili ebvulu mu efaana ki ásuu kundaa nde.

⁴⁵ Bataara ba bihi bu bakihi kye, básohobo kye mu litumu li Dzodzuwe mu nsie yi ógwi bo Nzaami, ŋa mbihi a ŋa ábyi nde bikaana bibye ŋa mihi mi bo, tee mu matala ma Dabvide.

[‡] 7:42 7.42 mikaã mimi mayulu me baŋomaŋomo, ngoono ya tala.

46 Nde ábagha bwehe ña busu bu Nzaami ya áluomo muswa wu obagha nzo yi a nzaami a Dzakobe.

47 Lo me Salomõ áatwu nzo a nzaami.

48 Lo Wu Ensoõ-yulu ka aakakala mu manzo ma ótwu myaã mi baara o.» Obo me bu ólyele mubighili ti:

49 «Yulu lili likubu li me,
ya nsie yili nkara a myili mi me.
Nki nzo be liitwu me, bu olyele Mfumu,
ya ña nki ebini me akala aangwumu?

50 Bunu, ka oli myaã mi me mĩgyighili bilogho byehene bibye o?»

51 «Be lili baara banga a mutswi-mpini, banga a mikolo ngyi ya matswi-nkyihi. Mu matala mwohonon, be liikabihi Mufulu a Ngili, be lili ti anga bataara ba be!

52 Nki mubighili bataara ba be bágwene omwehẽ kimini? Bo bádzwi ba bátswama oyatwoho nsia a ogya o Wu-a-Nsumu, munde wu liityeghe ya liidzwi be mu matala ma.

53 Be ba lígyagha Mikyene mu nzili a bangye-yulu, lo be ka liikasalala mye o.»

Lipfu li Etiene

54 Baara ba mfwunu a ekwuru ki ba-Dzwife bu bagyughu mandagha mamu, bo bábagha nkehe yi alagha ya bákadza myini mu nkooro a nde.

55 Lo Etiene bu áli wu aalwulu mu Mufulu a Ngili, ákala ku yulu ya ámonu bunkiri bu Nzaami ya Yiisu mu mukiri ña ngo-kwogho e Nzaami.

56 Nde ályele ti: «Ligyughu! Me ndi mu okamono mayulu bwaha, ya Mwana a mbwuru átemene ña ngo-kwogho e Nzaami.»

⁵⁷ Bo bákehe bingubu bi binene, bákyi matswi ma bo, ya mu envughu bo bwohono bágyighiri mu nyuru a Etiene.

⁵⁸ Bo bápaha nde mu bvulu ya bádzwi nde mu mameẽ. Ya bampughulu básuhu binkuru bi bo ɲa myili mi mumpala mumõ, nkwwumu a nde Sawule.

⁵⁹ Mu matala ma bákakaha nde mameẽ, Etiene ákabuono bu: «Mfumu Yiisu, gyagha mufulu a me!»

⁶⁰ Ya bu akunu mabuo ɲa nsie, nde ákehe engubu ti: «Mfumu, Mfumu, sa bo kolokolo mu lisumu li!» Bu alyele obo, ewumu ésughu ya nde ákpi.

8

Sawule mwehẽ Libwunu kimini

¹ Sawule áli mumõ mu babo ba bámono ti lipfu li Etiene ndagha yi mbwe. Mu etsughu kyini ekye, bámwehẽ Libwunu li Nzaami lili Yerusaleme kimini li lilagha. Ya bo bwohono ba báli mu Libwunu li Nzaami bátsanama, bágyene ku Yude ya ku Samari. Yini a bantum baasyili mu Yerusaleme.

² Lo baara banga-a-enzaami kii enganma bádzyighi Etiene ya bálili nde ku olagha.

³ Ya Sawule ákabulutsala Libwunu li nzaami, nde ákabulusomo mu manzo, ákabulusyimi babaghala ya bakaha, ya ákayilo bo mu boloko.

Filipe tsala Nsia yi Mbwe mu etsulu e nsie kii Samari

⁴ Babo ba bátsanama bákabulutsala Nsia yi Mbwe yi a ndagha a Nzaami omo mwohono mu bákabulubara bo.

⁵ Obo me buulu, Filipe ákumunu mu bvulu limõ lili mu Samari, nde ábwi otsala nsia a Kriste.

⁶ Emõ, mampwumu ma baara mákatyeghe matswi mu mandagha ma ókaluo Filipe, ña bákagyughu ya bákamono bo bilyimi bii okinjimi bi ákasa nde.

⁷ Mu enganma, mifulu mi mibi milagha mi mĩli mu baara, mĩkapala mu okabulukehe mingili. Balagha ba ókpi binama ya banga-a-bipfwumu mu myili bákadzughu.

⁸ Mu obo, baara baba mu bvulu lilo, báli kunsá esee ki elagha.

⁹ Ankoho, áli oli a baghala mumõ mu bvulu lili Samari, nkwumu a nde Simõ. Nde átswama okakala munsá bvulu lilo. Nde áli ngaa-ampaana, ya baara baba mu Samari bákakinjimi mu mi ákagyighili nde. Ya ndeme ákatsimi ti nde mbwuru wu munene.

¹⁰ Ya baara bwohono, obaana bakwuru tee bike-bike, bákasa kana mu nde, ya bákalyele ti: «Baghala wu me lileene li Nzaami, li baakalyele ti “Lileene li Linene”.»

¹¹ Ya bo bákasa kana mu nde, mu kuulu mana edzighi, nde ákabulugyighili mandagha maa okinjimi mu mpaana a nde.

¹² Lo bu basí kana mu Filipe wu ákaluo Nsia yi Mbwe yi a empu e Nzaami ya nkwumu a Yĩisu-Kriste, babaghala ya bakaha bákakihi oboghoró.

¹³ Simõ ndeme si ási kana ya báboghoró nde. Nde ákanama Filipe ya ákinjimi, bu ákabulumono bilyimi ya bimaã bii okinjimi bi ókabulusa Filipe.

Piere ya Dzã mu etsulu e nsie kii Samari

¹⁴ Bantumumu ba básyili ku Yerusaleme bu bagyughu ti basi Samari baakihi ndagha a Nzaami, bágweghe Piere ya Dzã kundaa bo.

¹⁵ Bu bato oko, básamana mu basi Samari mpaala bagyagha Mufulu a Ngili.

¹⁶ Mu enganma, Mufulu a Ngili nkini ali ka ámaabwa mu mbwuru si mumõ mu bo o, yini a oboghoru báboghoru bo mu nkwumu a Mfumu Yiisu.

¹⁷ Onjo, Piere ya Dzã bánaã bo myaã ña yulu a mitswi, ya bo bággyagha Mufulu a Ngili.

¹⁸ Simõ bu amono ti bantumumu bákagwa Mufulu mu onaã myaã ña yulu a mutswi, nde ágwi bo nzi,

¹⁹ ya ályele ti: «Ligwa mehe si lileene lilo, mpaala nswe munde wu aanãa me myaã ña yulu a mutswi, nde agyagha Mufulu a Ngili.»

²⁰ Lo Piere ályele kundaa nde ti: «Nyaã we ya nzi a we lipfighili! Mu kuulu we aatsimi ti we kughu oswumu mu nzi ekaba ki ookagwa Nzaami ku o bwunu.

²¹ Mu ogyighili otala, we ka li wu a kaba li bihi o, ya we ka li a pfa mu esala ki o. Mu kuulu mukolo a we ka li nsumu ña nkulu a Nzaami o.

²² Mu obo, gyinji mayele mu bubi bu we, ya samana Mfumu, nkini-a-nki bakughu osa we kolokolo mu bitsimi bi biigyi we ña mukolo.

²³ Mu enganma, me ndi mu omono ti we li a bubi bubu nkala mu mukolo, ya we li nkana a masumu.»

²⁴ Simõ ábvuhulu ti: «Be beme lisamana Mfumu mu nkooro a me, mpaala mandagha ma liilyele be manyaã obwa mu me.»

²⁵ Piere ya Dzã, bu bamana osuo bumpughulu bu Mfumu ya otsala nsia a ndagha a Nde, bábvughuru ku Yerusaleme. Mu nzili, bo bákabulutsala Nsia yi Mbwe mu mala malagha mu Samari.

Filipe ya musala wu a ku Etyopi

²⁶ Ngye-yulu a Mfumu ályele kundaa Filipe ti: «Temene, ya gye ku nkolo yi a ku Sude, mu nzili yi aakamara ku Yerusaleme ya yiikakumunu ku Ngadza. Baara ka baafirikaluru mu nzili oyo o.»

²⁷ Bu atemene, nde ágyene. Ankoho, baghala mumõ wu bágwogholo, wu a ku Etyopi, musala wu munene wu a Kandase, mfumu a busini bwohono bu ngasa a basi Etyopi, áli agyi ku Yerusaleme mu oyabuono Nzaami.

²⁸ Nde áli ayi mu okabvughuru. Nde ábwi-nsini munsá syare* li nde, mu okabulutaã mukaana a mubighili Edzayi.

²⁹ Mufulu a Ngili ályele kundaa Filipe ti: «Gye yibagha syare lilo.»

³⁰ Bu abara ntyini tee oño, Filipe ágyughu nde mu okataã mukaana a mubighili Edzayi, ya nde áfwulu nde ti: «Bunu, we li mu okabaghala mi li mu okataã we?»

³¹ Nde ábvuhulu ti: «Bunu-abo me aambaghala kala ti mbwuru ka gwi me mbaala a mo o?» Ya nde ályele Filipe akumu ya abwa-nsini ña bele a nde.

³² Etsulu e ndagha a Nzaami ki ákabulutaã nde me ki:
«Nde áli ti endoomo ki bali mu okabiri ku ebini ki baakadzwa bibuolo,

* 8:28 8.28 syare

ya ti anga mwana a endoomo wu gwene a likyi,
ṇa nkulu a wu li mu okakye nde mfu,
nde ka aadzubulu muṇma o!

³³ Kunsa okughulu o nde, baasi nde muyala,
nde ka aabagha bwuu o,
nande akala aabili mu eseene e nde?

Mu kuulu baamaha laama li nde ṇa nsie.»

³⁴ Musala wu munene wu a Etyopi munde, áfwulu
Filipe ti: «Kolokolo a we, lyele me, mubighili mu
na ali mu okabili obo? Mu ndeme bwunu we mu
mbwuru mukimi?»

³⁵ Mu obo, Filipe ábaana mu mi básono mu
Mukaana wu a Ngili, áluo nde Nsia yi Mbwe yi
a Yiisu.

³⁶ Bu bákagye mu nzili, báto ṇa mbughu yi áali a
madza, ya Musala wu munene wu a Etyopi ályele
ti: «Mono madza moṇo! Emakye eekahaba me mu
obagha liboghoru?» [

³⁷ Filipe ályele kundaa nde ti: «Kala ti we si kana
mu mukolo a we ndehene, we kughu obagha
liboghoru». Musala wu munene ábvuhulu ti: «Me
ndi a kana ti Yiisu-Kriste li mwana a Nzaami.»]

³⁸ Nde átehebe syare, bo bansa buolo básughuru
mu madza, ya Filipe áboghoru nde.

³⁹ Bu bapala mu madza, Mufulu a Mfumu ábulubiri
Filipe ya musala wu munene wu a Etyopi ka
áfirimono nde o. Lo nde ánama bula bu nzili a nde
mu esee.

⁴⁰ Filipe áyipala ku Adzote mu okabulutsala Nsia
yi Mbwe mu mabvulu mwohonon ma áluru nde, tee
bu áyito nde ku Sedzare.

9

Sawule gyinji mayele

¹ Mu matala mamu, Sawule wu áakajaana odzwa binduono bi Mfumu, áyiluomo kundaa mfumu a bangaa ba nzaami,

² mikaana mimi manzo mama lisamana ma ba-Dzwife mama mu bvulu lili Damase. Oko, kala ti nde mono baara ba baakanama nzili a Mfumu, babaghala bwunu we bakaha, nde akuru bo minkana, ya ayabiri bo ku Yerusaleme.

³ Bu ákagye mu nzili, nde ábehene ya bvulu lili Damase. Ensihibi, otsyeme ku ófi ku yulu óbwi mu nde ya odzyi nde.

⁴ Nde ábwi ña nsie, ágyughu likyi li líkalyele nde ti: «Sawule, Sawule, mu emakye we li mu okamwehẽ me kimini?»

⁵ Nde áfwulu ti: «Mfumu, we nande?» Likyi líbvuhulu ti: «Me ndi Yiisu, ngu me we li mu okamwehẽ kimini.

⁶ Lo temene, somo munsa bvulu, ya sa balyele we mandagha mafaana we ogyighili.»

⁷ Baara ba bákadzye ya nde, bátemene ya bákwno otsughu ndagha mu nzalamweẽ. Bo bákagyughu likyi, lo ka bákamono wu áakabili o.

⁸ Sawule átemene ya ádzubulu mihi, lo nde ka áfirikamono elogho si emõ o. Baara ba bákagye ya nde, bákwará nde mu kwogho ya básohobo nde mu bvulu lili Damase.

⁹ Oko nde ási bitsughu bitere biili nde omono we, odza we ya oñma we.

¹⁰ Ku Damase óli a enduono etsyini, nkwumu a nde Ananyase. Mu limono Nzaami áti nde

mbili: «Ananyase!» Nde ábvuhulu ti: «Mfumu, me ndindi!»

¹¹ Mfumu ályele kundaa nde ti: «Gye mu munsagha wu baakata ti Wu a Nsumu, ya fwulu munsá nzo a Yuda, baghala wu a nkwumu Sawule musi Tarese. Nde li omo mu okasamana,

¹² ya mu bantaala, nde aamono baghala mutsyini, nkwumu a nde Ananyase wu áasomo mu nzo ya wu áanaã nde myaã ña yulu mutswi mpaala nde afirimono.»

¹³ Ananyase ábvuhulu ti: «Mfumu, me áakangyughu baara balagha mu okabili mu baghala munde ya mu bubi bwohono bu aakasa nde kundaa baba ngili ba we mu Yerusaleme.

¹⁴ Ya bamfumu ba bangaa ba nzaami ágwi nde litumu lili osyimi baara bwohono ba baakasamana we.»

¹⁵ Lo Mfumu ályele ti: «Gye kundaa mbwuru munde, mu kuulu nde li elwee ki aansuolo mu oyitsala Nsia a Nkwumu a me kundaa bikaana bibi gwene osoolo me, kundaa mikogho ya kundaa basi Isaraye.

¹⁶ Me, meme sa nsuo nde mpara yi afaana omono nde mu nkooro a nkwumu a me.»

¹⁷ Ananyase ágyene, ásomo munsá nzo. Ya bu anaã nde myaã ña yulu a mutswi, ályele kundaa nde ti: «Sawule, mwana a taara a me, Mfumu gweghe me, Yiisu munde wu aamonono kundaa we mu nzili yi aakagya we, mu kuulu we firimono ya we lwulu mu Mufulu a Ngili.»

¹⁸ Ñaana onjo, bilogho bi bifaana ti anga makala ma nswi bíkogholo mu mihi mi nde ya nde ábaana ofirimono. Nde átemene ya bábogho nde.

¹⁹ Ya bu amana odza, Sawule ábagha mpini mu nyuru.

Sawule tsala Nsia yi Mbwe ku Damase

Sawule áluhu mana bitsughu ya binduono bi Mfumu ku Damase.

²⁰ Naana onjo, nde ábwi okabululuo mu manzo mama lisamana ma ba-Dzwife ti: Yiisu li Mwana a Nzaami.

²¹ Baara bwohono ba bákagyughu nde bákakiñimi ya bákalyele ti: «Ka oli nde wu áakamwehë ba baakasamana mu nkwumu a Yiisu kimini ku Yerusaleme o? Ya nde ka aagyi kunu mu osyimi bo ya obiri bo mu binkana kundaa bamfumu ba bangaa ba nzaami o?»

²² Lo Sawule ákagwama ku oluru, ba-Dzwife baba ku Damase ka bákabagha yi baabili ña nkulu a nde o, ya nde ákasuo ti Yiisu me Kriste.

²³ Bitsughu bilagha bu biluru, ba-Dzwife bákuru mfwunu yi odzwa nde.

²⁴ Mpyibi ya mwĩ, bo bákakebe mu miñma mi ekagha kii bvulu kuulu badzwa nde. Lo Sawule ágyahaba mfwunu a bo.

²⁵ Mu obo, mu mpyibi, binduono bi Sawule, bílo nde mu nkuru ya bísurulu nde ku ngulu a ekagha kii bvulu.

Sawule ku Yerusaleme

²⁶ Bu ato ku Yerusaleme, Sawule ásagha osomo mu kaba lili binduono, lo bo bwohono báli a nzalamweë a nde, ya ka bákasa kana o ti nde áli ayi enduono.

²⁷ Baranabase ábiri nde kundaa bantumu ya ályele bo bu óbwana a Sawule Mfumu mu nzili a

Damase, ya bu ábili nde kundaa Sawule. Ya bunu-a-bo, obaana ku Damase, nde ákabili ya kana lwohono mu nkwumu a Yiisu.

²⁸ Obaana matala mamo, Sawule ákabulugye mu bibini byehene ya bo mu Yerusaleme, ya ákabulubili mu nkwumu a Mfumu ya kana.

²⁹ Nde ákabili ya ákatsoho ya ba-Dzwife ba baakabili Engereke. Lo bo bákasagha odzwa nde.

³⁰ Bandughu mu kana bu basoolo ndagha oyo, bábiri nde ku Sedzare, ya oko bo bágweghe nde ku Tarese.

³¹ Libwunu líli kunsá edzuunu mu bitsulu bi nsie byehene bibi Yude, Ngalile ya Samari. Mu libaha li Mufulu a Ngili, lo líkakulu mu mufulu, líkadzyara kunsá budziri bu Mfumu ya líkakulu mu mutala a baara.

Piere dzuhu Ene

³² Obo me buulu Piere, wu áakabuludzie mu bitsulu byehene, ákumunu si kundaa baba ngili ba báli mu bula bubu Lida.

³³ Nde ámono baghala mutsyini wu óneñene* binama. Baghala munde ágyonomo ña yulu a ekala mu mibvu mpuomo. Nkwumu a nde Ene.

³⁴ Piere ályele kundaa nde ti: «Ene, Yiisu-Kriste aadzuhu we. Temene, ya fughuru ekala e we weme!» Mu likpa lyini lilo, nde ásaatemene.

³⁵ Baara bwohono baba mu Lida ya baba ku elehe kii Syarone bu bamono obo, bo bási kana mu Mfumu.

Osighili o Dorokase mu lipfu

* **9:33 9.33** óneñene obobo bwunu we okpa.

³⁶ Mu bvulu lili Yope, óli a enduono kii mukaha. Nkwumu a nde Tabita, mu Engereke «*Dorokase*», mbaala ti, «nsa». Nde ákagyighili mi mibwe ya ákabaha bawele.

³⁷ Mu bitsughu bibye, nde ábyele ya ákpi. Bu baswagha ebyimi e nde, báytwulu kye mu ngwumu a nzo yi a ku yulu.

³⁸ Buulu Lida áli libehene ya Yope, binduono bigyughu ti Piere áli oño, bigweghe babaghala buolo mu oyibinini nde ya bíbuono nde ti: «Sa maswa, gya kundaa bihi!»

³⁹ Mu maswa Piere ágyene ya bo. Bu ato oko, bo bákuhubu nde ku ngwumu a nzo yi a ku yulu. Bapfiili bwohono ba bakaha bátemene ña nkulu a nde ya bábuulu elili, bákasuo nde binkuru bi bila ya binkuru bi baakalaha ña yulu bi ókatwu bo Dorokase ña aali nde mweẽ.

⁴⁰ Piere ápaha baara bwohono ku mbala, ya bu akunu mabuo mu nsie, nde ábwi osamana. Ña mbihi, nde ákaghala ku óli ebyimi ya ályele ti: «Tabita, temene!» Tabita ádzubulu mihi, ya bu amono Piere, nde ásigihili ábwi-nsini.

⁴¹ Piere ákwara nde mu kwogho ya átehebe nde. Ña nseele, nde áti baba ngili ya bapfiili mbili ya nde ásuu bo Dorokase wu a mweẽ.

⁴² Yope lwohono lígyughu ndagha oyo ya baara balagha bási kana mu Mfumu.

⁴³ Piere áluhu bitsughu bilagha ku Yope, mu nzo a Simō, wu áakasa esala ki okagyighili bibaana bi banyama.

10

Koroneye tumu Piere agya

¹ Ku bvulu lili Sedzare óli a baghala mutsyini, nkwumu a nde Koroneye, mfumu a mpwumu a bambumbulu nkama (100), yi baakata ti «mpwumu yi a Itali».

² Nde áli mbwuru wu bunsumu ña nkulu a Nzaami ya ákagwa nde budziri, emõ ya baara ba nzo a nde bwohono. Nde ákabaha bawele ba ba-Dzwife ku olagha ya ákasamana Nzaami matala mwohono.

³ Etsughu nga-emõ, mu tala lili matere ña mbihi a embehe, nde ágyighili omono mu limono ngye-yulu a Nzaami wu áyasomo mu nzo a nde ya wu áati nde mbili ti: «Koroneye!»

⁴ Koroneye bu atala nde ku edzili, ábagha nzalamweẽ ya ábvuhulu nde ndiri: «Mfumu! Nki ndagha?» Ngye-yulu ályele kundaa nde ti: «Nsamana a we ya bikaba bi aakagwa we kundaa bawele, biito kundaa Nzaami, ya nde aalibili mweẽ mu we.

⁵ Mu matala ma, gweghe bambinini ku Yope, buulu bayabiri we Simõ wuulu nkwumu yi obili* Piere.

⁶ Nde li mu nzo a Simõ mukimi, munde wu áakasa esala ki okagyighili bibaana bi banyama ya aakakala ku mukogho a mubu.»

⁷ Mu matala ma ógyene ngye-yulu wu ákabili ya nde, Koroneye áti basala ba nzo a nde buolo mbili ya mbumbulu mumõ wu áali a enzaami kii nganma, wuulu edzighi ákasala kunsu litumu li nde.

⁸ Ya bu alyele bo mandagha mwohono ma ábwana a nde, nde ágweghe bo ku Yope.

* **10:5 10.5** *nkwumu yi obili* Nkwumu yi bumpala

⁹ Na mbihi a etsughu ekye, ɲaala bo nkini ali mu okanama bula bu nzili a bo, bo bábehene ya bvulu, ya ku bele a matala mama embehe, Piere ákumu ku yulu a see li nzo lili eyala[†] mu oyisamana.

¹⁰ Lo nzala bu yifuru nde, nde ásagha bi-odza. Mu matala ma bákanaã nde bi-odza, nde ábagha limono.

¹¹ Nde ámono yulu bwaha: Elogho etsyini ékayakumunu. Kye éli ti anga mupa a eko wu munene wu bákware mu manto mansa mana wu áyabwa ɲa nsie.

¹² Na yulu a nde óli a banyama baba mawamawa: Banyama baba myili mina, ba baakagye mu etulu ya banjini.

¹³ Ya likyi lílyele kundaa nde ti: «Piere, temene, dzwa ya dza!»

¹⁴ Piere ábvuhulu ti: «Mfumu! Si kala ka bunu! Mu bumweë bu me, me nkini ámaandza elogho kii nyara ya ki bási ngili o.»

¹⁵ Likyi líbili kundaa nde mu sa lili ywolo ti: «Bi ootsehebe Nzaami, we, we ka kughu olyele ti bye bili bibi nyara o!»

¹⁶ Ndagha oyo yímonono kundaa nde mansa matere, ya ɲa nseele, elogho ekye ésaabvughuru ku yulu.

¹⁷ Piere ndeme ákasagha obaghala ndagha oyo yi ámono nde, lo nde ka ákakughu o. Mu matala maana mamo, baara ba ógweghe Koroneye, ba

[†] **10:9 10.9** *see li nzo lili eyala see li nzo li batwu mu ebagha kii eyala. Ku yulu a see lilo baara bákabwa nsini mu okamono, mu okasamana ya mu okagwolo mpie mu nkonkolo.*

bákabulufwulu ku oli nzo a Simō, báyato ɲa muɲma a nzo a nde.

¹⁸ Bo báti nde mbili ya báfwulu kala ti Simō wu baakata ti Piere áli munsa nzo oyo.

¹⁹ Piere áli nkini mu okatsimi ndagha yi aa-mono nde, ya Mufulu a Ngili ályele kundaa nde ti: «Oli a babaghala batere ku ba bali mu okasagha we.

²⁰ Mu obo, kumunu lili, bvughu nzili ya bo ku ogwene a okeɲe, mu kuulu, me aangweghe bo.»

²¹ Piere ákumunu, ábvununu ya baara babo. Nde ályele kundaa bo ti: «Me ndindi. Mbwuru wu lili mu okasagha be ngu me. Mu nki ndagha be liiyatala me?»

²² Bo bábvuhulu ti: «Koroneye, mfumu a mpwumu a bambumbulu nkama (100), mbwuru wu a bunsumu, wu aakagwa Nzaami budziri ya wuulu ba-Dzwife bwohono bali a bumpughulu bu bubwe mu nde, aangweghe bihi. Ngye-yulu wu a ngili aasuo kundaa nde ti nde ali faana ota we mbili ku nzo a nde mpaala agyughu mandagha ma aalyele we.»

²³ Oɲo Piere ágwi bo ebini kii ogyoɲomo.

Na mbihi a etsughu ekye, nde ágyene ya bo nzili mo. Ndaama a baara ba bakanama nde mu Yope bágyene ya nde.

²⁴ Etsughu etsyini kii byele, bo báyito ku Sedzare. Koroneye wu áakakebe bo, áli ayi áti baara ba dzumu li nde ya bandughu ba nde mbili.

²⁵ Mu matala ma óyito Piere, Koroneye áyibwana a nde ya ákunu mabuo ɲa nsie a myili mi nde mu ogwa nde mboro yi a budziri.

²⁶ Lo Piere átehebe nde ya ályele ti: «Temene! Buta mehe si yini a mbwuru ndi.»

²⁷ Nde ásomo munsá nzo mu okabulubili ya nde. Omo, nde ámono baara balagha ba bábvununu,

²⁸ ya nde ályele kundaa bo ti: «Be ligyighili osoolo ti mu mikyene mi ba-Dzwife, mu-Dzwife ka li a muswa wu osa endughu ya munzyi bwunu we ogyagha nde mu nzo a nde o. Lo kundaa me, Nzaami aayasuo me ti ka lifaana omono ti mbwuru wu li a nyara bwunu we nde aatsumunu ngili.

²⁹ Me mu obo, we bu aatumu me ngya, me aangyi kwono ku makeŋe osa. Lo mu bu, me ndzyi osoolo mu nki ndagha be liitumu me ngya.»

³⁰ Koroneye ágwi nde mvuru yi: «Bitsughu yini a bitere bimaaluru, mu tala lili matere ŋa mbihi a embehe, me aakansamana Nzaami munsá nzo a me. Ensihibi, mbwuru mutsyini wu áalaha binkuru bi bíkasehene, áyamoŋono ŋa nkulu a me,

³¹ ya ályele kundaa me ti: «Koroneye! Nzaami aagyughu osamana o we ya nde ka aadzimini bikaba bi aakagwa we kundaa baweŋe nsimi o.

³² Me mu obo, gweghe bambiŋini ku Yope mpaala bayabiri we Simō wuulu nkwumu yi obili Piere. Nde li mu okakala mu nzo a Simō wu aakasala esala ki okagyighili bibaana bi banyama ya aakakala ku mukogho a mubu.»

³³ Mu maswa, me aangweghe bambiŋini bayagwolo we, ya we aasi bubwe mu ogya kundaa bihi. Mu matala ma, bihi bwohono lili ŋa nkulu a Nzaami mu ogyughu mandagha ma oolyele we

Mfumu mu oyatwoho kundaa bihi.»

Piere tsala Nsia yi Mbwe munsa nzo a Koroneye

³⁴ Mu obo, Piere átsughu ndagha ya ályele ti: «Mu enganma, me aambaghala ti Nzaami ka li a munkabala o,

³⁵ ya ti mu bikaana byehene, nde aakak-
ihi nswe munde wu aakagwa nde budziri ya
aakasalala bunsumu bu nde.

³⁶ Nde ágweghe Ndagha a nde kundaa basi
Isaraye, Nsia yi Mbwe yi a edzuunu mu Yiisu-
Kriste, wu li Mfumu a baara bwohono.

³⁷ Be lisoolo ndagha yi aabwi, nsomo ku Ngalile,
ña nseele mu Yude lwohono, ña mbihi a li-
boghoro li ókaluo Dzã.

³⁸ Be lisoolo bunu-a-bo Nzaami ásughu lileene li
Mufulu a Ngili mu Yiisu wu a ku Nadzarete. Nde
aakabulusa bubwe omo mwohono mu ákaluru
nde, nde ákadzuhu bwohono ba ósi dyabulu
kunsa bunkana, mu kuulu Nzaami áli ya nde.

³⁹ Ya bihi ba lili bampughulu mu esala e nde
kyehene mu etsulu e nsie ki ba-Dzwife ya ku
Yerusaleme. Munde wu baadzwi bo mu obañana
ña yulu a kuruwa.

⁴⁰ Lo Nzaami aasiili nde ña kara li ba bákpi
mu etsughu kii bitere, ya aagwi nde muswa mu
omonono

⁴¹ kundaa bampughulu ba ótswama osuolo Nza-
ami, kundaa bihi ba liikadza ya liikanma ya nde,
ña mbihi a osighili o nde ña kara li ba bákpi. Lo
ka kundaa baara bwohono o.

⁴² Nde aagwi bihi litumu mu otsala nsia kundaa
baara ya mu okala bampughulu ba ndagha yi: Me

nde Nzaami aasuolo mu okala nsughu-a-lamana a baara baba mweẽ ya ba bákpí.

⁴³ Me mu nde mibighili myehene míkabili ti: Nswe munde wu aasa kana mu nde, mu nkwumu a nde, sa abagha kolokolo a masumu ma nde.»

Mufulu a Ngili sughuru mu bikaana bibike

⁴⁴ Piere áli nkini mu okabili, Mufulu a Ngili ábwi ña yulu a bo bwohono ba bákagyughu ndagha a Nzaami.

⁴⁵ Ba-Dzwife ba bákasa kana ba bánama Piere, bákinjimi mu omono ti ekaba ki Mufulu a Ngili ki oogwi Nzaami, eetsanama tee kundaa bikaana bibi banzyi.

⁴⁶ Mu kuulu, bo bákagyughu baara ba mu okabili mu mandini ma bagwene osoolo bo ya okasyighi bunene bu Nzaami. Piere áfirilyele ti:

⁴⁷ «Baara ba baagyagha Mufulu a Ngili ti anga bihi-a-be, mbwuru kughu okahaba ti ka baboghoró bo mu madza o?»

⁴⁸ Nde ágwi litumu ti baboghoró bo mu nkwumu a Yiisu-Kriste. Ya bo báluomo kundaa nde afiriluhu mana bitsughu ya bo.

11

Piere ña nkulu a Libwunu lili ku Yerusaleme

¹ Bantumú ya bandughu mu kana ba báli ku Yude báyaghu ti baara baala ka bali ba-Dzwife o, baakihi si Ndagha a Nzaami.

² Piere bu akumu ku Yerusaleme, ba-Dzwife ba bási kana mu Yiisu báyakumunu nde

³ ya bályele kundaa nde ti: «We aasomo mu nzo a ba bágwene osomo nzo a mbaa, ya we aali ya bo!»

⁴ Obo me buulu Piere ásuó bo mandagha mwohonó, bwunu a bu máluru:

⁵ «Ŋa aandi me mu bvulu lili Yope, mu matala ma aakansamana me, me ámbagha limono, me áamono elogho éfi ku yulu ya ékayakumunu tee kundaa me. Kye éli ti anga mupa a eko wu munene wu bákwará mu manto mansa mana.

⁶ Me bu aangyili okehene kye, me aamono banyama ba nsie baba myili mina, banyama baba musuru, ba baakagye mu etulu ya ba baaka-punumu mu yulu.

⁷ Ya me áangyughu likyi li lílyele kundaa me ti: “Piere temene, dzwa ya dza!”

⁸ Me áambvuhulu ti: “Pele Mfumu! Si kala ka bunu. Mu kuulu mu bumweé bu me, elogho kii nyara ya ki bási ngili nkini ka émaasomo mu munma a me o.”

⁹ Mu mukubu wu a buolo, likyi lífiribili ku yulu ti: “Elogho ki oosi Nzaami kii tse-tse, we ka lyele o ti kye eli kii nyara!”

¹⁰ Ndagha oyo yímonono kundaa me mu mansa matere. Ŋa mbihi onjo, elogho ekye ébvughuru ku yulu.

¹¹ Mu matala maana mamo, babaghala batere ba báfi ku Sedzare mu oyagwolo me, báyato ŋa nzo yi líli bihi.

¹² Mufulu a Ngili ályele me bu: “Gye ya bo, ka keŋe o.” Bandughu mu kana basemene ba baagyi ya me ŋa áli bagyene ya me. Ya bihi bwohonó líisomo mu nzo a Koroneye.

¹³ Nde ályele me bu ámono nde ngye-yulu wu áyamonono munsa nzo a nde ya ályele nde ti: “Gweghe bambinini ku Yope mpaala bayabiri Simō wu baakata ti Piere.

¹⁴ Nde sa alyele we mandagha ma maabvwuhu we ya nzo a we yohono.”

¹⁵ Me bu mbaana obili, Mufulu a Ngili ásughuru ŋa yulu a bo ti bu ásughuru nde ŋa yulu a bihi mu ebaana.

¹⁶ Onjo, me ándibili-mweē mu ndagha yi ali olyele Mfumu ti: “Dzā áboghoro mu madza, lo be, be sa baboghoro be mu Mufulu a Ngili.”

¹⁷ Kala ti Nzaami aagwi baara ba ekaba emō kyini-ekye ki ágwi kundaa bihi, ŋa lísi bihi kana mu Mfumu Yiisu-Kriste, lo me na, buulu me ali nkahaba dzyi li Nzaami?»

¹⁸ Bu bagyughu mandagha mamō, mikolo mi bo myehene mǐdzuunu ya bo básyighi Nzaami ti: «Mu enganma Nzaami aagwi si kundaa bikaana biili ka bili ba-Dzwife o bwehe buu ogyinji mayele ya obagha bumweē.»

Libwunu lili ku Antyose

¹⁹ Ŋa mbihi a lipfu li Etienne, bábwi omwehē banga-a-kana mu Kriste kimini. Mu obo, bo bátsanama manto ya manto. Bo bágyene tee ku Fenisi, ku Syipere ya ku Antyose. Lo bo bákabululuo Ndagha a Nzaami yini a kundaa ba-Dzwife.

²⁰ Ankoho, baara babake ŋa kara li bo, basi Syipere ya basi Sirene, bu bato ku Antyose, bábwi okatsala si Nsia yi Mbwe yi a Mfumu Yiisu kundaa baara ba baakabili ndinji yi a Engereke.

²¹ Kwogho e Mfumu éli ya bo, ya mutala a baara ba bákasa kana mu Mfumu ya ba bákagyinjí mayele ákapfíni ku olagha.

²² Nsia oyo yító kundaa Libwunu li Nzaami lili ku Yerusaleme, ya bo bágweghe Baranabase ku Antyose.

²³ Nde bu ato ya bu amono bwehe bu Nzaami, ámono esee ki elagha, ya nde ágwi bo bwohonó bukyini ya ályele bo banama Mfumu mu mukolo mumõ.

²⁴ Baranabase áli mbwuru wu mubwe, wu áalwulu mu Mufulu a Ngili ya mu kana. Me mu obo baara balagha bási kana mu Mfumu.

²⁵ Na mbihi, Baranabase ágyene ku Tarese mu oyisagha Sawule.

²⁶ Bu amono nde, áyabiri nde ku Antyose. Bo bansa buolo báluhu mubvu mumõ ya Libwunu li Nzaami mu okaluo mpwumu a baara yi alagha. Me ku Antyose mu sa lili nsomo báti binduono mu nkwumu yi a bakriste.

²⁷ Mu bitsughu bibye, mibighili mífi ku Yerusaleme ya míkumunu ku Antyose.

²⁸ Mu lileene li Mufulu a Ngili, mumõ mu bo wu a nkwumu Angabuse, átemene ya ályele ti munzyala sa agya mu nsie nsyini. Ya munzyala munde ágyi mu matala ma óli Kolode Mukogho.

²⁹ Mu obo, binduono bígwolo munkana wu ogweghe libaha kundaa bandughu mu kana ba báli ku Yude, bwunu a bu óli bupfulu bu nswe mbwuru.

³⁰ Bo bási obo, bágweghe bikaba bibye kundaa bakwuru. Bo bágwi bye na myaã mi Baranabase ya Sawule.

12

Piere pala mu boloko

¹ Mu matala mamo, mukogho Erode ábaana omwehẽ ndaama mu baara ba Libwunu li Nzaami kimini.

² Mu litumu li nde, bádzwi Dzake, naana a Dzã mu lipee.

³ Nde bu amono ti ndagha oyo yíkagwa ba-Dzwife esee, nde áfirigwa litumu basyimi Piere mu bitsughu bibi kyiri kii mampa ma magwene a pfini.

⁴ Bu basyimi ya balo nde mu boloko, Erode ási bikuru bina bibi bambumbulu bana-bana mu okakebe Piere. Dzyi li Erode áli ti nde asa Piere muyala ña mihi mi baara bwohonon ña mbihi a kyiri kii Paake.

⁵ Piere áli mu boloko, lo Libwunu li Nzaami líkasamana matala mwohonon mu nkooro a nde.

⁶ Mu mpyibi yi oto mu etsughu ki ókaasa Erode Piere muyala, Piere ágyonomo ensama ña kara li bambumbulu buolo. Bákuru nde misyi mimi bisyeẽ, ya bankyele ba boloko bátemene ña munma a nzo.

⁷ Lo ngye-yulu a Mfumu áyapala ya otsyeme kuu mpini ómonono munsa boloko. Nde ákaha Piere mu mbambaha a mbee, ásiili nde ya ályele ti: «Saana, temene!» Misiyi mimi bisyene mi bákuru nde míbwi.

⁸ Ngye-yulu ályele kundaa nde ti: «Kuru muswele a we mu bala ya kuru misyi mi ma-paapa* ma we!» Ngye-yulu áfiribwehe ti: «Laha enkuru e we ki ela kii kobo ya nama me.»

* 12:8 12.8 mapapa bikoghoron

⁹ Piere ápala ña mbihi a nde. Nde ka ákasoolo o ti mandagha ma ókasa ngye-yulu áli mama nganma. Nde bu ákatsimi ti lilo áli limono.

¹⁰ Bo báluru bankyele baba nsomo, ña mbihi baba buolo, ya báto ña munma a nzo wu a esyeñe wu aakapaha kunsu bvulu. Munma a nzo ádzubulu ndeme ña nkulu a bo. Bu bato ku mbala, bo bágyene ku nto a nkwulu, ya ensihibi, ngye-yulu ásihi Piere.

¹¹ Ono embwuru bu eyabvughuru Piere, nde ályele ti: «Mu matala ma me nsoolo mu enganma ti me Mfumu aagweghe ngye-yulu a nde mu kuulu akwulu me ña myaã mi Erode ya mu mandagha mwohonu ma ookeene ekaana ki ba-Dzwife osa mu me.»

¹² Bu abaghala ndagha oyo, nde ágyene ku nzo a Mari, ngughu a Dzã, wu baakata ti Mareke. Baara balagha áli babvuhunu omo mu okasamana.

¹³ Piere bu akoboro ña munma a nzo, musala mutsyini wu mutughu, nkwumu a nde Rode, ágyi mu oyagyuulu.

¹⁴ Nde bu agyughu likyi li Piere, mu esee, nde ka ádzubulu edzughubu e nzo o, lo nde ábara ya áyilyele kundaa bana ndiri, Piere li ña munma nzo.

¹⁵ Bo bályele kundaa nde ti: «We lala byele!» Lo nde ágyighili onyeme ti nganma, nde áli ña munma a nzo. Ya bo bábvuhulu ti: «Lo munde ngye-yulu a nde.»

¹⁶ Piere ási enziini mu okakoboro. Bo bákarayadzubulu, ya bákinjimi ku olagha mu omonu nde.

¹⁷ Nde ákahaba bo banyaã osa nkele, ályele kundaa bo bu oopaha nde Mfumu mu boloko

ya áfiribwehe bu: «Liyitwoho nsia kundaa Dzake ya kundaa bandughu mu kana babake.» Ya nde ámara oño, ágyene nto nkimi.

¹⁸ Bwihi bu buki, mpaatsala yíbwi ña kara li bambumbulu, bo bákabili bo-a-bo ti: «Bu Piere bunu aabwana?»

¹⁹ Erode ásagha ti bayabiri nde Piere, lo ka bámono nde o. Báfwulu bankyele ya bágwi litumu ti badzwa bo. Ña nseele, Erode ákumunu ku Yude, ágyene ku Sedzare ya áluhu mana bitsughu oko.

Lipfu li mukogho Erode

²⁰ Erode áli a nkehe yi alagha ya baara baba mabvulu mama Tire ya Sidō. Baara babo bágwihini mu oyimoñoño ña nkulu a nde. Bo bápeene a Balasito, musala a mukogho mu mi miikatala ngwumu a nde, bo baluomo edzu-unu kundaa Erode, mu kuulu mansie ma bo mákabagha bi-odza ku nsie a nde.

²¹ Etsughu ki bási lagha bu eto, Erode wu álaha enkuru e nde kii bukogho, ábwi-nsini ña ebini kii muyala ya ábwi obili mu likyi lili mpini kundaa bo ña nkulu a baara bwohono.

²² Baara bábwi ofulu miluolo ti: «Likyi li, likyi li nzaami, lo ka lili lili mbwuru o!»

²³ Ñaana oño, ngye-yulu a Mfumu ákaha Erode, mu kuulu nde ka ágwi nsia kundaa Nzaami o. Ya misere míli Erode, nde ákpi.

²⁴ Nsia a Ndagha a Nzaami yíkatsañama ya ba bákasa kana bákapfini.

²⁵ Lo Baranabase ya Sawule bu bamana esala e bo osa mu nkooro a baara baba Yerusaleme, bábvughuru. Bo bábiri Dzã wuulu nkwwumu yi obili Mareke.

13

Bagweghe Baranabase ya Sawule mu oyitsala Nsia yi Mbwe

¹ Mu Libwunu li Nzaami li líli ku Antyose, óli a mibighili ya miluo: Baranabase, Simeō wu baakata ti Ndoomo, Lusiyuse musí Sirene, Manahene wu bákwhu emō ya Erode, mfumu a etsulu e nsie, ya Sawule.

² Etsughu nga-emō, bo bu bákasamana Mfumu ya bákuru nswele mu bala, Mufulu a Ngili ályele kundaa bo ti: «Litwulu, mu nkooro a me, mu libee Baranabase ya Sawule mu esala ki ánti me bo mbili.»

³ Ono, bu bamana osamana ya okuru nswele mu bala, bo bánaã bo myaã ña yulu a mutswi ya bányaã bo bagye.

Baranabase ya Sawule ku elyi kii Syipere

⁴ Mufulu a Ngili bu agweghe bo, bo bákumunu ku bvulu lili Selesi ku bágwolo bo bwara bu bunene mu ogye ku elyi kii Syipere.

⁵ Bu bato ña bvulu lili Salamine, bo bátsala nsia a ndagha a Nzaami munsá manzo mama lisamana ma ba-Dzwife. Dzã-Mareke áli ya bo mu okabulubaha bo.

⁶ Bu bamana osaghaba elyi kyehene tee ku bvulu lili Pafose, bo bábwana a mu-Dzwife mumō nga-a-mpaana, mubighili wu a mpya, nkwumu a nde Bare-Yiisu.

⁷ Nde áli emō ya ba bali mpinji ya Serengyo Poole, mfumu a elyi, mbwuru nga-a-maye. Nde áti Baranabase ya Sawule mbili, mu kuulu nde áli a nzala a ogyughu ndagha a Nzaami.

⁸ Lo Elimase, nga-a-mpaana, mu kuulu oyo me mbaala a nkwumu a nde, ákasagha okahaba bo mu kuulu nde ka ákadzyi o ti mfumu Serengyo Poole asa kana mu ndagha a Nzaami.

⁹ Mu obo Sawule, wu bákata si ti Poole, wu áalwulu mu Mufulu a Ngili, átuunu Elimase mihi

¹⁰ ya ályele kundaa nde ti: «We aalwulu mu mpya ya mu mayele mama pfyibi, mwana a dyabulu, mutaara a bunsumu. We ka nyaã okagwini manzili ma Mfumu ma mali nsumu o?

¹¹ Mu matala ma, gyughu: Mfumu we àasyeme. We sa kala enkpa-mihi mu mana matala, we ka afirimono tala o.» Nãana oño libwi ya mpyibi yi a laña-laña bíbwi mu nde, ya nde ábwi okadzenene mu osagha mbwuru wu akwara nde mu kwogho ya osuo nde nzili.

¹² Mu matala ma ómono mfumu Serengyo mandagha ma mábwi, nde ási kana ya ákinjimi ku olagha mu maluo ma Mfumu.

Poole ya Baranabase ku Antyose lili mu etsulu e nsie kii Pisidi

¹³ Poole ya bandughu ba nde básomo bwara ña Pafose, bo bágyene ku bvulu lili Perenge mu etsulu e nsie kii Pamfili. Oko, Dzã-Mareke ákaghaba ya bo ya ábvughuru ku Yerusaleme.

¹⁴ Lo Poole ya Baranabase, bu bamara Perenge, bánama nzili a bo ya báto ku bvulu lili Antyose lili mu etsulu e nsie kii Pisidi. Mu etsughu kii sabate, bo básomo mu nzo a lisamana a ba-Dzwife ya bábwi nsini.

¹⁵ Bu bamana otaã mikaana mi Mikyene mi Moyidze ya mimi Mibighili, bamfumu ba nzo

a lisamana a ba-Dzwife bályele kundaa bo ti: «Bandughu mu kana, kala ti be lili a ndagha yi ogwa baara bukyini, lo libili mu matala ma!»

¹⁶ Poole bu atemene, áseene kwogho, ya ályele ti: «Basi Isarayelee, ya be babake ba liikagwa Nzaami budzirí, ligyughu me!

¹⁷ Nzaami a ekaana kii Isarayelee ásuolo bataara ba bihi. Nde ási ti ekaana epfini mu matala ma éli kye ku nsie a Edzipite. Ya nde ápaha kye omo mu lileene li kwogho e nde.

¹⁸ Mu mibvu ku bele a makwumu-mana (40), nde ábuṇunu bo*.

¹⁹ Na mbihi, nde bu amana odzwa baara baba mansie nsaama ba báli ku Kaana, nde ágwi bo mansie mamó ti pfa.

²⁰ Mandagha mwohonó mamó mágyili ku bele a bamvulu nkama na ya makwumu-mataana (450).»

«Na mbihi, Nzaami ágwi bataara ba bihi bansughu-a-lamana ba ekaana tee mu matala ma mubighili Samwele.

²¹ Na nseele, bo báluomo mukogho, ya Nzaami ágwi bo Sawule, mwana a Kise, mu dzumu li Benzamẽ. Nde átumu mu bamvulu makwumu-mana (40).

²² Ya Nzaami bu amaha nde, ábyaha Dabvide mu okala mukogho a bataara ba bihi. Me kundaa nde Nzaami ásuó bumpughulu ba: “Me aansuolo Dabvide, mwana a Yese, mbwuru wu li mu okadzyara bu ookadzyi mukolo a me. Nde sa agyighili mandagha mwohonó ma aangwaa me”.

* **13:18 13.18** *nde ábuṇunu bo* mu mikaana mi mike básonó ti nde áli a mukolo mu okala ya bo

²³ Me mu musyi a dzumu li nde, Nzaami ápaha Yiisu, Mubvwuhu a Isarayelee, ti bwunu a bu óli misiini mi nde.

²⁴ Nsomo Yiisu agya, Dzã ákata mukwughu kundaa basi Isarayelee bwohono mu obagha liboghoró lili ogyinji mayele.

²⁵ Ya mu matala ma ákagye nde ku omana esala, nde ályele ti: “Mu bitsimi bi be, me nande ndi? Pele, me ka ndi munde wu lili mu okakebe be o! Lo ligyughu, nde li mu ogya ku mbihi a me, me ka nkughu onyana misyi mi bikoghoró bi nde o”».

²⁶ «Bandughu ba me mu kana, baana ba musyi a dzumu li Abarahame, ya be ba lili ña kara li bihi ba baakagwa Nzaami budziri, me kundaa bihi-a-be bágweghe ndagha yi obvwughu yi.

²⁷ Mu enganma, baara ba Yerusaleme ya bamfumu ba bo ka baabaghala ti Yiisu nande ali o, bu baasi nde muyala, obo me bu baakuhu mandagha ma mibighili ma baakataã mu et-sughu kii sabate.

²⁸ Si buulu bo ka bábagha ebili kii odzwa nde o, lo bo báluomo kundaa Pilate ti badzwa nde.

²⁹ Bo bámana okuhu mandagha mwohono ma básono mu nde, básurulu nde ña kuruwa ya bátwulu nde munsa mpyeme.

³⁰ Lo Nzaami ásiili nde ña kara li ba bápki».

³¹ «Mu bitsughu bilagha, nde ákamonono kundaa babo ba bákumu ya nde obaana ku Ngálie tee ku Yerusaleme. Mu bu, bo bali bampughulu ba nde ña nkulu a baara.

³² Ya bihi, bihi lili mu oluo Nsia yi Mbwe oyo: Misiini mi bágwí kundaa bataara ba bihi,

³³ Nzaami aagyighili okuhu mye kundaa bihi, baana ba bo, mu matala ma aasiili nde Yiisu ɲa kara li ba bákpi, ti bwunu a bu básono mu Ekwumu kii byele ti:

“We li Mwana a me wu baghala,
Me me aamburu we, etsughu kii lolo”».

³⁴ «Nzaami ásiili nde ɲa kara li ba bákpi, mu kuulu anyaa obolo, obo me bu ályele nde ti:

“Me sa ngwa be bibi ngili
bi bafaana osa kana mu bye, bi ánsiini a me
Dabvide”».

³⁵ «Me mu obo, nde áfirilyele ɲa ebini ekimi ti:
“We ka nyaã Wu a ngili a we abolo o”».

³⁶ «Ankoho, mu eseene e nde, Dabvide ákasalala mandagha ma ókadzyi Nzaami. ɲa mbihi oɲo, nde ákpi, bádzyighi nde ɲa bele a bataara ba nde ya nde ábolo.

³⁷ Lo munde wu oosiili Nzaami mu lipfu, ka aabolo o.»

³⁸ «Bandughu mu kana, lisoolo ti, me mu nde baagwi be nsia a kolokolo a masumu ya mandagha mwohonon maala Mikyene mi Moyidze ka mísi be baba bunsumu o.

³⁹ Lo nswe munde wu aasa kana mu nde sa akala wu bunsumu.

⁴⁰ Mu obo, lisa mayele, mu kuulu mandagha ma ósono mibighili manyaa obwa mu be.»
Mandagha mamo me ma:

⁴¹ «Litala, be ba lili a ligwagha,
likinimi ya lidzimini!

Mu kuulu me sa ngyighili ndagha mu bitsughu bi
bumweẽ bu be,
ndagha yiili be ka likughu osa kana mu yo o, kala
ti mbwuru lyele be yo!»

⁴² Na ópala ba Poole ya Baranabase mu nzo a lisamana a ba-Dzwife, bábuono bo mu ofiriyabili mu mandagha maana mamo mu etsughu kii sabate kii yulu.

⁴³ Na mbihi a na bábvununu bo, ba-Dzwife balagha ya ba baakasamana Nzaami a bo bánama Poole ya Baranabase. Bo bákamono ya bo, ya bákagwa bo bukyini mu onabara bwehe bu Nzaami.

⁴⁴ Etsughu kii sabate bu eto, baara ba bvulu lwohono bábvununu mu ogyughu Ndagha a Mfumu.

⁴⁵ Ba-Dzwife bu bamono mpwumu a baara oyo, bálwulu mu musogho ya bábwí okaala mandagha ma ókaluo Poole embihi ya bákátughu nde.

⁴⁶ Poole ya Baranabase mu kana, bályele kundaa bo ti: «Kundaa be bákaatswama otuoho Ndagha a Nzaami! Mu kuulu be lili mu okabihi yo, ya lili mu okalamana beme ti, be ka likughu obagha laama lili mibvu ya mibvu o. Mu matala ma bihi sa ligye kundaa baala ka bali ba-Dzwife o.

⁴⁷ Mu kuulu, Mfumu aagwi bihi litumu ti: “Me aansuolo we mu okala otsyeme o mansie mwohono, mpaala we biri obvwughu tee ku osughu nsie.”»

⁴⁸ Baala ka bali ba-Dzwife o bu bagyughu mandagha mamo, bálwulu mu esee ya bábwí osyighi ndagha a Mfumu. Ya babo ba básuolo mu obagha laama lili mibvu ya mibvu bási kana.

⁴⁹ Ndagha a Mfumu yítsanjama mu etsulu e nsie kyehene.

⁵⁰ Lo ba-Dzwife bákatsiini bakaha baba budziri ba baakabuono Nzaami, ya baara baba mupfunu

mu bvulu lilo, basa ngirini. Bo bási obo mu kuulu bamwehẽ Poole ya Baranabase kimini, ya babyi bo mu nsie a bo.

⁵¹ Bo bu bakubulu lifufunu li myili mi bo, bágyene ku bvulu lili Ikonyome.

⁵² Lo binduono bibi mu Antyose bílwulu mu esee ya mu Mufulu a Ngili.

14

Poole ya Baranabase ku Ikonyome

¹ Ku Ikonyome, Poole ya Baranabase bágyene ku nzo a lisamana a ba-Dzwife. Oko, bo báluo Ndagha a Nzaami mu eteese kiili mpwumu a ba-Dzwife ya ba-Ngereke yi alagha yísi kana.

² Lo ba-Dzwife ba bábihi osa kana, bátsiini ba bagwene osoolo Nzaami mu osa bandughu mu kana bubi.

³ Lo, Poole ya Baranabase báluhu matala malagha oko. Bo bákabili ya kana mu mi mitala Mfumu. Mfumu ákagwa bo lileene lili ógyighili mandagha maa okinimi ya bilyimi. Obo me bu ákasuo nde ti, mandagha ma bákalyele bo mu mi mitala bwehe bu nde máli nganma.

⁴ Mpwumu a baara ba bvulu yíkaghaba mu mawa muolo: Ba bamo ku ngulu yi a ba-Dzwife, babake ku ngulu yi a bantumu.

⁵ Baara baala ka bali ba-Dzwife o ya ba-Dzwife, emō ya bamfumu ba bo, bábagha bitsimi bii omwehẽ Poole ya Baranabase kimini ya odzwa bo mu mameẽ.

⁶ Bo bu basoolo bitsimi bibye, bábara ku mabvulu mama Lisitere ya Derebe mu etsulu e nsie kii Likawoni, ya mu mala ma máli bitaataa bibye.

⁷ Oko si, bo bákatsala Nsia yi Mbwe.

Poole ya Baranabase mu bvulu lili Lisitere

⁸ Ku Lisitere óli a baghala mumõ wu ókpi myili, wu áabwi nsini. Epfwumu e nde ekye éli emburu-ngughu ya nde áli nkini ka ámaadzyara o.

⁹ Etsughu nga-emõ, nde ákagyughu Poole mu okabili. Poole bu atuunu nde mihi, ya bu amono ti nde áli a kana mu obvwughu,

¹⁰ nde ályele mu likyi lili mpini ti: «Temene nsumu mu myili mi we!» Nde ádzujumu, ya ábwi odzyara.

¹¹ Mampwumu ma baara bu mamono ndagha yi ógyighili Poole, mályele mu mpini mu ndiĩ yi a Likawoni ti: «Banzaami baakighiri baara ya baayasughuru kundaa bihi.»

¹² Bo bákata Baranabase mu nkwumu yi a Dzeese ya Poole mu nkwumu yi a Eremese, mu kuulu me Poole áakabili mu nkwumu a bo bansa buolo.

¹³ Nzo a lisamana yi a ngaa a nzaami a Dzeese yíli ku baakayasomo bvulu. Nde ágwolo balumu ba bangoomo ya álaha bo bibara bibi bifulu. Emõ ya mpwumu a baara, bo bákadzyi odzwa bo mu ogwa mukaba kundaa Poole ya Baranabase.

¹⁴ Lo bantummu Poole ya Baranabase bu bagyughu ndagha oyo, bákaghala binkuru bi bo, básomo mu ntyini ña kara li mpwumu mu okañaã

¹⁵ ya bákalyele ti: «Bandughu, be yi nsa ndagha lili mu okagyighili? Bihi si lili baara ti anga be! Nsia yi Mbwe yi lili mu okatsala bihi kundaa be, yili mu oluomo be lisihi mandagha ma magwene

a mupfunu ma, mu okaghala kundaa Nzaami wu a mweẽ wu aagyighili yulu, nsie, mubu, ya byehene bi bili omo.

¹⁶ Me nde wuulu mu biseene bi bíluru, ágwí muswa kundaa bikaana byehene bikagyighili bu bidzyi bye.

¹⁷ Lo, nde aakagyighili ma mabwe kundaa be, mu kuulu mu yulu, nde aakanohõ bamvulu ya aakagwa mando ma maakaburu be bimburu bi bilagha, mpaala be libagha bi-odza ya mikolo mi be milwulu mu esee.»

¹⁸ Lo, si mu mbiili a bo oyo, mu mpara Poole ya Baranabase báleene okahaba mpwumu a baara mu ogwa bo mukaba.

¹⁹ Ba-Dzwife ba báfi ku Antyose ya ku Ikonyome bu bágyi, bápeene a mpwumu a baara mu bitsimi bi bo. Bo bákaha Poole mameẽ, bákwole ya bápaha nde ku mbala a bvulu, mu kuulu, bo bátsimi ti nde ákpi.

²⁰ Lo binduono bu bibvununu, bídzyi Poole, nde átemene ya ábvughuru munsa bvulu. Na mbihi a etsughu ekye, nde ya Baranabase bágyene ku bvulu lili Derebe.

Poole ya Baranabase babvughuru ku Antyose lili Siri

²¹ Bu bamana otsala Nsia yi Mbwe munsa bvulu lili Derebe, ya bu babagha binduono bilagha omo, bo bábvughuru ku Lisitere, Ikonyome ya Antyose.

²² Poole ya Baranabase bákagwa binduono mpama ya bákaluomo bo bakala a mukama mu osa kana, ya bákalyele ti: «Bihi lifaana omono mpara yi alagha mu osomo mu Emfumu e Nzaami.»

²³ Mu nswe Libwunu, Poole ya Baranabase básuolo bakwuru. Bu bakuru nswele mu bala, básamana Nzaami ya bágwi bo ɲa myaã mi Mfumu munde wu básí bo kana.

²⁴ Na nseele, bo báluru mu etsulu e nsie kii Pisidi ya báto ku etsulu e nsie kii Pamfili,

²⁵ bátsala nsia a Ndagha a Nzaami ku Perenge, ya bákumunu ku bvulu lili Atali.

²⁶ Bu bamara oko, bo básomo bwara mu ogye ku Antyose, oko ku báluomo mu bo bwehe bu Nzaami, mu esala ki bákuhu bo ki.

²⁷ Bu bayato ku Antyose, bo bábvughu Libwunu ya bályele mandagha mwohonono ma ógyighili Nzaami mu bo, ya bu ádzubulu nde nzili a kana kundaa babo baala ka bali ba-Dzwife o.

²⁸ Bo báluhu matala ma malagha ya binduono.

15

Mumbanana mu nkooro a osohobo nzo a mbaa ku Antyose ya emvuɲunu ki Libwunu ku Yerusaleme

¹ Ndaama a baara baba ku Yude, bákumunu ku bvulu lili Antyose, bákalu Libwunu, ya bákalyele ti: «Kala ti ka basohobo be nzo a mbaa o, ti bwunu a bu ookatumu Mikyene mi Moyidze, be ka likughu obvwughu o.»*

² Poole ya Baranabase bábihi ogyughu baara babo ba bágwi, ya mumbanana wu a mpini ábwi ɲa kara li bo. Bo bákuru etsimi ti Poole, Baranabase ya mana a babaghala babake ba bágwi, bákumu ku Yerusaleme kundaa bantum

* 15:1 15.1 tala Lbv 12.3.

ya bakwuru ba Libwunu, mu mi mitala ndagha a mumbanana munde.

³ Libwunu lígwi bo bilogho bi baabiri. Bu baluru mu nsie yi a Fenisi ya yi a Samari, bo bákabululyele bunu-a-bo baala ka bali ba-Dzwife o bákagyiŋi mayele. Ya bandughu mu kana bwohono báli kunsá esee ki elagha.

⁴ Bo bu bato ku Yerusaleme, bandughu mukana bwohono, bantumú ya bakwuru bábwana a bo. Ya bo bágwi bo nsia a mandagha mwohono ma ókabulugyighili Nzaami mu bo.

⁵ Lo ndaama a baara ba báli mu emvuŋunu ki ba-Faridzyē nsomo basa kana, bátemene ya bályele ti: «Bafaana osohobo baala ka bali ba-Dzwife o nzo a mbaa ya otumu bo bakakebe Mikyene mi Moyidze».

⁶ Bantumú ya bakwuru bábvuŋunu mu otala ndagha oyo.

⁷ Buulu mumbanana áli ayi wu a mpini, Piere átemene ya ályele kundaa bo ti: «Bandughu ba me mu kana, be lisoolo ti edzighi Nzaami ásuolo me ŋa kara li be, mu kuulu me ntsala Nsia yi Mbwe kundaa baala ka bali ba-Dzwife o, mpaala bo basa kana.

⁸ Ya Nzaami wu gyahaba mikolo mi baara, li mpughulu a bo, bu aagwi Mufulu a Ngili kundaa bo ti bwunu a bu ágwi nde bihi,

⁹ ku ogwene osa lisoghobo ŋa kara li bo ya bihi-a-be. Nde aatsehebe mikolo mi bo mu kuulu bo baasi kana.

¹⁰ Mu matala ma, mu emakye be lidzyi otsihi Nzaami bu liikwighi binduono leme, liili ngu okala bataara ba bihi, ngu okala bihi bameme, ka

liibagha mpini yi obiri lo o?

¹¹ Lo bihi lili a kana ti bihi sa libvwughu mu bwehe bu Mfumu Yiisu, bumō si kundaa bo!»

¹² Baara bwohono bákala pii ya bákagyughu Baranabase ya Poole ba bákabili mu bilyimi ya mandagha mama okinjimi bi ógyighili Nzaami mu esala e bo ŋa kara li babo baala ka bali ba-Dzwife O.

¹³ Bo bu bamana obili, Dzake ályele ti: «Bandughu ba me mu kana, ligyughu me!

¹⁴ Simeō † aalyele bihi-a-be bunu obaana mu ebaana, Nzaami ási ŋa kara li bikaana biili ka bíli ba-Dzwife o mu osuolo bye bikala baara ba bandaa nde.

¹⁵ Ya mandagha ma, mali mu ogye mu mana ya mandagha ma mibighili.» Mu kuulu básono ti:

¹⁶ «Ŋa mbihi a mamo, me sa yambvughuru, me sa firintwu ebvulu e Dabvide ki eebwi, me sa firingyili bibwa bi kye, ya sa me firimbvurulu kye mu mutele.

¹⁷ Mu obo, baara babake ba basyili basagha Mfumu,

ya bumō si kundaa bikaana byehene bi aanti me mbili mu okala bibi ndaa me.

Obo me bu olyele Mfumu, wu aakagyighili mandagha mwohono.

¹⁸ Ma basoolo, obaana edzighi.»

¹⁹ «Me mu obo me ntsimi ti bubwe mu onyaã omwehē mpara baala ka bali ba-Dzwife o ba baasi kana mu Nzaami.

²⁰ Lo lisono bo mukaana ti banyaã osunumu mu odza tuo li banyama ba baagwi mikaba

† 15:14 15.14 Simeō bwunu we Simō yili nkwumu a Piere yi a nsomo.

kundaa banzaami baba bityeghe, banyaã okasa enkwunu, ya banyaã odza tuo lili banyama ba baakpi mbiili o. Bo ka bafaana odza si makili o.

²¹ Mu kuulu, obaana mu biseene bi bikulu, mu nswe bvulu oli a ba baakaluo Mikyene mi Moyidze. Bo baakatala mye mu nswe etsughu kii sabate mu manzo ma lisamana ma ba-Dzwife.»

Mukaana wu mikele kundaa Libwunu lili ku Antyose

²² Ono, bantumu ya bakwuru, ya Libwunu lwohono, bágwihini mu osuolo baara ŋa kara li bo, ba baagweghe ku Antyose emō ya Poole ya Baranabase. Bo básuolo Yuda, wu baakata ti Baranabase ya Silase, baara baba budziri ŋa kara li bandughu mu kana.

²³ Bágwi bo mukaana wu básono ti:

«Bantumu, bakwuru ya bandughu mu kana bagwi mboro kundaa baala ka bali ba-Dzwife o, ba bali ku Antyose, ku Siri ya ku Silisi.

²⁴ Bihi liigyughu ti baara bana ŋa kara li bihi, baala bihi ka liigwi bo litumu o, baayasa be mikolo maŋa-maŋa ya baagwi be nzalamweẽ mu mbiili a bo.

²⁵ Me mu obo bihi bwohono liikuru mfwunu ya liimono ti ali bubwe bihi lisuolo baara ba liigweghe bihi kundaa be, nzili mō ya bandughu ba bihi baba mukolo Baranabase ya Poole,

²⁶ babo ba bágwi laama li bo mu osalala nkwumu a Mfumu a bihi Yiisu-Kriste.

²⁷ Mu obo, bihi liigweghe be Yuda ya Silase mu kuulu bo bayalyele be mandagha ma liisono bihi mu mukaana.

²⁸ Mufulu a Ngili ya bihi bameme si, liimono ti ali bubwe mu onyaã okwighi be maleme makimi, ña yulu a yini a mandagha maala ka makughu ogweene o.

²⁹ Mandagha mammo me ma: Ka likadza banyama ba baagwi mikaba kundaa banzaami baba bityeghe o. Ka likadza makili o, ka likadza banyama ba baakpi mbiili o, ya ka likasa enkwunu o. Kala ti be liikakebe manyuru ma be, lo be liikasa bubwe. Likala bubwe!»

³⁰ Bányaa babo ba básuolo mu okumunu ku Antyose bagye, ya bo bágyene. Oko, bo bábvughu libwunu ya bágwi bo mukaana.

³¹ Bu bataã mukaana, bo bámono esee mu nkooro a mpama yi ákagwa nde bo.

³² Yuda ya Silase, ba báli bomo mibighili, bábili ku olagha ya bágwi bo mpama ya mpini.

³³ Ya bu baluhu mana matala oko, bandughu mu kana bábvurulu bo mu edzuunu kundaa ba bágweghe bo.

³⁴ [Lo, Silase ámono ti ali bubwe nde asyili oko.]

³⁵ Poole ya Baranabase básyili ku Antyose. Emõ ya baara balagha babake, bo bákaluó ya bákatsala nsia yi mbwe yi a ndagha a Mfumu.

Poole ya Baranabase bakaghaba

³⁶ Ña mbihi a mana bitsighu, Poole ályele kundaa Baranabase ti: «Tswe libvughuru liyitala bandughu mu kana mu mabvulu mwohonó, mu líitsala bihi a we nsia a Ndagha a Mfumu, mu kuulu limono bu bali mu okadzyara bo.»

³⁷ Baranabase ákadzyi obiri ya bo Dzã wu baakata Mareke.

³⁸ Lo Poole ámono ti ali bubwe mu ogwene ogwolo nde emõ ya bo, mu kuulu nde áli akaghaba ya bo ku Pamfili ya ka ágyene nzili mo ya bo o mu oyisa esala.

³⁹ Mumbanana wu a mpini ábwi ña kara li bo ya bo bákaghaba. Baranabase ágwolo Mareke, básomo mu bwara bu bunene ya bágyene ku Syipere.

⁴⁰ Poole ásuolo Silase ya bo bágyene. Lo nsomo bagye, bandughu mu kana báluomo ti bwehe bu Mfumu bukala ya bo.

⁴¹ Ya nde áluru mu mansie mama Siri ya Silisi, mu okabulugwa mabwunu mpini.

16

Poole ya Silase babiri Timote

¹ Poole áyito ku Derebe, ña nseele nde ágyene ku Lisitere. Onjo óli a enduono emõ kii nkwumu Timote, mwana a mukaha wu mu-Dzwife, wu áasi kana mu Mfumu. Lo taara a nde áli mu-Ngereke.

² Bandughu mu kana baba mu mabvulu mama Lisitere ya Ikonyome bákasuo bumpughulu bu bubwe mu nde.

³ Poole ákadzyi obiri nde. Ya bu agwolo nde, ásohobo nde nzo a mbaa, mu nkooro a ba-Dzwife ba báli mu bitsulu bi nsie bibye, mu kuulu bo bwohonono áli basoolo ti taara a nde áli mu-Ngereke.

⁴ Ya mu mabvulu ma bákáluru bo, Poole ya Silase bákatuoho kundaa bandughu mu kana mandagha ma ókuru bantumu ya bakwuru ba

libwunu lili ku Yerusaleme. Ya bo bákaluomo kundaa banga-a-kana mu onama mo.

⁵ Mabwunu mákagwama mu kana, ya nswe etsughu, mo mákapfini mu mutala a baara.

Poole kihi mbili mu ogye ku Masedwane

⁶ Buulu Mufulu a Ngili, ákahaba bo banyaã otsala nsia a Ndagha a Nzaami mu etsulu e nsie kii Adzi, Poole ya Silase bábululuru mu bitsulu bi nsie bibi Firingi, ya bibi Ngalate.

⁷ Bo bu babehene ku etsulu e nsie kii Misi, bo básagha ogye ku etsulu e nsie kii Bitini, lo Mufulu a Yiisu ka ágwi bo muswa o.

⁸ Mu obo, bo bábululuru mu etsulu e nsie kii Misi, ya bákumunu ku mbwuu yi a mu bvulu lili Torowase.

⁹ Etsughu nga-emõ mu mpyibi, Poole ámono mu limono, musi Masedwane átemene ya ákabuono nde ti: «Bululuru mu etsulu e nsie kii Masedwane, ya baha bihi!»

¹⁰ Na mbihi a limono li Poole lilo, bihi líisagha obaagye ku Masedwane, mu kuulu bihi líili a kana ti Nzaami áakata bihi mbili mu oyitsala Nsia yi Mbwe oko.

Baboghoru Lidi ku bvulu lili Filipe

¹¹ Bu lisomo mu bwara ña Torowase, bihi líigyene nsumu ku elyi kii Samotarase. Ya etsughu ki énama ña mbihi, bihi líigyene ku bvulu lili Neyapolise.

¹² Ya bu limara oño, bihi líigyene ku Filipe, bvulu li libvulu mupfunu mu etsulu e nsie kii Masedwane, ki éli kunsá litumu li ba-Romẽ. Bihi líiluhu mana bitsughu munsa bvulu lilo.

¹³ Mu etsughu kii sabate, bihi lípala mu bvulu. Ya bu liluono mukogho a mwele, bihi líiyito ña ebini emõ ki líkatsimi bihi ti ebini kii lisamana. Bu libwi-nsini, bihi líibili ya bakaha ba bábvununu oño.

¹⁴ Ña kara li bo óli a mukaha mumõ wu a nkwumu a Lidi. Nde áli musi bvulu lili Tyatire. Nde ákatyeghe biko bibi mungala ya ákabuono Nzaami. Nde ákagyughu bihi ya Mfumu ádzubulu mukolo a nde mu kuulu agyighili okanama mandagha ma ókalyele Poole.

¹⁵ Ya ña mbihi a ña báboghoro nde, emõ ya baara ba nzo a nde, nde ábuono bihi ti: «Kala be liimono ti me aakansa kana mu Mfumu, lo liyakala mu nzo a me.» Nde ási enkwili buulu bihi likihi.

Poole ya Silase mu boloko

¹⁶ Etsughu etsyini, mu matala ma líkagye bihi ku ebini kii lisamana, musala mutsyini wu mukaha áyabwana a bihi. Nde áli a mufulu wu mubi, wu áakasa ti nde akataala mandagha ma maagya ku nkulu, ya mu buntaala bu nde, bamfumu ba nde bákabagha nzi yi alagha.

¹⁷ Nde ákayanama Poole ya bihi. Nde ákabiili bingubu ti: «Baara ba bali basala ba Nzaami wu Ensoõ-Yulu! Kundaa be, bo bali mu okatsala nsia a nzili yi obvwughu».

¹⁸ Nde ákasa obo bitsughu bilagha. Etsughu etsyini Poole ákolo nkehe, ya bu akaghala, ályele kundaa mufulu munde ti: «Mu nkwumu a Yiisu-Kriste, me ntumu we, pala mu mukaha wu!» Ya ñaana oño, mufulu ápala.

¹⁹ Bamfumu ba nde, bu bamono ti bo ka bakughu ofirisalala nde mu obagha nzi o, básyimi Poole ya Silase, bákwoło a bo tee ɲa ebini ki ókabvunjunu baara ba bvulu lwohono, ɲa nkulu a bamfumu.

²⁰ Bábirí bo ɲa nkulu a bansughu-a-lamana ba báli ba-Romē ya bályele bo ndiri: «Baara ba bali ba-Dzwife. Bo bali mu okasa ligyuu munsa bvulu li bihi.

²¹ Ya bo bali mu okaluo baara bipfu bi binyaghara, biili bihi ba-Romē ka lili a muswa mu okihi o, bwunu we mu onama.»

²² Mpwumu a baara yíaghala bo mfulu, bansughu-a-lamana bágwi litumu badzwulu bo binkuru ya bakaha bo nswanswa.

²³ Ya bu bamana okaha bo nswanswa, bálo bo mu boloko ya bádzu ru nkyele a boloko matswi mu ogyighili okebe bo.

²⁴ Nkyele a boloko bu agyughu litumu lilo, nde álo bo kunsá ngwumu yi a mu kara, ya álo bo myili mu bidzu.

²⁵ Mu kara-a-kara li mpyibi, Poole ya Silase bákasamana ya bákagyimi bikwumu mu osyighi Nzaami. Baara ba boloko babake bákagyughu bo.

²⁶ Ensihibi, nsie yínyinji mu mpini mu eteese kii onyihi bitsini bi bibagha bi boloko. Bidzughubu bi boloko byehene bísaanyaã ya misyi mimi bisyeē myehene mi bákuru baara ba boloko mísughuru.

²⁷ Nkyele a boloko ábulusighili kunsá ensama, ya bu amono bidzughubu bi boloko bwaha, nde ápaha lípee mu kuulu adzwa nyuru. Nde ákatsimi ti baara ba báli mu boloko báfi obara.

²⁸ Lo Poole ágyamana nde ti: «Ka sa nyuru a we mfini o! Bihi bwohono lili ɲa».

²⁹ Ono nkyele a boloko áluomo mwindi, ya mu embwa-mbwa nde ásono mu báli bo, mu enkwughu kyehene áyibwa ɲa nkulu a Poole ya Silase.

³⁰ Nde ápaɲa bo ya áfwulu bo ti: «Bataara! Emakye me aansa kuulu me mbvwughu?»

³¹ Bo bábvuhulu nde ti: «Sa kana mu Mfumu Yiisu, ya we sa bvughu, we ya baara ba nzo a we.»

³² Bo báluo nde ndagha a Mfumu, nde ya baara ba nzo a nde bwohono.

³³ Mu matala maana mamu, nkyele a boloko ábiri Poole ya Silase ku nzo a nde, áswagha bo mambaala, ya bo básaabogho nde ya baara ba nzo a nde bwohono.

³⁴ Nde ásohobo bo munsa nzo a nde ya ágwi bo bi-odza. Nde ya baara ba nzo a nde bwohono, bákughu mu esee, mu kuulu, bo bási kana mu Nzaami.

³⁵ Bwihi bu buki, bansunghu-a-lamana bágweghe babaakasala ya bo bayilyele kundaa nkyele a boloko ti: «Nyaã baara babo bagye!»

³⁶ Nkyele a boloko átwoho nsia oyo kundaa Poole ti: «Bansunghu-a-lamana baagweghe mukyene ti me nyaã be. Mu obo, lipala ya ligye mu edzuunu!»

³⁷ Lo Poole ábvuhulu bo ti: «Bo baatumu bakaha bihi nswanswa ɲa mihi mi baara bwohono, gwene a otswama osa bihi muyala, bihi ba lili ba-Romẽ! ɲa nseele bo baalo bihi mu boloko. Ya mu matala ma bo badzyi opaha bihi mu ensweghe? Pele, ka okughu okala obo o! Nyaã

bomo bayapaha bihi!»

³⁸ Babaakasala ya bansughu-a-lamana báytwoho mvuru oyo kundaa bansughu-a-lamana. Bo bu bagyughu ti Poole ya Silase báli ba-Romē, bo bábagha nzalamweē,

³⁹ ya báyaluomo bo kolokolo. Bo bápaha bo mu boloko ya báluomo bo bamara mu bvulu.

⁴⁰ Poole ya Silase bu bapala mu boloko, bágyene kundaa Lidi. Bo bámonono ya bandughu mu kana, ágwi bo mpama, ya bo bágyene.

17

Poole ya Silase ku bvulu lili Tesalonike

¹ Bu baluru mu mabvulu mama Amfipoli ya Apoloni, Poole ya Silase báyanto ŋa Tesalonike. Oŋo, óli a nzo a lisamana a ba-Dzwife.

² Ti bwunu a bu óli epfu e nde, Poole ásono mu nzo a lisamana a ba-Dzwife. Nde ákabili ya bo mu mi mitala Mandagha ma Nzaami, mu bitsughu bi sabate bitere.

³ Nde ákabaala ya ákasuo bo ti Kriste áfaana omono mpara ya osighili ŋa kara li ba bákpi, ya ákalyele bu: «Kriste, me Yiisu wu ndi mu okagwa me be nsia.»

⁴ Bo bápeene a ndaama a ba-Dzwife ba báybavununu ya bo. Ba-Ngereke balagha ba baakasyighi Nzaami ya bakaha balagha ba banene boho si, bási bumō.

⁵ Lo ba-Dzwife bana bámono mukolo mubi ya báti baara ba babi ba baakabwa nsini mu manzili mbili. Bu babvughu bo, bátumu bo mu osa ngirini munsa bvulu. Bo báybavununu ŋa nzo a Yasone,

bákasagha Poole ya Silase mu kuulu babiri bo ña nkulu a baara bwohono.

⁶ Bu bakwono omono bo, bo bábiri Yasone ya ndaama a bandughu mu kana babake ña nkulu a bamfumu ba bvulu, ya bákabuluta mukwu ti: «Baara ba báanyihi nsie nsyini, bamaato kunu mu matala ma.

⁷ Yasone aagyagha bo ku nzo a nde. Bo ka bali mu okanama litumu li Mukogho Sedzare o, ya bali mu okabululyele si ti oli a mukogho mukimi, nkwumu a nde Yïisu.»

⁸ Ndagha oyo yímwehẽ bakwuru ba bvulu ya mpwumu a baara mpara.

⁹ Bo bákehe Yasone ya babake ekolo ki ofuru ña nseele bányaã bo bagye.

Poole ya Silase ku bvulu lili Bere

¹⁰ Mpyibi bu yibwi, bandughu mu kana bágweghe Poole ya Silase ku Bere. Bo bu bato oko, básomo mu nzo a lisamana a ba-Dzwife.

¹¹ Ba-Dzwife baba ku Bere báli a mikolo mi mibwe ku obvulu baba ku Tesalonike. Bo bágyagha Ndagha a Nzaami mu esee ki elagha mu okagyighili okeene yo nswe etsughu, mu kuulu basoolo kala ti mandagha ma ókaluo bo Poole máli mama nganma.

¹² Baara balagha mu bo básí kana, bumõ si ya bakaha baba ba-Ngereke ba banene mu bvulu ya babaghala balagha.

¹³ Lo ba-Dzwife baba ku Tesalonike bu basoolo ti Poole ákabulutsala si nsia a Ndagha a Nzaami ku Bere, bo bágyene oko si mu kuulu basa ngirini ya mu otihi mampwumu ma baara.

¹⁴ Mu maswa, bandughu mu kana bási ti Poole abara ku mukogho a mubu. Lo Silase ya Timote básyili ku Bere.

¹⁵ Ba bákagye ya Poole, bábiri nde tee ku bvulu lili Atene. Mu matala ma bákabvughuru bo, Poole átumu bo bályele kundaa Silase ya Timote bagye mu maswa ku áli nde.

Poole mu bvulu lili Atene

¹⁶ Mu matala ma okakebe Poole Silase ya timote ku Atene, nde ákanyoõ ku olagha bu ákamono ti bvulu lilo áli lilwulu mu banzaami baba bityeghe ba ókasyighi baara.

¹⁷ Mu obo, mu nzo a lisamana a ba-Dzwife, nde ákamono ya ba-Dzwife ya babo baala ka báli ba-Dzwife o ba baakasamana Nzaami. Ya nswe etsughu, nde ákamono ya baara bwohono ba ákabwana a nde ña ebini ki ookabvununu baara bwohono.

¹⁸ Óli si ya banga-a-mayele ba baakata ba-Epikuryẽ ya ba-Sitoyisyẽ ba bákamono ya nde. Bana bákalyele ti: «Nsa ndagha Nga-a-nkele wu adzyi olyele?» Babake bákalyele ti: «Ti anga nde li mu okabili mu banzaami baba bunzyi.» Bo bákalyele obo mu kuulu Poole ákaluo Nsia yi Mbwe yitala Yĩisu ya osighili o ba bápki mu lipfu.

¹⁹ Mu obo, bo bágwolo Poole ya bábiri nde ña nkulu a mfwunu a bamfumu ba bvulu yi baakata Ayeropadze. Bo báfwwulu nde ti: «We kughu olyele bihi nsa maluo ma manyaghara we li mu okabulugwa baara?»

²⁰ Mu kuulu we li mu okalo mu matswi ma bihi mandagha ma manyaghara ya bihi lidzyi ogyahaba mambaala ma mo.»

²¹ Mu enganma, baara ba bvulu lili Atene ya banzyi ba báli munsá bvulu lilo, bákáluhu matala ma bo yini a mu okabili bwunu we mu okagyughu bitsimi bi binyaghara.

²² Mu obo, Poole bu atemene ña nkulu a baara ba bábvununu mu mfwunu a Ayeropadze, átsughu ndagha ti: «Baara ba bvulu lili Atene, me ndi mu omono ti mu mandagha mwohonó, be lili baara banga a enzaami nkara kii elagha.

²³ Mu kuulu, mu matala ma áakabulundzye me munsá bvulu li be, me aamono bityeghe bi liikasamana be, ya me aamono ebini emó ki baakagwa bikaba. Ña yulu a kye básónó ti: “Kundaa nzaami wu bagwene ogyahaba”. Me aayangwa be nsia a Nzaami munde wu liikasamana be, gwene a osoolo nde.

²⁴ Me Nzaami munde áagyighili nsie yohonó ya bilogho byehene bi bili mu yo, nde li Mfumu a yulu ya nsie. Nde ka aakakala mu bibini bibi lisamana bi ógyili myaã mi baara o.

²⁵ Ña yulu onó, nde ka li a nzala a kuulu ti myaã mi baara misalala nde o ti anga nde li a nzala a elogho. Mu kuulu nde aakagwa bumweẽ, ewumu, ya bilogho byehene kundaa baara bwohonó.

²⁶ Mu mbwuru mutsyini, nde ágyighili bikaana bi baara byehene mu kuulu bye bikala ña yulu a nsie yohonó. Nde ákuru mando ya ási milili mu mansie ma baakala bo.

²⁷ Nzaami ási obo mu kuulu baara bakasagha nde, si kala ti bo baakamono mpara mu okasagha nde, bo sa bamono nde. Mu enganma, nde ka li la ya nswe mbwuru mu bihi o.

²⁸ Mu kuulu me mu nde bihi lili mweẽ, liikab-uludzyara, ya bihi lili, ti bu ólyele banga-a-liteere li obili ba be babake ti: “Bihi si lili baana ba nde.”

²⁹ Mu obo, buulu bihi lili baana ba Nzaami, bihi ka lifaana otsimi o ti Nzaami li mu efafaana ki etyeghe ki bátsulu mu oore, mu ngele, bwunu we ki bágwala mu limeẽ, ki bágwala ya bunkere mu mayele ya bitsimi bi mbwuru.

³⁰ Ankoho Nzaami ka aafirikatata matala maala baara báli kunsá nzi-nzimini o. Lo mu matala ma, nde li mu okalyele kundaa baara bwohonó mu mansie mwohonó ti bagyinjí mayele.

³¹ Mu kuulu nde ákuru etsughu ki akala aalamana nde nsie nsyini mu bunsumu mu mbwuru wu ásuoló nde. Nde áasuo kundaa baara bwohonó elyimi, ki bakughu osa kana, bu áasiili mbwuru munde ña kara li ba bákpi.»

³² Bo bu bagyughu ndagha yi osighili o baara ña kara li ba bákpi, baara bana bábwi osebe nde, babake bákalyele ti: «Mu ndagha oyo, bihi sa ligyughu we mu matala makimi!»

³³ Mu obo, Poole ábulusihi bo.

³⁴ Lo ndaama a baara mu bo yínama nde ya yísi kana. Mu bo óli Denise, mumõ mu mfwunu a Ayeropadze, ya mukaha mutsyini wu a nkwumu Damarise ya baara bakimi.

18

Poole ku bvulu lili Korête

¹ Ña mbihi orjo, Poole ámara ku Atene ya ágyene ku Korête.

² Oko, nde ábwana mu-Dzwife wu a nkwumu Akila, wu áfi ku etsulu e nsie kii Põ. Ka oli edzighi o, nde áfi ku Itali ya mukala a nde Pírisika,

mu kuulu Mukogho Kolode ágwi litumu ti ba-Dzwife bwohono bafaana opala mu bvulu lili Rome. Poole ágyene kundaa Ákila ya Pirisile.

³ Ya buulu nde esala emõ ákasa ya bo, bo báli bantwu bibvulu, Poole ákala emõ ya bo, ya bákasala ya bo.

⁴ Mu nswe etsughu kii sabate, Poole ákabili mu nzo a lisamana a ba-Dzwife ya ákasagha opeene a ba-Dzwife ya ba-Ngereke basa kana.

⁵ Mu matala ma ófi Silase ya Timote ku Masedwane ya báyanto ku Korête, Poole ábaana okaluhu matala ma nde mwohono mu okaluo Ndagha a Nzaami. Nde ákalyele kundaa ba-Dzwife ti ngan̄ma Yiisu li Kriste.

⁶ Lo ba-Dzwife bátemene a Poole nsumu ya bákatughu nde. Mu obo, nde ákubulu lifufunu li binkuru bi nde ya ályele bo ti: «Nyaã makili ma be mabwa ŋa yulu a mitswi mi beme! Me ka ndi a ebili mu mo o. Obaana lolo, me kundaa baala ka bali ba-Dzwife o aangye.»

⁷ Poole bu amara ŋa ebini ekye, ágyene kundaa baghala mumõ wu áakasamana Nzaami. Nkwumu a nde Tituse Yusutuse, ya nzo a nde yíli ŋa bele a nzo a lisamana a ba-Dzwife.

⁸ Kirisipuse, mfumu a nzo a lisamana a ba-Dzwife, ási kana mu Mfumu, nde ya baara ba nzo a nde bwohono. Ya baara baba ku Korête, ba bákagyughu Poole, bási kana ya bábogho bo.

⁹ Etsughu nga-emõ mu mpyibi, Mfumu áyamonono kundaa Poole mu limono ya ályele nde ti: «Ka kala a nzalamweẽ o, sa mukama mu okabili, ka kuru mun̄ma o!

¹⁰ Buulu me ndi ya we, ka oli a mbwuru

wu kughu osyimi we mu omwehẽ we kimini o. Munsa bvulu li, me ndi a baara balagha.»

¹¹ Poole ási mvulu mumõ ya bangoono basemene ku Korẽte mu okaluo Ndagha a Nzaami.

¹² Mu matala ma óli Ngalyõ mfumu a Rome, mu etsulu e nsie kii Akayi, ba-Dzwife ágwihiini mu okala a etaara mu Poole, ya bábiriri nde ña mbala a muyala.

¹³ Bo bályele ti: «Mbwuru wu li mu okatumu baara bakasamana Nzaami mu okakaala mikyene embihi.»

¹⁴ Mu matala ma ókaabili Poole, Ngalyõ ágwi mvuru yi kundaa ba-Dzwife: «Kala ti ali ndagha yi baadzwi mbwuru bwunu we bigyighili bi bibi, me kaankihi oluhu matala ma me mu ogyughu be ba-Dzwife.

¹⁵ Lo buulu mumbañana a be li mu nkooro a mbiili, mankwumu ya mikyene mi be, ndagha oyo yitala be beme! Me ka nkughu okala nsughu-a-lamana a be o.»

¹⁶ Ya nde ápaha bo ku mbala a nzo a muyala.

¹⁷ Mu obo, bo bwohonono básyimi Sosetene, mfumu a nzo a lisamana a ba-Dzwife, bádzwi nde nkubu ña mbala a nzo a muyala. Lo Ngalyõ ka átsughu si ndagha o.

Poole bvughuru ku bvulu lili Antyose

¹⁸ Poole áfiriluhu bitsughu bilagha ña Korẽte. Ña mbihi, nde ábulusihi bandughu mu kana ya ásono mu bwara mu ogye ku Siiri, nzili mõ ya Pirisile ya Akila. Lo nsomo, básiri nde nkulu ña Senkere mu kuulu nde ágwi misiini kundaa Nzaami.

¹⁹ Bu bato ŋa Efedze, nde ásihi Pirisile ya Akila oŋo. Nde ágyene ku nzo a lisamana a ba-Dzwife ya ákamoŋo ya ba-Dzwife.

²⁰ Bo báluomo nde mu oluhu bitsughu bilagha oko, lo nde ábihi,

²¹ nde ábulusihi bo ya ályele ti: «Kala Nzaami dzyi, me sa firiyambvughuru kundaa be mu sa likimi.» Ŋa nseele nde ásomo mu bwara ya ásihi bvulu lili Efedze.

²² Bu ato ŋa bvulu lili Sedzare, Poole átswama okumu ku Yerusaleme mu ogwa libwunu li Nzaami mboro. Ŋa mbihi, nde ákumunu ku Antyose.

²³ Nde áluhu mana bitsughu, ya ásihi bvulu lilo. Nde ábululuru mu mabvulu mama Ngalate ya Firingi, mu okabulugwa binduono byehene mpama mu kana.

Apolose mu mabvulu mama Efedze ya Korête

²⁴ Mu-Dzwife mumõ, wu a nkwumu Apolose, wu áafi ku bvulu lili Aledzandiri, áyato ŋa Efedze. Nde áli a liteere li obili ya áli asoolo Bisono bi Nzaami bubwe.

²⁵ Nde ágyighi nsia a nzili a Mfumu, ya nde bu áli a mukolo mbaa, ákaluo ya ákagyih mu bunsumu Nsia yi mbwe yitala Yiisu. Lo nde ákagyahaba yini a liboghoru li Dzã.

²⁶ Mu obo, nde ákaluo ya bukyini bwohonon munsá nzo a lisamana a ba-Dzwife. Lo bu bamana ogyughu nde, Pirisile ya Akila bágwolo nde mu okala emõ ya bo, mu ofirigyighili osuo nde nzili a Nzaami.

²⁷ Buulu Apolose áli a etsimi kii ogye ku Akayi, bandughu mu kana bákihi etsimi ekye ya básono mukaana kundaa binduono mu kuulu babwana a

nde bubwe. Nde bu áyato, mu bwehe bu Nzaami, nde áli a mupfunu kundaa babo ba bási kana.

²⁸ Mu enganma, mu mbiili a nde, nde ákabwihi mu ebaghala kyehene bitsimi bi ba-Dzwife na mihi mi baara bwohono, bu akasuo mu libaha li Bisono bi Nzaami ti Yiisu ngu Kriste.

19

Poole ku bvulu lili Efedze

¹ Mu matala ma óli Apolose ku Korête, Poole wu áabululuru mu etsulu e nsie kii minguo mimi Adzi áto ku Efedze. Oko, nde áyibagha ndaama a binduono.

² Ya nde áfwulu bo ti: «Mu matala ma lísi be kana mu Mfumu, be lígyagha Mufulu a Ngili?» Bo bábvuhulu nde ti: «Bihi nkini lígyughu ti oli a Mufulu a Ngili o!»

³ Mu obo, Poole áfwulu bo ti: «Bu nsa liboghoru be líbagha?» Bo bábvuhulu ti: «Liboghoru lili Dzã.»

⁴ Poole áfirilyele bo ti: «Dzã ákaboghoru baara ba bákagyiŋi mayele ya nde ákaluomo kundaa bo mu osa kana mu munde wu akala aagya na mbihi a nde. Mbwuru munde, me Yiisu.»

⁵ Bu bamana ogyughu nde, báboghoru bo mu nkwumu a Mfumu Yiisu.

⁶ Poole ánaã bo myaã na yulu a mitswi ya Mufulu a Ngili ábwi mu bo. Bo bábwi obili mu mandĩ mama bunzyi ya okabighili.

⁷ Mutala a bo bwohono áli ku bele a baara kwumu ya buolo (12).

⁸ Nswe matala, Poole ákagye ku nzo a lisamana a ba-Dzwife, ya mu bangoono batere, nde ákabili ya kana lwohono, ya ákaluo mu mi mitala Empu e

Nzaami. Nde ákasa mukama mu opeene a baara ba bákagyughu nde mu kuulu bo basobo bitsimi.

⁹ Lo baara babake ña kara li bo, bákuru mikolo, bábihi osa kana ya bákatswagha maluo ma matala nzili a Mfumu ña nkulu a libwunu lwohono. Mu obo, Poole ábulusihi bo. Nde ágwolo binduono ya ágyene a bye, ya nswe etsughu, nde ákaluo bye munsá nzo a Tiranose yi a maluo.

¹⁰ Nde ási mukama mu okaluo bo tee mu bamvulu buolo. Me obo baara bwohono baba mu etsulu e nsie kii Adzi, ba-Dzwife ya ba-Ngereke bágyughu Ndagha a Mfumu.

Baana ba Seva

¹¹ Nzaami ákasa bimaã bii okinjimi mu Poole.

¹² Mu obo, bákayinahaba biko bwunu we mipa mi biko mi míberene a nyuru a nde kundaa babyele. Babyele bákadzughu, ya mifulu mi mibi mikapala mu bo.

¹³ Ndaama a ba-Dzwife ba baakabulugye nto ya nto mu okabulubyi mifulu mi mibi, bákatanjana si nkwumu a Mfumu Yiisu ya bákalyele kundaa mifulu mi mibi ti: «Mu nkwumu a Yiisu wu oli mu okabululuo Poole, me ntumu be, lipala!»

¹⁴ Obo me bu ókasa baana nsaama ba mukwuru a bangaa ba nzaami a ba-Dzwife wu a nkwumu Seva.

¹⁵ Lo etsughu nga-emõ, mifulu wu mubi ábvuhulu kundaa bo ti: «Yiisu, me ngyahaba nde, ya me nsolo nande Poole ali. Lo be, be bana lili?»

¹⁶ Ya mbwuru wu áali a mifulu wu mubi ábwi ña yulu a bo, ábvulu bo mu mpini ya ámwehẽ bo bwohono mpara mu nzunu yi alagha. Bo

bábulupala mu nzo oyo mu ntyini, mpene ya mambaala mu manyuru.

¹⁷ Baara bwohono mu bvulu lili Efedze, ba-Dzwife ya ba-Ngereke bágyughu ndagha oyo. Bo bwohono bámono nzalamweẽ ya bákasyighi bunene bu nkwumu a Mfumu Yiisu.

¹⁸ Na kara li baara ba bási kana, balagha báakakihi bigyighili bi bo bi bibi na mihi mi baara bwohono.

¹⁹ Baara balagha báyabiri mikaana mi bo mimi mpaana, ya bátsughu mye mbaa na mihi mi baara bwohono. Bu batala ntala a mikaana mimye, bábagha mafwunu kwumu (50 000) ma mipara mimi bisyeẽ.

²⁰ Me mu obo, mu lileene li Mfumu, Ndagha a Nzaami yíkatsanama ya yíkaku mu manto mwohono.

Ngirini mu bvulu lili Efedze

²¹ Na mbihi a mandagha mamu, mu Mufulu, Poole ábagha bitsimi bii ogye ku Yerusaleme, mu obululuru mu bitsulu bi mansie bibi Masedwane ya Akayi. Nde ákalyele ti: «Na aamara me oko, me mfaana ogye si ku Rome.»

²² Mu obo, nde ágweghe baara buolo mu mim-baha mi nde ku Masedwane, Timote ya Erasite. Lo nde-ndeme áfiriluhu mana bitsughu mu etsulu e nsie kii Adzi.

²³ Me mu matala mamu baara bási ngirini yi nene mu nkooro a nzili a Mfumu.

²⁴ Demeteryuse, muntsulu bisyeẽ, ákagyighili binzo-nzo bibi lisamana mu ngele mu efaana e nzo a nzaami a Aretemise, nzaami wu mukaha.

Nde ya ba bákasa esala emõ ya nde bákabagha ndaana yi alagha.

²⁵ Nde ábvughu bo ya baara ba baakasala bisala bikimi bibi myaã bi bifaana ya kii bo, ya ályele kundaa bo ndiri: «Bandughu ba me, be lisoolo ti me mu esala ki bihi-a-be liikabagha busini.

²⁶ Lo be lili mu omono ya lili mu ogyughu ti Poole li mu okalyele ti banzaami ba lili mu okagyighili mu myaã mi bihi-a-be ka bali banzaami baba nganma o. Nde aaleene opeene a mampwumu ma baara mu osobo bo bitsimi. Ka oli yini a mu Efedze bali mu okalyele obo o, lo mu etsulu e nsie kyehe kii Adzi.

²⁷ Ka oli yini a esala e bihi-a-be bali mu okatswagha o, lo bali mu okatsaala si nzo a nzaami a Aretemise, nzaami wu munene wu mukaha. Ya edzi-dzighi nde sa apfihili nsia a nde yi nene, nde wu li nzaami wu baakasamana mu etsulu e nsie kii Adzi ya mu nsie nsyini.»

²⁸ Bo bu bagyughu obo, bákolo nkehe ya bábwi ofulu bingubu ti: «Aretemise wu a Efedze li nzaami wu mukaha wu munene!»

²⁹ Ngirini yíbwi mu bvulu lwohono. Bo bwohono mu mpwumu bágyene ku nzo a bimpa, bábulusyimi ya bábiri Ngayuse ya Arisitarake, basi Masedwane ba bákabulugye ya Poole .

³⁰ Poole ákadzyi oyimoŋono ŋa nkulu a mpwumu a baara, lo binduono bíkahaba nde.

³¹ Bandughu ba nde babake ba báli bamfumu mu etsulu e nsie kii Adzi bágweghe nde si baara mu obuono nde mu kuulu anyaã ogye ku nzo a bimpa.

³² Bana bákakehe bingubu mu ndagha yi,

babake bákakehe bingubu mu ndagha nkimi. Mpaatsala yíbwi ɲa nsa emvuɲunu. Ya baara balagha ɲa kara li bo ka bákasoolo o mu emakye bo bábvuɲunu.

³³ Munsa mpwumu, ndaama a baara yígwi nsia kundaa Alekandere wu ótwulu ba-Dzwife ɲa nkulu. Nde áseene ekee mu obili mu kuulu akala nyuru a nde ɲa nkulu a mpwumu a baara.

³⁴ Lo bu babaghala ti nde li mu-Dzwife, baara bwohonó bákakehe bingubu mu likyi limō, mu matala muolo ti: «Aretemise wu a Efedze li nzaami wu mukaha wu munene!»

³⁵ Munsono mikaana wu a bvulu áleene ogwuhubu mpwumu a baara ya ályele ti: «Baara ba Efedze, nande dzimini ti bvulu li Efedze lili nkyele a nzo a nzaami a Aretemise wu munene ya wu a etyeghe e nde ki éfi ku yulu?

³⁶ Buulu ka oli a mbwuru wu kughu osa mikeme mu ndagha oyo o, be lifaana odzuunu ya ka lisa buwulu o.

³⁷ Be liiyabiri babaghala ba ɲa. Lo bo ka baaturu bilogho bi nzo a nzaami o ya bo ka baatswagha nzaami a bihi wu mukaha o.

³⁸ Kala ti Demeteryuse ya basala ba nde bali a ndagha ya mbwuru, bitsughu bibi miyala bili, bansunghu-a-lamana si bali. Lo nyaã bo bay-ifwunu!

³⁹ Ya kala ti be lili a mandagha makimi ma liifwunu, emvuɲunu ki eekanama mikyene sa egyighili mo.

⁴⁰ Mu enganma, bakughu ofwunu bihi-a-be ti bihi liitemene nsumu ya emfumu e bvulu mu mi miiluru lolo. Mu kuulu ka oli a bwuu li likughu

ogwa kundaa bamfumu ba bvulu mu emvuṇunu ki o.» Nde bu amana obili obo, ábvurulu baara.

20

Poole ku nsie yi a Masedwane ya yi a ba-Ngereke

¹ Ngirini oyo bu yifi, Poole áti binduono bi nde mbili ya ágwi bo bukyini. Bu agwi bo mboro yi munkaghaba, nde ágyene ku Masedwane.

² Nde abululuru mu etsulu e nsie ekye ya ákabulugwa ba bási kana bukyini bulagha. Na nseele, nde áyito ku nsie a ba-Ngereke.

³ Nde áluhu bangoono batere oko. Mu matala ma ákasomo nde bwara mu ogye ku Siiri, nde ágyughu ti ba-Dzwife bákuru ewaa mu odzwa nde. Mu obo, nde ágwolo mukakana wu obvughuru mu nzili yi a Masedwane.

⁴ Sopatere mwana a Piruse musi Bere, Arisitarake ya Sekunduse basi Tesalonike, Ngayuse musi Derebe, Timote, Tisike ya Torofime baara baba etsulu e nsie kii Adzi, bágyene ya nde.

⁵ Bo bátswama ku nkulu ya báyikebe bihi na bvulu lili Torowase.

⁶ Ya na mbihi a kyiri kii mampa ma magwene a pfunu, bihi líisomo bwara na Filipe. Na mbihi a bitsughu bitaana, bihi líyibagha bo na bvulu lili Torowase ya líluhu bitsughu nsaama oṇo.

Midzye mi Poole mimi masini ku Torowase

⁷ Mu etsughu kii bisemene mu nkonkolo*, bihi líibvununu mu okaba limpa. Ya Poole ákamoõ ya bihi. Mu kuulu nde mbala ákagye, nde ádzuru emoõ tee kara-a-kara a mpyibi.

⁸ Bihi áli líibvununu mu ngwumu yi a ku yulu. Omo óli a miindi milagha.

⁹ Mu matala ma ókabiri Poole emoõ ela-ela, mumpala mumõ wu a nkwumu Etike áli abwinsini ña etse †e nzo ya ákpi mukaba a ensama. Kunsá ensama, nde alighibi ku yulu a muya a nzo wu mitere ya ábwi ku nsie. Bu basagha otehebe nde, bámono ti nde ákpi.

¹⁰ Poole bu asughuru, ápfunumu, ágwolo nde ya ályele ti: «Ka líkala maña-maña o, nde mweẽ ali!»

¹¹ Bu abvughuru ku yulu a nzo, Poole átsyiri limpa áli. Nde áfiribiri emoõ ela-ela tee ku oki bwíhi, ya ábwi nzili ágyene.

¹² Bábirí mumpala munde wu a mweẽ, ya bo bwohono bábagha bukyini bulagha.

Poole mara ku bvulu lili Torowase, gyene ku mbwuu yi a bvulu lili Mile

¹³ Bihi líitswama nkulu ya líiyisomo bwara bu bunene mu ogye ku Asose. Oko bihi líkaabulugwolo Poole, wu áagyene oko mu myili ti bu oli waa li nde.

¹⁴ Mu matala ma áyabagha nde bihi ña mbwuu yi a Asose, nde ásomo mu bwara li líli bihi ya líigyene bihi bwohono ku bvulu lili Mitilene.

* **20:7 20:7** bisemene mu nkonkolo kundaa ba-Dzwífe, etsughu kii nsomo mu limíni okabaana mu etsughu kii bisemene mu nkonkolo ya okayisughu mu limíni mu matala ma ookadzyama tala. † **20:9 20:9** etse fenetere

¹⁵ Bu limara oŋo, bihi lígwolo nzili yi a mubu. Ya mu etsughu ki nsomo, bihi líiyito ŋa elyi kii Kiyo. Mbala bihi lípala ku elyi kii Samose. Ya muyiri-mbala bihi líiyito ŋa mbwuu yi a bvulu lili Mile.

¹⁶ Poole ágwaa mu oluru mikiŋi bvulu lili Efedze, mu kuulu bihi linyaã ofiriluhu matala mu etsulu e nsie kii Adzi. Nde ákabiŋini oyito ku Yerusaleme mu etsughu kii Pantekote.

Poole bili kundaa bakwuru ba libwunu lili Efedze

¹⁷ Poole bu ato ku Mile, ágweghe bambiŋini ku Efedze mu oyita bakwuru ba libwunu li Nzaami mbili.

¹⁸ Bo bu bayato kundaa Poole, nde ályele bo ti: «Be ligyahaba, bu áakankala me ya be matala mwohonon, obaana mu etsughu kii nsomo ki áyanto me ku Adzi.

¹⁹ Me aansalala Mfumu kunsá okughulu kwohonon, mu mansaã ya mu makimini ma óokasa me ba-Dzwife mamfwunu.

²⁰ Be lisoolo ti me ka ákansweghe be ndagha si mō yi kughu okala mupfunu kundaa be o. Lo me áakanduo ya áakangyihi be mye ŋa mihi mi baara bwohonon ya mu manzo.

²¹ Me áakanduomo kundaa ba-Dzwife ya baala ka bali ba-Dzwife o bagyiŋi mayele, bagya kundaa Nzaami ya basa kana mu Mfumu a bihi Yiisu.»

²² «Mu matala ma, me ndi mu okagye ku Yerusaleme bwunu a bu oli mu okatumu me ya epini Mufulu a Ngili. Me ka nsoolo o, nsa ndagha me aambwana a yo oko.

²³ Lo mu engañma, Mufulu a Ngili li mu oka-lyele kundaa me ti, mu nswe bvulu, mindala ya kimini bili mu okakebe me.

²⁴ Lo mu me, laama li me ka lili a mupfunu o. Ndagha yi li mupfunu kundaa me, oto ku masini ma esala ya osala esala ki ógwi me Mfumu Yiisu, mu okala mpughulu a Nsia yi Mbwe yi a bwehe bu Nzaami.»

²⁵ «Me áakankala ɲa kara li be mu okaluo be mu mi mitala Emfumu e Nzaami. Lo obaana lolo, me nsoolo ti be ka lifirimonu edzili e me o.

²⁶ Mu obo, etsughu kii lolo me ndyele kundaa be ti: Kala ti be lidzimini, me ka ankala a ebili mu be bwohonu o.

²⁷ Mu engañma, me aandyele be bitsimi bi Nzaami byehene, me ka aansweghe be ndagha si mō o.

²⁸ Likahala mihi mu beme ya mu mukaã a bindoomo wohono wu oogwi be Mufulu a Ngili mu okebe. Ligyighili okebe libwunu li Nzaami, li aabagha nde mu makili ma mwana a nde.»

²⁹ «Me nsoolo ti ɲa mbihi a ɲa aangye me, baara ba bali ti bango sa bapala. Ya bo ka babvwuhu mukaã a bindoomo o.

³⁰ ɲa kara li be, sa okala a baara ba baalyele mandagha mama mpya, mu kuulu binduono bigwunumu ya binama bo.

³¹ Mu obo, likala yeelee, ya liikalibili mweẽ ti mu bamvulu batere, mpyibi ya mwĩ, ngu okala ti kunsu mansaã, me ka aandezimini ogyehe nswe mbwuru ɲa kara li be o.»

³² «Lo mu matala ma, me ngwaghala be ɲa myaã mi Nzaami ya kunsu ndagha a nde yi a bwehe. Nde wu li a lileene mu osa ti be likulu

mu kana ya mu ogwa pfa kundaa baba ngili bwohono.

³³ Me ka áansughu mukolo mu nzi, mu oore, bwunu we mu binkuru bi mbwuru o.

³⁴ Myaã mi liilomono be mi, be beme lisoolo ti me aankasala mu obagha bibye bi liili a bihi nzala bye, me ya ba baakabulugye ya me.

³⁵ Mu mandagha mwohono, me áakansuo be ti, me mu okasala obo be lifaana obaha babo ba bagwene a mpini, ya mu okalibili mweẽ mandagha ma ólyele Mfumu Yiisu ndeme ti: “Esee kii wu aakagwa ebvulu kii munde wu aakagyagha.”»

³⁶ Bu amana olyele mandagha mamo, nde ya bo bwohono bákunu mabuo ña nsie ya nde ábuono Nzaami.

³⁷ Baara bwohono bábuulu elili, ya bákabwumu Poole mu ogwa nde mboro yi a masini.

³⁸ Bo bányoõ ku olagha mu nkooro a bu ályele nde kundaa bo ti, bo akala ka bafirimono nde o. Ya bo báytwulu nde tee ña bwara.

21

¹ Bu likaghaba ya bo, bihi líisomo mu bwara ya líigyene nsumu ku elyi kii Kose. Mu etsughu ki énama, bihi líigyene ku elyi kii Rode, ya bu limara oko, líigyene ku bvulu lili Patara.

² Oko, bihi líimono bwara bu búkagye ku nkolo yi a nsie yi a Fenisi, bihi líisomo omo ya líigyene.

³ Bu lito ña bele a elyi kii Syipere, bihi líisihi kye ku engbambogho, ya línama nzili yi a madza ku nto yi a nsie yi a Siri. Bihi líipala mu bwara ña mbwuu yi a Tire, mu kuulu me oño bákasurulu bilogho bi bíli mu bwara.

⁴ Oŋo, bihi líimono binduono ya lílulu bit-sughu nsaama emõ ya bo. Mu litumu li Mufulu, bo bályele kundaa Poole anyaa okumu ku Yerusaleme.

⁵ Na mbihi a bitsughu nsaama bibye, bihi líitemene mu ogye. Ya bo bwohono, bakaha ya baana ba bo, báytwulu bihi tee ku nto a bvulu. Bu lito na mukogho a mubu, bihi bwohono líikunu mabuo na nsie, ya líisamana Nzaami.

⁶ Na masini, bu ligwihini a mamboro mama okaghaba, bihi líisomo munsu bwara ya bo bábvughuru ku manzo ma bo.

⁷ Bihi líimana dzwe mu mubu, bu libaana ku Tire, líyisughu na Petolemaysi. Oŋo bihi líigwi bandughu mu libwunu mamboro, ya lílulu et-sughu etsyini ya bo oŋo.

⁸ Mu etsughu ki énama, bihi líigyene ya líiyito ku Sedzare. Oko bihi líigyene ku nzo a Filipe, Muluo a Nsia yi Mbwe. Nde áli mumõ mu babaghala nsaama ba básuolo ku Yerusaleme mu obaha bantumu*. Ya bihi lílulu mana a bitsughu kundaa nde.

⁹ Nde áli a batughu bana baba minkyini† ya báli mibighili.

¹⁰ Bihi áli limaaluhu bitsughu bilagha oŋo, mu matala ma óyato mubighili mumõ wu áafi ku Yude, nkwumu a nde Angabuse.

¹¹ Nde bu agyi kundaa bihi, ágwolo muswele a Poole, ákuru myili ya myaa mi ndeme ya ályele ndiri: «Mufulu a Ngili li mu okalyele bu:

* **21:8 21.8** babaghala nsaama ba básuolo ku Yerusaleme mu obaha bantumu Tala Bisala 6.5 ya 8.5-40 † **21:9 21.9** minkyini batughu baala nkini baasoolo babaghala o

Ba-Dzwife baba ku Yerusaleme me bu akala baakuru mbwuru nga-a-muswele wu misyi, ya akala baagwa nde ɲa myaã mi baala ka bali ba-Dzwife o.»

¹² Bihi ya baara baba bvulu lili Sedzare bu ligyughu mandagha mamu, líbuono Poole anyaa okumu ku Yerusaleme.

¹³ Lo nde ábvuhulu ti: «Mu emakye be lili mu okalili ya omwehẽ mukolo me mpara? Me aankughu mu ogwa nyuru a me, ka oli yini a mu kuulu bakuru me misyi o, lo ya mu okpa si ku Yerusaleme mu nkooro a nkwumu a Mfumu Yisu.»

¹⁴ Buulu bihi ka líkakughu opeene a nde o, bihi líinyaã ya líilyele ti: «Nyaã okala bu oli dzyi li Mfumu!»

¹⁵ ɲa mbihi a bitsughu bibye, bihi líikuru mat-sulu ya líikumu ku Yerusaleme.

¹⁶ Binduono bibike bibi ku Sedzare bi bíkagye nzili mō ya bihi, bíbiri bihi ku nzo a Menasō, wuulu obaana edzighi áli enduono. Nde áli musi Syipere.

Poole bwana a bakwuru ku Yerusaleme

¹⁷ Mu matala ma líto bihi ku Yerusaleme, bandughu mu libwunu bábwana bihi mu esee.

¹⁸ Mu etsughu ki énama, Poole ábiri bihi kundaa Dzake, ku ókabvununu bakwuru ba libwunu bwohonu.

¹⁹ Poole ágwi bo mboro, ya ábwi olyele kundaa bo myehene mi ógyighili Nzaami ɲa kara li baala ka bali ba-Dzwife o, mu musala a nde.

²⁰ Bo bu bamana ogyughu mandagha mamu, bábwu osyighi Nzaami. Ya bo bályele kundaa Poole ti: «Ndughu a bihi mu kana, mono mafwunu ya

mafwunu ma ba-Dzwife ma maasi kana, ya bo bwohono bali mu okanama mikyene ya dzyi li lilagha.

²¹ Ankoho bo baagyughu ti we li mu okaluo ba-Dzwife bwohono baba mansie mama banzyi ti basihi Mikyene mi Moyidze, banyaã ofirika-sohobo baana ba bo nzo a mbaa ya banyaã ofirikanama ekulu ki ba-Dzwife.

²² Lo emakye liisa? Bo sa bagyughu ti we aagyi.

²³ Mu obo, we faana ogyighili mandagha ma liilyele bihi we. Na kara li bihi oli a babaghala bana ba bágwi Nzaami misiini mu bomo.

²⁴ Gye ya bo, sa mansagha mama otsehebe nyuru a we emõ ya bo, ya we firi nzi mu kuulu basa bo mankulu. Obo, baara bwohono sa basoolo ti mandagha mwohono ma báakabili bo mu nyuru a we mali mama mpya, ya ti wehe si aakasalala Mikyene mi Moyidze.

²⁵ Lo kundaa baara baala ka bali ba-Dzwife o, ba baasi kana, bihi liisono mukaana mu olyele bo mandagha ma liikuru bihi. Mandagha mamome ma: Banyaã odza tuo li banyama ba baagwi mukaba kundaa banzaami baba bityeghe. Banyaã onma makili ya odza tuo li banyama ba baakpi mbibili ya banyaã osa enkwunu.»

²⁶ Mu etsughu ki énama, Poole ágwolo babaghala babo, ási mansagha mama otsehebe manyuru emõ ya bo. Na mbihi onjo, bo básomo mu nzo a Nzaami mu ogwalagha li baamana bo mansagha mama otsehebe manyuru ya nswe mbwuru mu bo àagwa ekaba.

Basyimi Poole munsa nzo a Nzaami

²⁷ Ku bele a masini ma bitsughu nsaama bibi mansagha mama otsehebe manyuru, ba-Dzwife ba báfi ku Adzi bámono Poole mu nzo a Nzaami yi nene. Bo bátsiini mpwumu a baara mu osa ngirini ya bo básyimi nde.

²⁸ Bo bákakehe bingubu ti: «Basi Isaraye, liyabaha bihi! Limono mbwuru me wu li mu okabululuo kundaa baara bwohono ya mu bibini byehene maluo ma mali mu okakabyihi embwuru ki ekaana e bihi-a-be, Mikyene ya ebini ki. Ya mu matala ma, nde aasohobo si baara baala ka bali ba-Dzwife o munsá nzo a Nzaami, ya aatsaala bungili bu ebini kii ngili ki.»

²⁹ Buulu bo áli batswama omono nde ya To-rofime musi Efedze munsá bvulu, bo bátsimi ti Poole nde aasohobo munsá nzo a Nzaami yi nene.

³⁰ Mpaatsala yíbwi mu bvulu lwohono ya baara bágyi mu mampwumu. Bo básyimi Poole ya bákwole nde ku mbala. Ya básaakuru bidzughubu bi nzo a Nzaami.

³¹ Mu matala ma bákasagha bo odzwa Poole, nsia yi yító kundaa mukwuru a pfwunu li bambumbulu (1 000) lili ba-Romē ti mpaatsala yiibwi mu bvulu lili Yerusaleme lwohono.

³² Mu maswa-maswa, nde ábvughu bamfumu ba bikuru bi bambumbulu nkama ya bambumbulu ba bo, ya bágyene ku óli mpwumu a baara. Baara bu bamono mukwuru a bambumbulu ya bambumbulu ba nde, bo bányaã ofirikaha Poole.

³³ Mu obo, mukwuru a pfwunu (1 000) li bambumbulu bu ayabehene, ágwi litumu básyimi Poole ya bakuru nde misyi myele mimi bisyeē. Na nseele, nde ásaagha ogyahaba baghala munde

nande ali, ya nsa ndagha nde aasi?

³⁴ Lo kunsá mpwumu a baara, bana bákakehe bingubu mu ndagha yi, babake bákakehe bingubu mu ndagha nkimi. Buulu oli a nkele yi alagha, mukwuru a pfwunu li bambumbulu (1 000) ka áleene osoolo kumu li ndagha o. Mu obo, nde ágwi litumu babiri Poole kunsá ekagha ku ookakala bambumbulu.

³⁵ Mu matala ma óli Poole ña yulu a ekaala kii osomo kunsá ekagha, bambumbulu báseene nde mu kuulu mpwumu a baara yíli a kabala li lilagha.

³⁶ Baara bwohono bákánama nde ya bákabíli engubu bu: «Nde wu odzwa!»

Poole kala nyuru a nde

³⁷ Mu matala ma bákasohobo Poole kunsá ekagha ku ookakala bambumbulu, nde ályele kundaa mukwuru a pfwunu li bambumbulu (1 000) ti: «Me nkughu olyele we ndagha nga-mõ?» Mfumu a bambumbulu ábvuhulu ti: «We soolo obili engereke?»

³⁸ We ka li musí Edzipite wu aayasohobo mpaatsala mu bitsughu bi biiluru bi, ya wu aabiri mapfwunu mana (4 000) ma bantwumu ba baakadzwa baara ku syehe o?»

³⁹ Poole ábvuhulu ti: «Me, me ndi mu-Dzwife, musí Tarese, bvulu lili nsia, mu etsulu e nsie kii Silisi. Kolokolo a we, gwa me muswa me mbili kundaa baara ba.»

⁴⁰ Mukwuru a bambumbulu bu agwi nde muswa, Poole átemene ña yulu a ekaala, áseene ekee mu olyele kundaa mpwumu a baara yikala pii. Baara bwohono bákala pii ya nde ábili kundaa bo mu ndiĩ yi a Eebere ti:

22

¹ «Baana ba taara ya bataara ba me, mu matala ma ligyughu mandagha ma aandyele me be mu okala nyuru a me.»

² Bo bu bagyughu Poole mu okabili kundaa bo mu Eebere*, báfirikala pii ku olagha.

³ Nde ályele bo ti: «Me ndi mu-Dzwife, wu báburu ku Tarese, mu nsie yi a Silisi, lo me mu bvulu li nkulu, mu Yerusaleme ya me áangyighili ogyighi bwunu a bu ofaana Mikyene mi bataara ba bihi ŋa myili mi Ngamalyele. Me áli aakansalala Nzaami mu mukolo wu áalwulu mu dzyi mu Nzaami ti bu lili mu okasalala be lolo bu.

⁴ Me áankamwehẽ baara ba bákánama nzili a Mfumu kimini tee ku lipfu. Me áakankuru babaghala ya bakaha minkana, ya me áakando bo mu manzo ma boloko.

⁵ Mukwuru a bangaa ba Nzaami ya mfwunu a bakwuru bali bampughulu mu mi ndi mu okabili me. Me bo báagwi me mikaana mi óyisyimi bandughu mu kana baba ku Damase mu matala ma ángyene me oko. Bo báagwi me litumu lii oyisyimi ya oyabiri baara ku Yerusaleme buulu basyeme bo.»

*Poole lyele bu ágyinji nde mayele
(9.1-19; 26.12-18)*

⁶ «Me áli mu nzili mu okagye, ku bele a ntaã a minsene, me áambehene ya bvulu lili Damase. Ya ensihibi, otsyeme kuu mpini ófi ku yulu ya ótsehebe ebini ki ándi me.

* 22:2 22.2 Eeb E-aramẽ ndi a ba-Dzwife.

⁷ Me áambwi ña nsie ya áangyughu likyi li líkalyele me ti: “Sawule, Sawule, mu emakye we li mu okamwehẽ me kimini?”

⁸ Me áamfwulu ti: “Mfumu, we na?” Likyi libvuhulu ti: “Me ndi Yiisu, musi Nadzarete. Me me we li mu okamwehẽ kimini.”

⁹ Baara ba báli ya me bámono otsyeme, lo bo ka bágyughu likyi li líkabili kundaa me o.

¹⁰ Mu obo, me áamfwulu bu: “Mfumu, emakye me mfaana osa?” Ya Mfumu ábvuhulu kundaa me ti: “Temene, gye ku Damase, ya oko sa balyele we mandagha mwohono ma faana we osa.”

¹¹ Buulu musehene a otsyeme oko ádzwi me mihi, baara ba báli ya me bákwará me mu kwogho ya bábirí me ku Damase.»

¹² «Oko óli a baghala mutsyini wu a nkwumu Ananyase. Nde áli a enzaami ki ebwe ya ákakebe Mikyene. Ba-Dzwife bwohono ba báli mu Damase báli bampughulu mu bigyighili bi nde bi bibwe.

¹³ Ananyase áyámono me ya ályele ti: “Sawule, mwana a taara a me, nyaã we firimono!” Ya mu matala maana mamó, me áamfirimono ya áámono nde.

¹⁴ Nde ályele kundaa me ti: “Nzaami a bataara ba bihi áli aatswama osuoló we mu kuulu we sooló dzyi li nde, we mono munde wu a Nsumu, ya we gyughu likyi li nde.

¹⁵ We faana okala mpughulu a nde ña nkulu a baara bwohono, mu olyele bo mandagha ma aamono ya ma aagyughu we.

¹⁶ Lo mu matala ma, emakye we li mu ofirikyeye? Temene, bagha liboghoró ya gyagha otsehebe ku masumu ma we mu okasamana mu nkwumu a Mfumu.”»

Poole suo bu bágweghe nde kundaa bikaana biili ka bili bibi ba-Dzwife o

¹⁷ «Bu ámbvughuru ku Yerusaleme ya bu ánkansamana munsa nzo a Nzaami, me áambagha limono.

¹⁸ Me áamono Mfumu ya nde ályele me ti: “Saana sa maswa, pala mu Yerusaleme! Mu kuulu baara ba bvulu lilo ka bakihi bumpughulu bu we mu me o.”

¹⁹ Me áambvuhulu ti: “Mfumu, bo basoolo ti me me áakabulungye mu manzo ma ba-Dzwife mama lisamana mu okabululo mu maboloko ya okabulukaha nswanswa babo ba baakasa kana mu we.

²⁰ Ya ña bátsala makili ma Etiene, wu áali mpughulu a we, me áandi oño. Me áankihi bitsimi bi ba bákadzwa nde ya me áakankebe binkuru bi bo.”

²¹ Lo Mfumu ályele kundaa me ti: “Gye, mu kuulu me sa ngweghe we ku la, kundaa baala ka bali ba-Dzwife o.”»

Poole ya mukwuru a bambumbulu

²² Ba-Dzwife ba bákagyughu Poole tee ña ályele nde mandagha mamó, bábwi okabiili bingubu: «Limaha mbwuru wu a bu ña yulu a nsie, nde ka afaana ofirikala mweẽ o!»

²³ Bo bákagyighili ofiribiili bingubu, bákatsili binkuru bi bo ya bákaseene lifufunu mu yulu.

²⁴ Mukwuru a bambumbulu ágwi litumu basohobo Poole kunsá ekagha ku ookakala bambumbulu, ya bakakubu nde nswanswa ña bàagwa nde bifwulu, mpaala basoolo mu nsa ndagha baara bákakehe bingubu bibye mu nde.

²⁵ Bu bakuru nde minkana mpaala bakaha nde nswanswa, Poole ályele kundaa Mukwuru a ekuru ki bambumbulu nkama wu áli onjo ti: «Bunu, be lili a muswa wu okaha mu-Romē nswanswa, ŋaala be nde nkini muyala osa we?»

²⁶ Mukwuru a ekuru ki bambumbulu nkama bu ágyughu obo, nde áyilyele kundaa mukwuru a ekuru ki bambumbulu pfwunu ti: «Bunu-abo we àasa? Mbwuru wu li musi Rome!»

²⁷ Mukwuru a ekuru ki bambumbulu pfwunu ágyene ya áyifwulu Poole ti: «Lyele me, mu ngan̄ma we li musi Rome?» Nde ákihi: «Heē».

²⁸ Mukwuru a ekuru ki bambumbulu pfwunu áfirilyele ti: «Me áangyehe nzi yi alagha mu okighiri musi Rome.» Poole ábvuhulu kundaa nde ti: «Me, me ndi musi Rome wu emburu ngughu.»

²⁹ Mu matala maana mamo, babo ba bákasagha ogwa nde bifwulu bányaã nde. Lo mukwuru a ekuru ki bambumbulu pfwunu ábagha nza-lamweē ŋa ábaghala nde ti mu-Romē nde átumu bakuru minkana.

Poole ŋa nkulu a mfwunu a ekwuru ki ba-Dzwife

³⁰ Mu etsughu ki ékanama, mukwuru a ekuru ki bambumbulu pfwunu bu áli a nzala ogyighili ogyahaba ndagha yi mubwughu yi ófwunu ba-Dzwife Poole, átumu banyana nde minkana. Ya nde ábvughu bakwuru ba bangaa ba Nzaami ya mfwunu a ekwuru ki ba-Dzwife yohono. Ŋa nseele, nde ápaha Poole, átwulu nde ŋa nkulu a bo, mpaala bo bagyughu nde.

23

¹ Poole bu atala mfwunu a ekwuru ki ba-Dzwife pii, ályele ti: «Baana ba taara a me, munsá mukolo a me, me bu nsoolo ti, me áakandzyara mu bunsumu ña busu bu Nzaami, tee mu etsughu kii lolo.»

² Lo Ananyase, mukwuru a bangaa ba Nzaami átu mu ba báli ña bele a Poole bakaha nde mu muñma.

³ Mu obo Poole ályele kundaa nde ti: «Mu mukubu wu a we, Nzaami sa akaha we, ebagha ki básyili mpeeme! We aabwi-nsini ña mu olamana me ti bwunu a bu ookatumu Mikyene. Lo we oño Mikyene li mu osalala bu li mu ogwa litumu ti bakaha me?»

⁴ Ba báli oño bályele kundaa nde ti: «We aatughu Mukwuru a bangaa ba Nzaami!»

⁵ Poole ábvuhulu ti: «Baana ba taara a me, me ka aakansoolo o ti nde me Mukwuru a bangaa ba Nzaami. Mu engañma básono ti: “We ka tughu mfumu a nsie a we o.”»

⁶ Nde bu asoolo ti kunsá mfwunu a ekwuru ki ba-Dzwife babake báli ba-Saduseyē ya ba bamo ba-Faridzyē, Poole ákehe engubu ña kara li bo ti: «Baana ba taara a me, me ndi mu-Faridzyē, mwana a mu-Faridzyē, mu nkooro a kana li bihi mu osighili o baara mu lipfu bali mu okalamana me.»

⁷ Nde bu amana obili obo, mumbañana ábwi ña kara li ba-Faridzyē ya ba-Saduseyē, ya emvuñunu ékaghaba mu makaba muolo.

⁸ Mu kuulu ba-Saduseyē baakalyele ti osighili o baara mu lipfu ka oli o, bangye-yulu ka bali o,

Mifulu si ka mili o. Lo ba-Faridzyë baakasa kana mu mandagha mwohono mamo.

⁹ Nkele yífiriluru. Ndaama a baluo-mikyene mimi kaba lili ba-Faridzyë bátemene ya bákabili mu mpini ti: «Bihi ka liimono ebili mu mbwuru wu o. Nkini a nki mufulu, bwunu we ngye-yulu aabili kundaa nde!»

¹⁰ Buulu mumbanana ákabvulu mpini, mukwuru a ekuru ki bambumbulu pfwunu, bu amono nzalamweë ti bo bakughu okaghala Poole mu bipa, nde átumu bambumbulu basughuru, bapaha nde ña kara li bo ya babiri nde kunsa ekagha ku ookakala bambumbulu.

¹¹ Mu mpyibi yi áanama, Mfumu ámonono kundaa Poole ya ályele nde ti: «Kala a bukyini! Mu kuulu, bwunu a bu aakala we mpughulu a me mu Yerusaleme, bumō si we faana okala mpughulu a me ku Rome.»

Bakuru Poole mfwunu

¹² Bwihi bu buki, ba-Dzwife bákuru mfwunu, báli mukakana ya bályele ti bo ka badza o ya ka banma o tee mu matala ma baadzwa bo Poole.

¹³ Ba-Dzwife ba bákuru mfwunu oyo áli baluru makwumu-mana (40) ma baara.

¹⁴ Bo báyimono bakwuru ba bangaa ba nzaami ya bakwuru ba ekaana. Bályele kundaa bo ti: «Bihi lili mukakana ti bihi ka lidza o ya ka linma o tee mu matala ma liidzwa bihi Poole.

¹⁵ Mu obo, ligwihini ya mfwunu a bakwuru ba ba-Dzwife, mu oyilyele mukwuru a ekuru ki bambumbulu ti bagya a be Poole mu mpere yiili be ligyighili okeene ndagha a nde embe. Bihi me

baala sa liyikehele nde ya lidzwa nde, nsomo nde ayato ŋa.»

¹⁶ Lo mwana a nkele a Poole wu baghala ásoolo mfwunu oyo, ágyene ku ekagha ku ookakala bambumbulu, ásomo omo ya ályele ndagha oyo kundaa Poole.

¹⁷ Poole áti mumõ mu bakwuru ba bikuru bi bambumbulu nkama mbili, ya ályele kundaa nde ti: «Biri mumpala wu kundaa mukwuru a ekuru ki bambumbulu pfwunu, nde li a ndagha yi aalyele nde.»

¹⁸ Mukwuru a ekuru ki bambumbulu nkama ábiri nde kundaa mukwuru a ekuru ki bambumbulu pfwunu ya ályele ti: «Poole wu liilo mu boloko aati me mbili, ya aatumu me yambiri mumpala wu kundaa we. Nde li a ndagha yi aalyele we.»

¹⁹ Mukwuru a ekuru ki bambumbulu pfwunu ákwara nde mu kwogho, ágyene a nde mu libee ya áfwulu nde ti: «We nsa ndagha li a yo yi aalyele me?»

²⁰ Mumpala ábvuhulu nde ti: «Ba-Dzwife baagwihini mu oluomo kundaa we ti mbala we biri Poole ŋa nkulu a mfwunu a bo. Bo sa balyele we ti bo badzyi ogyighili okeene ndagha a nde embe.

²¹ Lo we me wuulu ka akihi bitsimi bi bo o. Mu kuulu oli a makwumu-mana (40) ma baara ŋa kara li bo ba baayikehele nde. Bo baali mukakana ti, bo ka badza o ya ka banjma o, tee mu matala ma baadzwa bo Poole. Mu matala ma bo bali yeelee, yini a mvuru a we bali mu okakebe.»

²² Mukwuru a ekuru ki bambumbulu pfwunu ábvuhulu mumpala ya átswi nde mukele ti: «Ka lyele mbwuru ti we aasuo me mfwunu oyo o.»

Babiri Poole ku bvulu lili Sedzare

²³ Mukwuru a ekuru ki bambumbulu pfwunu áti buolo mu bakwuru ba bikuru bi bambumbulu nkama mbili, ya ályele bo ti: «Likala yeelee mu ogye ku Sedzare, mu tala lili wa mu mpy-ibi. Ligwolo nkama ywolo yi a bambumbulu (200), makwumu-nsaama (70) mama ba baak-abiri basyevale ya nkama ywolo (200) yi a bambumbulu ba bali a magyuo.

²⁴ Ligyighili si basyevale ba baabiri Poole wu mukughu ya mweẽ kundaa Felikise, mfumu a etsulu e nsie.»

²⁵ Nde ásono bu mu mukaana:

²⁶ «Kundaa we Felikise, mfumu wu budziri, mboro a we! Me Kolode Lisyase, ndi mu osono.

²⁷ Mbwuru wu ngweghe me we, ba-Dzwife baasyimi nde ya baadzyi odzwa nde. Me bu aangyughu ti nde li musi Rome, me aangyene ya mpwumu a bambumbulu ba me mu okwulu nde.

²⁸ Me bu aandzyi osoolo ebili ki baafwunu nde, me aambiri nde ña nkulu a mfwunu a bakwuru ba bo.

²⁹ Me aamono ti mandagha ma bali mu okafwunu nde matala mumbanana mu mikyene mi bo. Ka oli a ndagha yi bakughu odzwa nde o, bwunu we olo nde mu boloko.

³⁰ Me bu aangyughu ti bo baakuru mfwunu mu odzwa mbwuru wu, me ngweghe we nde mu maswa-maswa. Ya me aanduomo kundaa ba bali mu okafwunu nde, bayalyele ña mihi mi we ebili ki baabagha bo mu nde.»

³¹ Bambumbulu bágyene a Poole ya bábiri nde mu mpyibi ña bvulu lili Antipatirise ti bwunu a bu óli litumu li bágwi bo.

³² Etsughu ki énama, bambumbulu ba bákagye mu myili, bábvughuru ku ekagha ku ookakala bambumbulu, ba bákabiri basyevale bánama nzili ya Poole.

³³ Bu bato ku Sedzare, bambumbulu ba baakabiri basyevale bágwi mukaana kundaa mfumu a etsulu e nsie, ya básuo nde si Poole.

³⁴ Mfumu a etsulu e nsie átaã mukaana ya áfwulu Poole munsa etsulu e nsie nde áfi. Poole ályele nde ti ku Silisi.

³⁵ Nde ályele kundaa Poole ti: «Me sa ngyughu we mu matala ma ookala ba baafwunu we ña nkulu a me.» Nde ágwi litumu bakebe Poole mu nzo a emfumu yi ótwu Erode.

24

Ba-Dzwife bafwunu Poole

¹ Ña mbihi a bitsighu bitaana, Ananyase, Mukwuru a bangaa ba nzaami ákumunu ku bvulu lili Sedzare nzili mō ya ndaama a bakwuru ba ba-Dzwife, ya Teretuluse, nsughu a bo. Bo báfwnu Poole kundaa mfumu a etsulu e nsie.

² Bu bati Poole mbili, Teretuluse ábaana okwighi nde mandagha bu: «Mfumu wu munene, bihi lili kunsu edzuunu ki enene mu nkooro a we, ya mu mandagha mwohono mama lisobo maasi we mu Ekaana ki.

³ Felikise wu a nkara budziri! Mu matala mwohono ya mu bibini byehene, bihi liikabvurulu matuono ma malagha mu mandagha ma mabwe mwohono ma aakagyighili we.

⁴ Lo mu ogwene oluhu we matala, me mbuono we, ya mu bubwe bu we, magyughu bihi.

⁵ Bihi liimono ti mbwuru wu nkara a mubi. Nde aakatsubu ngirini ŋa kara li ba-Dzwife bwohono baba nsie nsyini. Ya nde li mukwuru a emvununu ki basi Nadzarete.

⁶ Nde aagyele otsaala bungili bu nzo a Nzaami, me mu obo bihi liisimi nde. [Bihi liidzyi olamana nde ti bwunu a bu oli mikyene mi bihi,

⁷ lo Lisyase, mukwuru a bambumbulu, áyagwohono bihi nde mu mpini.

⁸ Ya aagwi litumu kundaa ba baafwunu nde mu ogya ŋa nkulu a we]. We kughu ofwulu baghala wu weme, ya we sa mono ti mandagha ma lili mu okasa bihi nde mumfwunu mali mama ngaŋma.»

⁹ Ba-Dzwife básyighi mandagha ma ólyele Tere-tuluse, ti mo máli mama ngaŋma.

Poole bili mu okala nyuru a nde ŋa nkulu a Felikise

¹⁰ Mfumu a etsulu e nsie ágwi nde muswa mu obili, ya Poole ábvuhulu ti: «Me nsolo ti obaana bamvulu balagha, we aakalamana baara ba ekaana ki mu bunsumu. Me mu obo me ndi a kana mu okala nyuru a me.

¹¹ Bitsughu kwumu ya byele (12) nkini biiluru o, obaana bu áankumu me ku Yerusaleme mu oyibuono Nzaami. We kughu ofwulu ndagha oyo.

¹² Mbwuru si mumō ka aamono me mu okat-soho ya mbwuru o, bwunu we mu okatihi mpwumu a baara. Ngu okala mu Nzo a nzaami, ngu okala mu manzo ma lisamana ma ba-Dzwife, ngu okala munsa bvulu.

¹³ Baara ba, ka bakughu osuo we o ti ndagha yi bali mu okasa me mumfwunu mu matala ma yili yi a ngaŋma.

¹⁴ Mono ndagha yinsoolo me: Me aakambuono Nzaami a bataara ba bihi mu nzili a Mfumu yi bali mu okata bo ti Emvu-mvununu. Me aakansa kana mu mi básono mu Mikyene ya mu mibighili.

¹⁵ Kana li aakansa me mu Nzaami ti sa okala a osighili o baara baba nsumu ya ba bagwene a bunsumu mu lipfu, me lyini lilo si bo bali a lo.

¹⁶ Me mu obo meme si aakansa mpini mu matala mwohonu mu omonono mbwuru wu gwene a bitsimi bi okughu osyeme Nzaami ya baara.

¹⁷ Na mbihi a bamvulu balagha baala me ka ándi ya be o, me aayamvughuru ku Yerusaleme mu oyabiri libaha kundaa ekaana e me, ya mu ogwa bikaba kundaa Nzaami.

¹⁸ Me mu matala mamu bo baamono me munsa Nzo a nzaami na mbihi a mansagha mama otse-hebe nyuru a me. Ka ókakala a mpwumu a baara o, ya ka ókakala a kyaã o.

¹⁹ Lo ba-Dzwife babake baba ku Adzi, ba bákakala onjo, me bo bakaafwunu me kundaa we, kala ti boho si baamono ndagha yi mbi mu me.

²⁰ Bwunu we, nyaã baara ba balyele ndagha yi mbi yibaamono bo mu me, na baalamana me na nkulu a mfwunu a ekwuru ki ba-Dzwife.

²¹ Bunu, yini a mu nkooro a ndagha yi aankehe me engubu mu mutele na kara li bo ti: “Mu osighili o ba bákpi mu lipfu bali mu okalamana me lolo li na nkulu a be?”»

²² Felikise wu áakagyighili osoolo mi mitala nzili a Mfumu, ábvurulu bo ya ályele ndiri: «Me sa ndamana ndagha a be na ooyakumunu Lisyase Mfumu a ekuru ki bambumbulu pfwunu na.»

²³ Nde ágwi litumu kundaa mfumu a ekuru ki bambumbulu nkama mu okebe Poole mu boloko ya mana bumpoholo, ya anyaa bandughu ba nde bumpoholo mu okabaha nde.

Poole ña nkulu a Felikise ya Durusile

²⁴ Ña mbihi a mana bitsughu, Felikise ya Durusile, mukala a nde wu mu-Dzwife, bágyi. Nde átumu bayibinjini Poole ya nde ágyughu nde mu okabili mu kana mu Yiisu-Kriste.

²⁵ Lo mu matala ma óbwi obili Poole mu mi mitala bunsumu, okebe nyuru ya mumfwunu wu akala aagya, Felikise ábagha nzalamweë ya ályele kundaa nde ti: «Mu matala ma, magye! Me sa nta we mbili mu sa likimi.»

²⁶ Felikise áli a kana ti Poole sa agwa nde nzi. Mu obo nde ákata nde mbili matala malagha mu okamoõ ya nde.

²⁷ Ña mbihi a bamvulu buolo, Porosiyuse Fesetuse ákiri Felikise ña emfumu. Buulu Felikise ákasagha ogwa ba-Dzwife esee, nde ányaghala Poole mu boloko.

25

Poole luomo balamana nde ña nkulu a Sedzare

¹ Fesetuse áto mu etsulu e nsie kii Yude. Ña mbihi a bitsughu bitere nde ámara ku Sedzare ya ákumu ku Yerusaleme.

² Bakwuru ba bangaa ba nzaami ya ba-Dzwife baba mupfunu báyimono Fesetuse ya báfwunu Poole kundaa nde. Bo bási enziini,

³ mu obuono Fesetuse abvurulu Poole ku Yerusaleme. Mu enganma, bo áli bakuru mfwunu yi okehele nde mu nzili mu kuulu badzwa nde.

⁴ Lo Fesetuse ábvuhulu kundaa bo ti Poole áli mu boloko lili ku Sedzare, ya edzi-dzighi ndeme ákabvughuru oko.

⁵ Nde áfirilyele ti: «Nyaã bamfumu ba be baku-munu nzili mõ ya me ku Sedzare, ya bo bafwunu nde oko, kala ti nde li a ebili.»

⁶ Fesetuse áluhu bitsighu mpuomo bwunu we kwumu ku Yerusaleme, ña mbihi nde ákumunu ku Sedzare. Mu etsughu ki énama, nde bu abwi-nsini ña ebini kii muyala, átu mu bayabiri nde Poole.

⁷ Poole bu ayato, ba-Dzwife ba báfi ku Yerusaleme bádzi nde ya bábwí okaburulu nde mandagha ma malagha ya mama mpara. Lo bo ka bákakughu osuo enganma ki mandagha mamoo.

⁸ Poole ákala nyuru a nde ya ályele ti: «Me ka aansí bubi o, ngu okala ña nkulu a Mikyene mi ba-Dzwife, ngu okala mu nzo a nzaami, ngu okala mu mi mitala mukogho Sedzare.»

⁹ Fesetuse bu ákadzyi ogwa ba-Dzwife esee áfwulu Poole ti: «We dzyi okumu ku Yerusaleme mu kuulu balamana ndagha a we yi oko ña nkulu a me?»

¹⁰ Lo Poole ábvuhulu ti: «Me ndi ña mbala a muyala a mukogho Sedzare, me ña ebini ki bafaana olamana me. Ti bwunu a bu gyighili osoolo weme, me ka aansí ndagha yi mbi kundaa ba-Dzwife o.

¹¹ Kala ti me ka ndi a bwuu o ya kala ti me aansí bubi buulu bafaana odzwa me, lo me ka nkughu obihi lipfu o. Lo kala ti mandagha ma oli mu okaburulu me baara ba mali mama bwunu, lo mbwuru ka li a muswa mu otyeghe me ña myaã

mi bo o. Me nduomo mukogho Sedzare alamana ndagha a me.»

¹² Fesetuse bu afi ku mfwunu ya bansughu-a-lamana, ágwi nde mvuru yi: «We aaluomo ti mukogho Sedzare alamana ndagha a we, we sa gye ña nkulu a Sedzare!»

Poole ña nkulu a mukogho Angiripa ya Berenise

¹³ Mana bitsughu bu biluru, mukogho Angiripa ya Berenise báyato mu bvulu lili Sedzare ya báygwa Fesetuse mboro.

¹⁴ Buulu bo bákáluhu bitsughu bilagha oko, Fesetuse ágwi nsia yi a ndagha a Poole kundaa mukogho ya ályele ti: «Ña oli a mbwuru mumõ wu oosihi Felikise mu boloko.

¹⁵ Mu matala ma aandi me ku Yerusaleme, bakwuru ba bangaa ba nzaami ya bakwuru ba ba-Dzwife baafwunu nde, ya baakaluomo ti me ngwa nde ebili.

¹⁶ Me aamvuhulu kundaa bo ti ba-Romẽ ka bali a epfu kii otyeghe mbwuru wu baafwunu ña myaã mi baara o, kala ti ka batswama ogyughu mabwuu ma bo o. Nsomo bafaana ogwa wu baafwunu matala mu okala nyuru a nde.

¹⁷ Me mu obo bo bwohono baagyi ña, gwene a ogwa me lagha. Bwihi bu buki, me aambwi-nsini mu nzo a muyala, ya aantumu bagya a mbwuru munde.

¹⁸ Bu baagyi, ba baafwunu nde baabili, lo ka oli a ndagha si mõ yi a mpara o, ti bu aakansimi me.

¹⁹ Bo yini a munsohobo baasi mu mi mitala osamana o bo, emvulu ngughu ndagha yitala mbwuru mumõ wu áakpi, nkwumu a nde Yiisu. Poole li mu okabululyele ti nde li mweẽ.

²⁰ Buulu me ka aakansoolo bu aansa o, me aamfwulu Poole kala ti nde dzyi ogye ku Yerusaleme buulu balamana ndagha a nde oko.

²¹ Lo Poole aaluomo ti mukogho wu a Rome alamana ndagha a nde. Me mu obo me aantumu ti bakebe nde mu boloko tee mu matala ma aangweghe me nde kundaa Sedzare.»

²² Angiripa ályele kundaa Fesetuse ti: «Mehe si, ndzyi ogyughu mbwuru munde!» Fesetuse ábvuhulu kundaa nde ti: «Mbala we sa gyughu nde.»

²³ Bwihi bu buki, Angiripa ya Berenise bágyi kunsá nsia. Bo básomo munsá nzo a muyala, nzili mō ya bakwuru ba bambumbulu, ya baara baba budziri baba mu bvulu. Fesetuse ágwi litumu bayabiri Poole.

²⁴ Fesetuse ályele ti: «Mukogho Angiripa ya be bwohonó ba lili ŋa ya bihi, limono mbwuru wu. Mu nkooro a nde, mpwumu a ba-Dzwife yígyi kundaa me ku Yerusaleme ya ŋaha si, ya yili mu okaluomo kunsá bingubu ti nde ka faana ofirikala wu a mweẽ o.

²⁵ Me ka aamono mu nde ebili ki bakughu otsyiri nde mukakana wu lipfu o. Lo buulu ndeme aaluomo ti ndagha a nde olamana yo mukogho a Rome, me aangwolo munkana wu ogweghe nde kundaa Sedzare.

²⁶ Me bu aankwono obagha ngughu a ndagha yi osono kundaa mukogho a Rome mu mi mitala mbwuru wu, me aayambiri nde ŋa nkulu a be, ŋa nkulu a we mukogho Angiripa, mu kuulu ŋa mbihi a bifwulu bi aagwa we nde, me mbagha mi aansono me mu nde.

²⁷ Mu enganma, me aamono ti oli buwulu mu ogweghe mbwuru a boloko kundaa mukogho a Rome, gwene a osuo bubi bu baafwunu nde.»

26

Poole bili mu okala nyuru a nde ɲa nkulu a Angiripa

¹ Angiripa ályele kundaa Poole ti: «We li a muswa wu obili mu okala nyuru a we!» Poole álabala kwogho ya ábili bu mu okala nyuru a nde:

² «Mukogho Angiripa! Me ndi a nkara esee mu etsughu kii lolo mu obili mu okala nyuru a me ɲa nkulu a we, mu mandagha mwohonon ma oli mu okaburulu me ba-Dzwife.

³ Mu kuulu we gyighili osoolo ekulu ki ba-Dzwife kyehene ya mandagha ma baakabulubanana bo. Yoboo, me mbuono we, ka kolo o mu ogyughu me!»

⁴ «Ba-Dzwife bwohonon basoolo bumweẽ bu me, obaana matala ma ándi me munkuru-mbala, ɲa kara li ekaana e me ku Yerusaleme.

⁵ Bo basoolo me edzighi, kala ti bo badzyi, bo bakughu olyele enganma mu me ti me áli mbwuru a emvununu ki ebvulu a mpini mu enzaami e bihi, emvununu kii ba-Faridzyẽ.

⁶ Ya kala ti bali mu olamana me lolo, mu nkooro a kana li me mu misiini mi ósi Nzaami kundaa bataara ba bihi,

⁷ ya madzumu ma bihi kwumu ya muolo (12) si maakasa kana ti misiini mimye sa mikeele ya maakabuono Nzaami mpyibi ya mwii mu mbaa yi alagha. A mukogho! Me mu nkooro a kana lilo ba-Dzwife baafwunu me.

⁸ Mu emakye be ba-Dzwife liikagwene osa kana ti Nzaami kughu osiili ba bákpí?

⁹ Meme si áakansimi odzwana a nkwumu a Yiisu musi Nadzarete mu manzili mwohono.

¹⁰ Mamo me mandagha ma ákangyighili me ku Yerusaleme. Mu litumu li ógwi me bakwuru ba bangaa ba nzaami. Meme áakando baba ngili balagha mu maboloko ya me áakankihi ti bakadzwa bo.

¹¹ Me aakubulungye mu manzo mama lisamana ma ba-Dzwife mwohono mu okasyeme bo ya me áakansiini bo bakatswagha nkwumu a Nzaami. Mu nkehe a me yi a mpini, me áakamweë bo kimini tee mu mabvulu mama bunzyi.»

Poole lyele bu ágyinji nde mayele
(9.1-19; 22.6-16)

¹² «Etsughu nga-emõ me ákangye ku Damase ya litumu lwohono ya esala ki ógwi me bakwuru ba bangaa ba nzaami.

¹³ A mukogho! Me ándi mu nzili, ku bele a matala mama embehe, me áamono otsyeme ku obvulu tala mu osehene, ku ófi ku yulu, ya óyabwa mu me ya ba bákagye nzili mō ya me.

¹⁴ Bihi bwohono líbwi ña nsie, ya me áangyughu likyi li líkalyele kundaa me mu Eebere ti: “Sawule, Sawule, mu emakye we li mu okamwehē me kimini? Mpara yi a bwunu kundaa we bu gwene okihi, ti anga ngoomo wu li mu okasa ngyi ña bali mu okakulu nde munkumu!”

¹⁵ Ya me áamfwulu ti: “Mfumu, we na?” Mfumu ábvuhulu me ti: “Me ngu Yiisu, ngu me we li mu okamwehē kimini.

¹⁶ Lo sighili ya temene mu myili mi we. Me aamonono kundaa we mu osa kuulu we kala musala a me ya mpughulu a me mu mi áamono we mu me, ya mu mi àansuo me we ña àamfirimoñono me kundaa we.

¹⁷ Me sa akala nkwulu we ña myaã mi baara ba, ya mimi baala ka bali ba-Dzwife o. Me kundaa baala ka bali ba-Dzwife o me aangweghe we,

¹⁸ buulu we dzubulu bo mihi, bapala ku mpyibi a nswi mu ogya ku otsyeme, bapala mu litumu li Satana mu osomo mu lili Nzaami. Bo babagha kolokolo a masumu ya babagha kaba lili pfa li baba ngili, mu nzili yi a kana mu me.”»

Poole bili mu mi mitala esala e nde

¹⁹ «Mu obo, mukogho Angiripa, me ka ánsi nkyini mu limono lili mayulu lilo o.

²⁰ Lo me áanduo nsomo kundaa baara baba Damase, tumu kundaa baba Yerusaleme, mu etsulu e nsie kii Yude, ya kundaa bikaana biili ka bili ba-Dzwife o. Me áanduomo bo bagyiñi mayele, babvughuru kundaa Nzaami, ya basuo bigyighili bi bifaana ya ogyiñi mayele.

²¹ Me mu obo ba-Dzwife baasyimi me mu nzo a nzaami ya baakasagha odzwa me.

²² Lo Nzaami li mu okakebe me, ya tee mu etsughu kii lolo, me ndi mpughulu kundaa bike-bike ya kundaa bakwuru, kwono ku ndagha obwehe ña yulu a mi ólyele mibighili ya Moyidze, ti mandagha mamó mafaana okeelee.

²³ Mandagha mamó me ma: Kriste faana omonó mpara ya nde li wu a nsomo mu osighili ña kara li ba bákpi. Nde faana otsala nsia a

otsyeme kundaa ba-Dzwife ya kundaa baala ka bali ba-Dzwife o.»

Poole lyele Angiripa asa kana

²⁴ Poole ákabili mu okala nyuru a nde ya bu alyele ndagha oyo, Fesetuse ábili mu likyi lili mpini: «Poole we lala li a lo! Mayele mwohono ma li a we maagwi we lala!»

²⁵ Lo Poole ábvuhulu ti: «Fesetuse, wu a nkara budziri! Me ka aambyele lala o! Lo mandagha ma ndyele me mama ngan̄ma ya mama bunsumu.

²⁶ Mu kuulu mukogho soolo mandagha mamu mwohono, ya me nkughu obili ŋa nkulu a nde ya kana lwohono. Me ngyighili osoolo ti nde ka dzimini si ndagha mō mu mo o, mu kuulu mandagha mamu ka máluru mu ensweghe o.

²⁷ A mukogho Angiripa! We aakasa kana mu mibighili? Me nsolo ti we aakasa kana mu mye.»

²⁸ Angiripa ábvuhulu kundaa Poole ti: «Osyili eki-kiri we peene a me mu kuulu me nkala mukriste!»

²⁹ Poole ályele kundaa nde ti: «Ngu okala eki-kiri, bwunu we matala malagha, kala ti Nzaami dzyi, ka okala yini a we o, lo ya baara bwohono ba bali mu okagyughu me lolo li. Nyaã be likala ti anga me, lo gwene a minkana mimi mu bisyeẽ mi!»

³⁰ Mukogho, mfumu a etsulu e nsie, Berenise ya babo bwohono ba bábwí-nsini, bátemene.

³¹ Bo bágyene ku mfwunu, báfuunu bo-a-bo ti: «Mbwuru wu ka aagyighili ndagha si mō o yi bakughu odzwa nde bwunu we olo nde mu boloko.»

³² Angiripa ályele kundaa Fesetuse ti: «Mbwuru wu ali wu onyaã, kala ti nde ka aaluomo Sedzare alamana ndagha a nde o.»

27

Bagweghe Poole ku Rome

¹ Mu matala ma bágwolo munkaana ti bihi lisomo mu bwara mu ogye ku Itali, bágwi Poole ya baara ba boloko babake ña myaã mi mfumu a ekuru ki bambumbulu nkama (100) wu a nkwumu Yulyuse. Nde áli mu mpwumu a bambumbulu yi baakata ti Mpwumu yi a Onguste.

² Bihi líisomo mu bwara bubu bvulu lili Adaramite bu búkagye ku mambwuu mama Adzi ya bihi líigyene mu nzili a mubu. Bihi líili ya Arisitarake, musi Masedwane wu a ku Tesalonike.

³ Mu etsughu ki éluono, bihi líito ña bvulu lili Sidō ya líigwumu oño. Yulyuse wu áakagwolo Poole mu embwuru, ágwi nde muswa mu oyimono bandughu ba nde buulu bo babaha nde.

⁴ Bu limara oño, bihi línama mu mukoghomukogho a elyi kii Syipere mu kuulu libara efulu ki ékaghala mfulu kundaa bihi.

⁵ Bihi líipala mubu mbembehe li bitsulu bi nsie bibi Silisi ya Pamfili, ya bihi líisughuru ña bvulu lili Mire mu etsulu e nsie kii Lisi.

⁶ Oño, mfumu a ekuru ki bambumbulu nkama (100) bu amono bwara bubu bvulu lili Aledzanderi bu búkagye ku Itali, ásohobo bihi omo.

⁷ Mu bitsughu bilagha bihi líikagye buke-buke mu bwara, ya mu mpara bihi líyito ña nkulu a bvulu lili Kinide. Buulu efulu ékakahaba bihi mu ogye linkulu, bihi líiluru minkinji ña nto a elyi ki

baakata Salemone ya líigyene mukogho-mukogho mu ngulu yi a elyi kii Kerete.

⁸ Bwara búkagye mu mpara yi alagha mu mukogho a madza ya bihi líiyito ña ebini emō ki baakata ti Mambwuu ma Mabwe, ña bele a bvulu lili Lasaya.

⁹ Matala malagha máluru bihi oño, ya osomo mu bwara ya ogye mu madza áli oli ndagha yi a mpara, mu kuulu matala mama okuru nswele* mu bala áli ayi máluru. Poole ágyehe bo ya ályele ti:

¹⁰ «Bandughu ba me, me ndi mu omono ti dzwe li sa likala li libi. Bilogho ya bwara bikughu opfighili, ya bihi-meme si likughu opfihili bumweē bu bihi.»

¹¹ Lo mfumu a ekuru ki bambumbulu nkama (100) ábvulu okasa kana mu mbwuru wu aakabiri bwara ya mu nga-a-bwara. Nde ka ádzyi ogyughu Poole o.

¹² Lo buulu mbwuu ka yíli a bu oluhu ndo yi a mpie yi alagha o, ba balagha bákihi etsimi kii omara oño. Bitsimi bi bo áli ti, bo bákughu oto ku Fenikise, mbwuu mō yi a Kerete. Yo yíli bwaha ku Sude-Este ya ku Nore-Weste.

Efulu ki enene mu mubu

¹³ Mana efulu ki edzuunu ki eekafa ku Sude bu etemene, bo bámono ti bakughu onama etsimi e mfwunu a bo, ya bu basohobo enkulu ki eekate-hebe bwara mu madza, bo bágyene mukogho-mukogho a elyi kii Kerete.

* **27:9 27.9** okuru nswele nswele yi bákakuru yo ña masini ma ndo yi a dzwa, mu osomo mvulu a nsomo.

¹⁴ Lo ɲa mbihi a mana matala, efulu e nkiri† ki baakata ti efulu ki Nore-Esete, ki eekafa ku minguo mimi elyi, ébwi ofulu mu mpini.

¹⁵ Efulu ébiri bwara, ya buulu bihi ka líli a bu ofirisa o, bwara búkabulugye a bihi magye-agye.

¹⁶ Bu líkaluru ɲa bele a elyi-lyi kii Koda, ki ékakyi bihi efulu, bihi líisi mpini mu osomo mu bwara bu busala baba libaha.

¹⁷ Ba baakasala mu bwara, básohobo bwara bu busala bubu libaha munsa bwara bu bunene. Bo bádziɲi bwara bu bunene mísyi, ya bu bamono nzalamweē ti mara bakwogho a bihi tee ku dzyele lili mukogho a mubu wu a Libi, bo bátubu mu madza enkulu kii endehē ki eekatehebe bwara. Ya bányaā efulu ékagye a bihi magye-agye.

¹⁸ Etsughu ki éluono, buulu efulu ékanyihĩ bihi mu mpini, bo bátsili pa li matsulu mu mubu,

¹⁹ ya mu etsughu kii bitere, bo bomo bátsili mu mubu nkpaā a eko yi aakasa ti bwara bukagye ya muti wu aakakwara yo.

²⁰ Mu bitsughu bilagha, tala ya banomanomo ka bífirikamonono o, efulu ka édzunu si eke o, ya bihi ka lífirisili a emiini kii obvwughu o.

²¹ Bitsughu bilagha bíiluru biili bo ka báli o. Ya Poole bu atemene ɲa kara li bo ályele ti: «Bandughu ba me, kala ti be ali liigyughu me, ti linyaā omara ɲa Kerete, nkini ka likaabwana a efulu ki enene ki ya opfihili bilogho byehene bi o.

²² Lo mu matala ma, me nduomo be mu okala a bukyini. Mu kuulu ka oli a mbwuru si mumō

† 27:14 27.14 efulu e nkiri efulu kii minyimi

mu be wu aapfihili laama li nde o, yini a bwara buubyi.

²³ Mu kuulu mu mpyibi yi, ngye-yulu a Nzaami, Nzaami wu aabagha me ya wu aakansalala me, aayamonono kundaa me

²⁴ ya aalyele me ti: “Poole, ka kala a nzalamweẽ o, mu kuulu bafaana olamana we ña nkulu a Sedzare. Nzaami aagwi we bwehe ya mu nkooro a we, banganda ba we baba midzye sa bakala mweẽ.”

²⁵ Me mu obo bandughu ba me likala a bukyini! Me ndi a kana mu Nzaami ti mandagha ma aalyele nde me sa makeele.

²⁶ Bwara bu bihi-a-be sa buyitsanama ña yulu a elyi emõ.»

²⁷ Mpyibi oyo áli yi a kwumu ya na (14) yi líkabulugye bihi magye-agye mu mubu wu a Adiryatike. Mu kara-a-kara a mpyibi, ba baakab-ulusala mu bwara bábaghala ti bihi líto be-bele a nsie.

²⁸ Bo bágyeele muyighi madza, ya bábagha mankpáã makwumu-matere ya nsaama (37). Bu bafirisele ña nkulu, báfirigyele ya bábagha mankpáã makwumu-muolo ya mataana (25) mama muyighi.

²⁹ Bu bamono nzalamweẽ ti mara bayikaghara ku yulu a mameẽ, bo básurulu binkulu bina bi biikatehebe bwara mu madza ku mbihi a bwara, ya bo bákasughu mukolo ti bwihi bu baakya.

³⁰ Lo buulu ba baakasala mu bwara bákasagha obara, bo básurulu bwara bu busala buu libaha mu mubu, ya bási mpere yi oyitere binkulu bi biikatehebe bwara mu madza, ku nkulu a bwara

bu bunene.

³¹ Poole ályele kundaa mukwuru a ekuru ki bambumbulu nkama ya bambumbulu ti: «Kala ti baara ba ka bakala munsa bwara o, lo be ka libvwughu o!»

³² Bambumbulu bátsyiri misyi mi bwara bu busala buu libaha ya bányaã bo bugye mu madza.

³³ Bu bákakebe ti bwihi bukya, Poole ábwono baara bwohono ti badza, ya ályele ti: «Etsughu kii lolo me kii kwumu ya bina (14) ki lili mu okakebe be, ya kiili be elogho odza we.

³⁴ Mu obo, me mbuono be mu odza mu kuulu be lili a nzala a bi-odza mu obvwughu. Mu enganma, mbwuru si mumõ mu be ka apfihili si lifu li mutswi a nde limõ o.»

³⁵ Bu amana obili, nde ágwolo limpa, bu abvurulu matuono kundaa Nzaami ña nkulu a bo bwohono, átsyiri lo ya ábwi odza.

³⁶ Bo bwohono bábagha bukyini ya boho si bágwolo bilogho báli.

³⁷ Munsa bwara bihi líli nkama-ywolo ya makwumu-nsaama ya baara basemene (276).

³⁸ Bu bagyughuru, bo bátsili matsulu mama mburu a bele mu mubu mpaala bwara buleë.

Bwara budzyama mu madza

³⁹ Bwihi bu buki, ba baakasala mu bwara ka báfirikasoolo nsie yi bámono bo o. Lo bo bátaala furu li mubu li líli a dzyele lilagha. Bo bágwolo munkana wu obiri bwara tee oño, kala ti bakughu oleene.

⁴⁰ Mu obo, bo bányana binkulu bi biikatehebe bwara mu madza ya bányaã bye mu mubu. Bo bányana si misyi mi mankaba ma maakabiri

bwara. Na mbihi, bo bakuhubu nkpaã eko yi nene ku nkulu a bwara mpaala efulu etsiini bo ya ebiri bo ku mukogho a mubu.

⁴¹ Lo bo bábvuulu ekumu e dzyele munsa mubu. Mutswi a bwara ákaghara mu dzyele ya bwara ka búfirikanyĩ o. Etsulu kii mbihi étsañama mu nkooro a mampo ma mubu ma mákagya mu mpini.

⁴² Bambumbulu bágwolo munkana wu odzwa baara ba boloko. Mu kuulu bo báli a nzalamweẽ ti mfangolo mumõ mu bo abwa mu madza, bara mu otsaba.

⁴³ Lo mfumu a ekuru ki bambumbulu nkama ákahaba bo mu kuulu nde ákasagha obvwuhu Poole. Nde ágwi litumu kundaa ba basoolo otsaba mu obwa nsomo mu madza ya bapala ña nseghe.

⁴⁴ Ba bake báfaana onama bo mu okumu mu yulu a mabaya, bwunu we bipa bi bwara. Obo me bu óbvwughu baara bwohonon ya báto ña yulu a nseghe mukughu, gwene a epfwumu.

28

Poole ku elyi kii Malete

¹ Bu libvwughu baba mukughu ya mweẽ, bihi lígyughu ti nkwumu a elyi ekye Malate.

² Baara ba baakakala ña elyi ekye bábwana a bihi mu embwuru ki elagha. Bo bábvughu mbaa yi nene, báti bihi mbili mu oyagyoro, mu kuulu mvulu ákanoõ ya óli a mpie.

³ Poole átolo byeghe li nkwi ya átubu lo ku mbaa. Mpili ásuru munsa byeghe lilo mu nkooro a kyanjana, ánarara nde ña ekee.

⁴ Baara baba elyi bu bamono ntaala wu áakatsyi ña ekee e nde bábili bo-a-bo ti: «Ngañma, mbwuru wu baara aakadzwa! Nde aabvwughu mu mubu, lo bunsumu bu Nzaami ka buli mu ogwa nde muswa mu okala mweẽ o.»

⁵ Poole ákubulu ntaala kunsá mbaa, lo nde ka ámono mpara o.

⁶ Baara bákakebe omono bu oobyimi nyuru a nde, bwunu we ku aakpa nde nkaã. Bo bákebe edzighi elagha ya ka bámono ndagha yi a mpara yi áabwi mu nde o. Mu obo, bo básobo bitsimi, bábwi okabili ti nde li nzaami.

⁷ Bitaa-taa bibye, óli a mansie ma mfumu a elyi ekye. Nkwumu a nde áli Pubiliyuse. Nde ábwana a bihi kundaa nde ti anga bandughu ba nde, ya bihi lílulu bitsughu bitere ku nzo a nde.

⁸ Taara a Pubiliyuse áli a mukaama ya mumweẽ wu makili ákaluru nde. Poole áyitala nde ña mbughu ña ágyoñomo nde, bu asamana, ánaã nde myaã, ya ádzuhu nde.

⁹ Ña mbihi a mandagha mamo, baara bwohonon baba elyi ba báli a mabyele bágyi si kundaa nde, ya nde ádzuhu bo.

¹⁰ Bo bágwi bihi budziri bu bulagha ya mu matala ma lísomo bihi bwara mu ogye, bo bágwi bihi bilogho bi líli a bihi nzala a bye.

Poole to ku Rome

¹¹ Ña mbihi a bangoono batere, bihi líigwolo bwara bu búluhu ndo yi a mpie yi alagha ña elyi. Bwara bubo búfi ku bvulu lili Aledzanderi, nkwumu a bo «*Dyosokure*», mbaala ti, «banzaami ba bali bambu».

¹² Bihi líito ña bvulu lili Sirakuse, ya lílulu bitsughu bitere oño.

¹³ Bu limara oño, bihi línama mukogho a mubu, ya líiyito ku Rengyo. Ña mbihi a etsughu emō, efulu kii ku Sude ébwi ofulu ya bihi líiyipala ku bvulu lili Punzolo mu bitsughu byele,

¹⁴ oko bihi líimono bandughu mu kana ba bábuono bihi mu oluhu bitsughu nsaama ya bo. Obo me bu líyato bihi ku Rome.

¹⁵ Bandughu mu kana baba ku Rome bu bagyughu mandagha ma líbwana a bihi, bágwi tee ña yu lili Apiyuse ya ña ebini ki baakata ti Manzo matere mu oyabwana a bihi. Poole bu amono bo, ábvurulu matuono kundaa Nzaami ya ábagha bukyini.

¹⁶ Mu matala ma líto bihi ku Rome, bágwi Poole muswa mu okala mu nzo yi a nde ngasighi ya bágwi nde mbumbulu wu áakabulukebe nde.

Poole luo ku Rome

¹⁷ Ña mbihi a bitsughu bitere, Poole áti bakwuru ba ba-Dzwife baba ku Rome mbili ku nzo a nde. Bu babvuñunu, nde ályele kundaa bo ti: «Baana ba taara a me, me ka aangyighili ndagha si mō yi mbi kundaa baara ba bihi ya kundaa bipfu bi ekulu ki bataara ba bihi o, lo baasyimi me ku Yerusaleme ya baatyeghe me ña myaã mi ba-Romẽ.

¹⁸ Bo bu bamana ogwa me bifwulu, bo baakadzyi onyaã me, mu kuulu bo ka baabagha ebili ki baadzwa me o.

¹⁹ Lo ba-Dzwife ka baakadzyi o, ya me aakaran-duomo ti mukogho Sedzare alamana ndagha a

me, gwene a okala a etsimi kii ofwunu baara ba ekaana e me.

²⁰ Me mu obo me aanduomo omoŋono ya omoŋ ya be. Mu ngan̄ma, mu nkooro a kana li Isarayelee me ndi mu minkana mimi bisyeē mi.»

²¹ Bo bályele kundaa nde ti: «Bihi ka liigyagha mukaana si mumō wu aafi ku Yude mu nkooro a we o. Ka oli a mbwuru si mumō o mu bandughu mu kana wu aagwi bihi nsia bwunu we wu aalyele bihi mandagha ma mabi mu we.

²² Lo bihi lidzyi ti weme lyele bihi bitsimi bi we. Mu kuulu bihi ligyighili osoolo ti mu mambughu mwohonono, baara bali mu okatemene nsumu emvunjunu ki li mu okanabara we.»

²³ Bo bási lagha li baafiribvunjunu ya Poole. Etsughu ekye bu eto, baara bágyi balagha ku nzo yi ákakala nde. Obaana epala tee nkonkolo, Poole ákaluo ya ákabaala mandagha mwohonono ma matala Emfumu e Nzaami. Nde ákasagha bu aapeene a bo mu kuulu bakihi mandagha ma ákalyele nde bo mu mi mitala Yiisu, obaana mu Mikyene mi Moyidze, tee mu mibighili.

²⁴ Baara bana bákihi mandagha ma ákalyele nde bo, babake bábihi osa kana.

²⁵ Mu matala ma bákabvughuru bo, bo-a-bo nkini áli ka bákagwihini o, ya Poole ábwehe ndagha yi: «Mufulu a Ngili ábili bubwe kundaa bataara ba be mu mubighili Edzayi.»

²⁶ Nde ályele ti:
«Gye yilyele kundaa baara babo:
Be sa ligyighili ogyughu, lo ka libaghala o.
Be sa ligyighili otala, lo ka limono o.

²⁷ Mu kuulu mikolo mi baara ba ayi miikubu.

Bo baakyihi matswi ma bo.
Bo baadzwi mihi mi bo,
mpaala banyaã omono mu mihi mi bo,
banyaã ogyughu mu matswi ma bo,
banyaã obaghala mu mikolo,
mu obo, banyaã ogyinji mayele, mpaala me
ndzuhu bo*.»

²⁸ «Be lifaana osoolo ti Nzaami aagweghe si nsia
yi a obvwughu kundaa baala ka bali ba-Dzwife o.
Bo, sa bagyughu!» [

²⁹ Poole bu amana obili obo, ba-Dzwife
bábvughuru mu okabulubanana bo-a-bo].

³⁰ Poole áluhu bamvulu buolo mu nzo yi ofuru.
Nde ákabwana baara bwohono ba bá kayamono
nde.

³¹ Nde ákatsala nsia a Emfumu e Nzaami ya
ákaluo mu kana lwohono ya mu bumpoholo
bwohono mandagha ma matala Mfumu Yiisu-
Kriste.

* ^{28:27} ^{28.27} Edz 6.9-10; Mat 13.14-15; Mar 4.12; Luk 8.10; Dzã
12.40

Teke Sud-Ouest

Teke-Tyee: Teke Sud-Ouest (New Testament)

copyright © 2024 Wycliffe Bible Translators, Inc.

Language: (Teke-Tyee)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

6f558581-83f7-55dd-acef-3d682f6a705d